


益公題跋

一



叢書集成

初編

主編者
王雲五

商務印書館發行




跋題公益

(一)



3 0649 1838 0

撰大必周



益公題跋

本館據津逮祕書
本影印初編各叢
書僅有此本

益公題跋

目錄

卷之一

高宗御批陳思恭奏劄跋

淳熙戊申國書跋

光宗御書跋

題山谷和郭內翰長篇

自題寫真

題薛元亮老杜醉歸圖詩後

題六一先生手書後

題蔡君謨草帖

題唐人臨王子敬帖

題吳說書

題蕭楚公帖

跋王獻之保母壙志

題米禮部參軍賦真蹟

題孫氏四皓圖

題祖妣秦國潘夫人書

題樂毅論

雜題跋

跋汪聖錫與武義宰趙醇手書

跋東坡桂酒頌

跋德化縣陳氏義門碑

題吉州司戶趙彥法所藏山谷帖

題汪季路所藏書畫四軸

跋劉賓之浩然集

跋何居仁自作墓志

題宜春李梅詩卷

題曾伯震所得子中兄二絕

題李玠叔詩文

題陳誠之遠明樓記

跋百醉夫趙士墩詩卷

題劉昌詩母墓志

題謝昌國與朱陸書

跋蕭唐吏特卷記

題顏魯公書撰杜濟神道碑

跋金給事彥亨文集

跋范丞相覺民謝罷政表藁

又題范覺民與諸人唱和詩

跋張忠獻公答宋待制手書

題張右丞如瑩奏疏

跋六一先生跋杜濟神道碑

跋獨孤延壽碑

卷之二

跋後漢蔡常侍碑

跋歐陽公堯祠碑跋

題楊謹仲芍藥詩後

跋胡忠簡公和王行簡詩

題羅起宗廟食碑

跋王民瞻送胡邦衡南遷詩

題京仲遠與周孟覺帖

御書樂毅論跋

題呂獻可墓誌

跋張元幹送胡邦衡詞

題蔡忠惠公帖

題陳忠肅公尊堯集稿

跋歐陽文忠公誨學帖

跋徐夫人所書華嚴經梁武懺

跋胡忠簡公論和議藁

題羅煒詩藁

跋焦伯強與潘簡夫帖

跋呂伯恭日記

跋廖中精紀

題謝昌國式華堂記

題廬山西林道場碑

題裴晉公撰李西平神道碑

題歐陽文忠公跋賽陽山文

跋歐陽文忠公與裴如晦帖

題張志寧所藏東坡画

跋老泉所作楊少卿墓文

跋宋待制喚寧軒自適詩

跋李先之禮記義

跋陳剛中石邨廟詩

跋臨江軍劉昌詩之父青詞藁

題胡邦衡侍郎撰胡從周寺丞誌文

題張魏公與晁升道帖

題呂紫微與晁仲石詩

題李龍眠山庄圖

跋張魏公與彭子後書

題陸本益齋記

題周洽所藏南唐滕訴

題浮雲居士曾達臣雜志後

題至聖文宣公三十八代孫孔仲良唐真

元以後告身石刻

題俞洪所藏滕元發與俞退翁詩

又書谿堂集後

卷之三

題曾遠侍郎戒其子宗清廉帖

跋撫州游武禩帖

跋楊廷秀所作胡氏霜節堂記

跋唐子西帖

跋韓子蒼與曾公袞錢遜叔諸人唱和詩

跋曾公袞錢遜叔韓子蒼諸公唱和詩

跋吉水蕭氏祖長官告

跋蕭御史殿試卷

跋宋運判昞奏藁

跋張忠獻公與外舅帖

跋義靈廟碑

題聶侁周臣所藏黃魯直送徐父宰餘干

詩集

跋江氏舊書

跋黃山谷書唐人詩

跋張芸叟劉滙詩

跋司馬文正公手抄富文忠公使北錄

題東坡上薛向樞密書

跋楊廷秀贈族人復字道卿詩

跋曾氏兄弟帖

題侍講呂希哲歲時襟記後

自題與黃談書尺

跋撫州鄔處詩

跋山谷草書太白詩

題戊午歲吉州舉人期集小錄

跋張如璧歸去來詞

跋王才臣十史論

書譚該樂府後

跋宋景晉曠手書佛經

題趙清獻公三帖

題楊廷秀新塗胡氏義方堂記後

跋東坡與張近帖

卷之四

大元帥康王與向子誣吞目及御筆等跋

跋朱元晦所作南城吳氏社倉記

跋山谷題橘洲圖記

題東坡晚年手帖

跋歐陽文忠公與張洞書

書馮頤自得集後

跋黃魯直帖

跋蔡君謨與唐詔帖

書歐陽真四世碑

跋富鄭公與李仲師帖

題所書劉辰告墓碑橫石

跋顏魯公書

跋張安國與弟伯子家書

跋山谷書文賦

跋柳公權赤箭帖

跋楊廷秀石人峰長篇

題嘉祐賀老人星見表批答

題趙清獻公帖

題癸丑謝何同叔送羊羔酒詩贈尹德鄰

跋蕭氏敦節堂詩

跋陳瓊書

題山谷書大戴禮踐阼篇

題鞠城銘

跋張子韶與陳朝彥序詞

跋養正堂記

題李彥平遺書後

跋曾無疑所藏二帖

題曾南夫集序

跋劉氏後隆堂詩

跋李伯紀青原詩

跋董體仁帖

跋蕭臺詩

卷之五

跋文與可草書李賀銅仙人辭漢歌

跋秦少章詩卷

跋秦少章雜文

跋向子諲遺書

跋蕭服劉遠唱和詩卷

廬帥靖康勛王跋語

跋東坡秧馬歌

跋吳伸所藏曾子固帖

跋尹焯帖

跋修禊帖

跋汪達所藏東坡字

跋趙弁雪圖

跋山谷與孫端帖

跋胡邦衡奏藁

跋張德遠與胡邦衡帖

跋陳少陽哀詞

跋包孝肅公帖

曾三異所藏盤松贊跋

跋魚計亭賦

跋梁仲謨尚書奏藁

跋黃通老尚書奏藁

跋楊无咎画秋蘭

卷之六

跋歐陽徹遺事

跋曾無疑所藏黃魯直晚年帖

跋何居仁與張斗南序

跋馮軫所藏五帖

題趙遜可文卷

跋楊廷秀對月飲酒辭

跋陸務觀送其子龍赴吉州司理詩

跋劉共甫胡邦衡帖

跋王獻之保母墓碑

丁酉歲恭和內宴御詩草跋

跋蘇黃門在筠州旋楞嚴標指

題文氏雙秀亭詩

跋韓忠獻范文正歐文忠與尹師魯帖

題范文正公帖

跋趙逢原得母詩卷

題平園圖後

題宋姓西園詩藁

卷之七

紹興淳熙兩朝內禪詔跋

紹興乙丑御筆跋

御筆千字文跋

御書禮記經解石刻跋

撰國書御筆跋

皇太子領臨安尹御筆并御批詔草跋

王炎除樞密使御筆跋

改左右丞相御筆并御批詔草錄跋

虞允文梁克家拜相御筆跋

幸學詔御筆跋

御書白居易詩跋

御書蘇軾和唐人惠山泉詩跋

御筆掌記跋

東宮秋雨詩跋

御批辭免兵部侍郎不允奏跋

內批辭免侍講不允奏跋

御批辭免兼太子詹事降詔不允奏跋

內批辭免經修太上日曆轉官不允奏跋

御批辭免內翰不允并詔書跋

御批丐祠不允奏并詔書跋

內批辭免幸秘書省轉官不允奏并詔書跋

跋

內批辭免春官翰苑不允奏并詔書跋

御批丐祠不允奏并詔書跋

內批辭免經修乾道日曆轉官不允奏跋

內批辭免東宮講禮記徹章轉官奏跋

內批辭免吏部尚書兼學士承旨兩奏跋

御批丐祠不允兩奏并詔書跋

御筆辭免吏書兼承旨兩奏跋

御批丐祠不允兩奏跋

淳熙癸卯生日御筆跋

卷之八

題後省封事看詳

題夜光集

題秦少游瑤池宴

淳熙跋詛楚文

家塾所刻六一先生墨蹟題跋十首

總跋自刻六一帖

題六一先生丁憂居頴帖

題六一先生九帖

題六一先生與王深甫帖

題六一先生五代史藁

跋六一先生詩文藁

題六一先生夜宿中書東閣詩

題六一先生家書紙背猪肉帖

題六一先生慰富文忠公書

題呂吉甫帖

跋十賢相帖

太父秦公考故耀州倡酬詩卷

題千祿書

題王荆公家書

題蘇文定公批答二藁

跋韓魏王與包孝肅公帖

題山谷書太白詩

題山谷書長楊賦

題初寮王左丞贈曾祖詩及竹林泉賦

題東坡與佛印元師二帖

題東坡于高無雲帖

題東坡遠遊養銘

又跋東坡遠遊養銘

題東坡元祐手錄

題五代應順年堂檢牒本

題李西臺和馬侯詩

題閣立本列帝圖

題司馬溫公書臨本

題蘇子美帖臨本

題修禊帖

題聳寒圖

再題劉子澄聳寒圖二絕句

題清虛居士真草四詩

跋龐莊敏公帖

卷之九

跋劉仲威蘭亭序

跋周德友所藏蘇養直詩帖

跋宋景文公墨蹟

跋劉子澄曾祖帖

柴翼秀才著書求跋語

題中書舍人趙莊叔字

跋宗室士會所書周以宗強賦

跋湖州沈壽岡之祖墓銘後錢藻撰

跋平江張漢卿推官華山就隱圖

跋羅貝弼家歐陽公唐草贊

跋宗室世懿與教授閻丘仲和帖

跋黃承議宗諤所藏文潞公劉莘老韓師

朴諸公題顏魯公懷素書

跋黃廉夷仲行狀

跋劉原父貢父家書

又跋原父貢父和仲馮帖

跋蘇子由和劉貢甫省上示座客詩

跋劉仲馮與斯立宣德帖

跋蕭御史薦宗室世懿奏狀藁

跋山谷發願文

跋王平甫所撰王職方墓表

跋宗室子提藏前輩帖

跋三蘇畫像贊

跋此卷記

題王龜齡石鏡溪詩碑後

跋劉季高與深陽筆工顧綱帖

跋黃魯直所書金剛經

跋上蓋長老了賢所收張丞相帖

跋西山翠崑寺南唐保大中賜僧無殷詔

書

跋余安道題名後

跋王民瞻詩

跋孫莘老告身

跋解繼善所藏柳書千文

跋安福令王棟所藏王介甫及其子溪之

沈之等帖

又跋歐蘇及諸貴公帖

跋大阜渡永興觀舊碑

跋趙德麟書

跋米元章書秦少游詞

跋黃丞相書

跋吳說千字文

跋張魏公批劉和州事因

跋虞丞相尺牘

跋張文潛帖

跋東坡與趙夢得帖

題故饒州府西溪居士蔣謨傳後

建炎御筆跋

跋曾無疑所藏米元章帖

又跋章友直回蟲

題鄭忠愍公驥遺事

跋劉楚公沆拜相告

跋朱新仲自誌墓

跋蔡敏肅公平戎慶捷詩卷

跋吳仁傑所藏張旭草書酒德頌

跋司馬溫公呂申公同除內翰告

跋宋景文唐史彙

卷之十

光堯御筆賜陳正彙白金三百兩跋

跋皇祐朝賢送張肅提刑詩卷

跋程宗正之子鑄墓銘

跋范元卿所藏醉翁帖

跋韓忠獻王帖

題金華喻葆光書佛經卷

跋宇文虛中篆書

同前

跋初寮先生帖

跋邵志完曾祖詩

跋開樂居士陳師錫與了翁陳瓊論王氏

目錄書

跋淨慧寺東坡題名

跋陳晞顏從古和簡齋陳去非詩

書簡修行狀後

跋趙善應行實

跋趙子崧詩集後

跋向子諲家邵康節戒子孫文

跋汪聖錫家藏東坡與林希論浙西賑濟

三帖

又跋徐鉉篆李衛公項王亭

又跋蘇舍人題臨蘭亭序詩

又跋黃魯直蜀中詩詞

又跋王禹玉內外制草

又跋王禹玉謝翰林學士承旨表本

又跋王禹玉立英宗為太子詔草友當日

請對奏彙

跋歐陽公與通判屯田等三帖

又跋黃魯直與全父醉帖

又跋王介甫彌勒偈

又跋黃魯直畫寢呈李公擇等四詩

又跋東坡帖

跋馮京與朱諤右丞家書

跋秦少游帖

跋彌明石鼎聯句圖

跋山谷萍鄉縣寶積禪寺記

跋東坡草烏頭方帖

跋山谷書東坡聖散子傳

跋陳簡齋法帖奏藁

跋鄧延所藏其祖溫伯與東坡唱和武昌

長篇

跋趙忠簡公答魏侍郎砭手書

跋唐相梁國忠公為吏部侍郎加勅告

跋趙霈張致遠魏砭奏劄

跋先大父秦國公所作涪州使君李昌年

墓誌銘

跋江權卿所藏諸家帖

跋陳與義贊蕭張擴被召省劄

跋陳從古梅詩

跋伯父與鄭庶手書

跋蘇石帖

跋與徐林書

題蘇子美草書蔡君謨大書跋帖

題唐人硬黃臨王獻之帖

題米芾馬賦

題蘇子美寶奎殿頌帖

題蔡君謨書柳子厚吐谷潭詞

跋趙湖州祠堂記

跋文潞公帖

跋汪季路所藏山谷與柳仲遠帖

跋汪季路所藏朱希真帖

跋張魏公與連塵帖

跋錢穆父與張文潛書

卷之十一

跋汪季路所藏張文潛與彥素帖

又跋季路所藏東坡作王中父哀詞

跋朝士送王校書通歸台州詩卷

跋范文正公五帖

跋喻子材構帖

跋劉器之帖

跋尤延之家藏蘇子美四時歌真蹟

跋喻仲遷所藏蘇黃門翰林詔草

跋蘇氏藏太宗御書及謝表

跋嚴汝翼所藏張丞相詩

跋東坡代張文定公上書

跋蔣穎叔樞府日記

題陳去非帖

題陳去非謝御書等帖

題彭仲衡家東坡書黃庭內景經石刻

題劉丞相沆拜相制

題劉丞相沆追封亮公制

題富鄭公與劉丞相沆書

跋臨江軍慶節婦碑

跋鄭景望詩卷

題宋景文家書

題宋元憲公表葉

題洪景廬所藏王摩詰山水

跋韓子蒼詩送劉童子歸廬陵

題向薌林家所藏山谷書南華玉篇

題汪達季路所藏墨蹟三軸

題蘇季真家所藏東坡墨蹟

題王樂道帖

題范太史家所藏帖

跋向氏邵康節手寫陶靖節詩

跋臨江守潘燾所收蔡君謨寫韓文三箴

跋彭惟孝永志堂記

跋呂居仁帖

跋臨江軍任詔盤園高風堂記

跋李次山書溪漁社圖

題周暹兄弟閣立本樂治圖

又題欵塞圖

題養正堂記并魯侯帖

跋倪求已所作鄒時飛行狀

跋王民瞻楊廷秀與安福彭雄飛詩

跋永和歐陽樗叟銘

記已酉杭州鄭樞密事

書張欽夫劉文潛煇與蔣邕州書

題與王洋手書

跋楊忠襄與鄉人羅錫詩帖

題郭知章告身後

書龔史傳後

題郭彥逢庚午解牒并易辨說

記李太白廬山詩

跋太和樂南金所藏樂史慈竹詩

題韓文公黃陵廟碑

卷之十二

跋楊愿與王伯芻詩

書韓忠獻王帖

題楊廷秀浩齋記

跋歐陽邦基勸戒別錄

書安福劉德禮家紫芝詩卷

豐城府君便山處士唱酬詩卷

題陸先生赴省詩卷

題山谷與韓子蒼帖

跋韓子蒼詩章

跋杜祁公詩

題胡邦衡講筵詩卷

題趙鑑堂快閣詩

題方季申所刻歐陽文忠公集古跋

書東坡宜興事

題權邦彥草書舞劍器行

題張無垢手書

題吉水宰陳臧孫邑計錄

題楊文卿芾詩卷

跋東坡帖

跋黃魯直與蕭氏書

跋南豐黃世成銘文

跋詩皇御批魏杞講和時奉使奏劄

跋劉忠肅丞相帖

跋三游詩

跋盛子謙座中銘

書杜孝恭所紀王宣功伐

題沈師傳碑

題向士伯所收溫公竚瞻堂額

題印山羅氏一經集

高宗御批錢伯言奏疏

題潭州道林寺六絕堂

先太師潭州益陽縣清修寺畱題記

跋劉提刑家帖

劉忠肅公辨誣本末

跋劉炳先家五賢帖

跋錢穆父

跋折彥質燕禱堂詩

益公題跋目錄

終

益公題跋卷之一

虞陵 周必大 撰

海虞 毛晉 訂

家藏御書

高宗御批陳思恭奏劄跋

建炎已酉七月高宗幸金陵平寇將軍范瓊跋尾
伏誅瓊為河北制置使時王彥聚兵大行黜其面
曰誓殺金賊不負趙王號八字軍瓊嘗統之至是
彥為御營使司統制以此軍歸彥又分瓊餘兵四
千七百人付神武軍統制陳思恭思恭本韓世忠
部曲是春苗劉反自平江從世忠勸王有勞既得
瓊兵遂乞衣甲御批依奏下有御押歲久敝紙臣
偶得之亟加池飾嘉泰甲子正月丙寅前史官周
某謹記

淳熙戊申國書跋

淳熙十五年十一月五日丙申遣中書舍人鄭喬

及武臣張時修充全國賀正使副明年

萬王祖儔等不能成禮而回二月二日

光宗受禪九月己巳儔等入見上深

國書徑納丞相收不必再奏禮物等

發付所屬亦不敢奏時從官尚謂不開陳常例使

副轉官嘉泰甲子重陽日

光宗御書跋

乾道壬辰春臣佐春官兼直翰林苑坐不草新除

兩簽樞答詔以外祠罷光宗在儲樞對官僚數惜

臣去淳熙乙未召還孝宗簡注方厚自兵部侍郎

遷兼端尹光宗實贊之陪侍六年凡御製御書或

面賜或簽名封送真行粲然室藏多矣遠戊申歲

獨在探路孝宗將內禪屢令留身討論典禮初儀

已酉春非使出門即擇日傳授偶聞太史局言二

月且太陽蝕九分臣密奏云太子聽政決旬不應

便禱之禮可少展否孝宗大以為然曰朕亦可以



富英遂定上旬壬戌吉因秦太子生于丁卯是日
天地德合猶陛下生于丁未而壬午歲受禪也退
不敢以語人至正月末春坊姜特立相過云宮中
人人知上元後舉典禮今悄然何也但遜謝云此
非外庭敢與聞特立不悅而退意間言或自此入
輔初政之二月內外相聒聒遂請罷政紹熙庚戌
起鎮鄉部避言官懇免明年三省擬鄭僑帥長沙
光宗曰周某前宰相合先除授乃知天心念舊非
我可度甲寅異位後數月臣亦謝事君臣契合固
豈偶然比敬哀高宗孝宗御書一一大者刻石附
以光宗翰墨各爲之跋恭念紹興庚辰孝宗封真
王三皇子共置小學教授一負專差館職選較書
郎王十朋充項之十朋輪對力攻楊存中又在王
邸議賓主禮異同十二月壬子選小解兼職徒越
之宗丞而去館職多闕臣任正字爲之首宰執不
欲自下越進他人特降口口云今後王府小學教

授闕館職學官通差殆爲臣設明日遂用國子博
士劉藻丙辰擢藻祠部郎中當解教授而不解新
制墨未乾也是則光宗就傳臣不得一至講堂詎
知六年居唐省乎敬書以示子孫使知被遇三朝
本末如此爲臣不易雖幸也免于大戾歸美報上
老矣無能爲也抑詩有之倬彼雲漢爲章于天言
天子爲法于天下也又曰追琢其章金玉其相言
萬民觀而樂之也臣之志願不在茲乎嘉泰四年
二月旦

家藏法帖書画碑刻

題山谷和郭內翰長篇

郭公諱知章字明叔吉州龍泉人事哲宗爲臺諫
從官徽宗朝歷刑部尚書翰林學士師太原尹開
國史有傳予少時見友人羅良弼云郭明叔乃薄
陶淵明心頗疑之後得公文集見元豐間宰分寧
贈黃太史長歌其末云功名時來亦自然跨風絕

海非爲難肯學陶潛歸去來虛名浪得傳人寰然
後知其壯年志在功名屈臨一邑不忍學淵明棄
印綬而去庶幾善學柳下惠者耶太史此詩卽當
時和篇亦知其銳意從仕故從史之尋果用鄭雍
顧臨薦擢爲御史身冠言路之句驗矣

自題寫真

此淳熙庚子子記顏也時年五十有五觀者以爲
酷似七兄贊之今十五年矣髮白面皺殆如他人
所謂君顏老可憎特未知常住性依然否如魚飲
水冷煖自知紹興甲寅十二月十日子充題

題薛元亮老杜醉歸圖詩後

薛元亮名士宋臨川佳士紹興間從許子禮李西
美諸公游此詩乃其鄉人梁世昌名光遠錄以示
予慶元丙辰六月八日某題

題六一先生手書後

右熙寧間文忠公與趙彥若元老帖江端友跋云

先祖非戲言蓋往時風法華至人家見筆便書初
無倫理公友江隣幾舍人亦以公見筆輒書戲比
風僧此說載公文集試筆門端友卽隣幾孫也慶
元五年二月癸未周某題

題蔡君謨草帖

慶元己未仲冬餘干徐君未赴安福宰攜此相示
謂是君謨真蹟參以後帖又似他人作不能定也
因命筆吏臨本真秀岩平圖老叟周某記

題唐人臨王子敬帖

王子敬異文帖杜氏所藏云其祖正獻公併蕭楚
公華陽帖得於蕭氏之裔孫相傳唐人臨本或者
楚公所臨耶

題吳說書

此詩乃吳說傳朋書而劉季高用名字及杆山三
印意其愛而蓄之爾嘉泰二年八月二十四日平
圖老叟周某題

題蕭楚公帖

蕭楚公自負奇節未嘗以書名而字畫亦甚可觀
蓋唐世風俗其雅尚如此嗚呼士大夫風俗根本
其所當勉者何獨此一藝哉

跋王獻之係母墳志

右嘉泰癸亥越人掘地得古碑乃晉興寧三年乙
丑歲王獻之係母李意如墳志也云善為文能草
書王謝奴婢定小異耳又有小碑背刻王獻之永
和五字二者以致行都別鑄此本四明樓尚書繪
摹以相示字畫固妙其辭則有望于八百餘年後
守官之人自興寧距今適八百三十餘年預知如
此蓋當時卜地如此蓋當時郭璞輩固不乏也五
月二十八日記

題米禮部參星賦真蹟

右米禮部參星賦筠州集本以為首篇其間意同
辭異者多具列如上今祕閣有石刻字畫稍大此

卷收敘豪逸秀傑痛快尤可愛重紙背題詩一聯
不敢慢也嘉泰癸亥秋池州故人文思提轄葉楠
之子之真自所居鉄團山附題壽于其意厚矣乃
標軸而識之七月望日平園老叟周某書

題孫氏四皓圖

嘉泰癸亥池州故人于葉之真既以米元章參星
賦真蹟為子壽又寄四皓像絹僅盈尺前有印文
云孫汝節筆而之真以為孫顯節不知何時人蓋
名画也上有蘇文忠贊元祐三年二月楊次公書
東坡諸集皆無之因記乾道庚寅閏二月過京口
遊金山妙高臺壁間有東坡族伯成都中和院僧
表祥繪公像公自贊云目若新生之犢心如不繫
之舟要問平生功業黃州惠州崖州其為暮年所
作無疑諸集亦不收乃知平生游戲翰墨散落何
限如去黃日戲贈李琪詩偶見于李遵春清紀聞
之類是也八月壬戌平園老叟周某書

題祖妣秦國潘夫人書

右靖國元年辛巳祖妣秦國潘夫人從祖父初任忻州司法時與鄭州叔祖母姚氏書夫人富文忠公弥孫其云奉文乃運使金紫及奉使太師小字後批三管散一行金紫年十四代爲常記祖母張秦國道祖父之言舊小吏事上官極恭太守禮上法曹與他椽窄衰捧按此書亦云起五更每日兩衙極邊小壘事體尚爾況藩府乎今儀門外雖有州縣官于此下馬牌然皆肩輿直造客位初到畧展衙禮遠不過三日近則是日亟免併記此以示後人嘉泰三年十月旦立石

題樂毅論

右夏侯秦初樂毅論以世傳兩石本校正與史記本注時時異同歐陽引文選所載今無之不可曉也嘉泰甲子三月乙亥周某記

雜題跋

右吏部郎新安朱公喬年家藏王荆公進鄴侯遺事奏稿一通與集中所載增損不同未知孰是定本公之子元晦爲某言先君子少喜學荆公書多儲真蹟惟此紙有跨越古今開闢宇宙之氣將屬江西常平使者汪季路刻石臨川仍鈔日錄奏對家傳本語附其後幸爲我知之某亦竊怪字公黑黧蘇綽能以區區西魏置府兵強其國及熙寧全盛之時欲制上番義勇則反以爲疑獨何歎蓋東西魏之分孝文立都關中僅有隴右河西之地風俗尚武兵農未判用新造之偏方行一切之號令故爲力也易今以百年無事萬里之中國一旦將復古制兵重于括而欲詢謀僉同革習俗之已安故爲力也難昔者堯舜三代雖曰明道制衆然美成在久立政造事亦非一時所能備彼西魏享國不長降周迄隋濟以唐太宗之英明方觀成效荆公因聖語而謂其施有漸蓋知此矣厥後謝昭文

表復云苟貪歲月趣就消埃是又知時難得而易失耶故詳論之使後之君子得以考焉紹熙五年二月

跋汪聖錫與武義宰趙醇手書

玉山汪公名重天下人得尺牘榮之今觀此帖則于舊僚趙令傾倒至矣其人亦可推也公中年嘗苦目疾頗憚親染虞丞相雅善公公帥蜀時因占吏答書遂稍相失公爲予言如此其後數與予通問皆季路代作當時翰墨已難得況今日乎況後世乎紹熙五年四月旦周某題

跋東坡桂酒頌

東坡自海南歸文章翰墨所謂毫髮無遺恨波瀾獨老成者桂酒頌其一也今閩浙川本皆以心服爲心腹御瘴爲禦瘴補安五藏爲五神殆隨手有所跋定耶紹熙五年四月五日故人徐息叔赴曲江幕官攜以相示敬題其後他日或呈似韓使君

刻石真九成臺銘之側亦奇事也周某子充甫

跋德化縣陳氏義門碑

胡周父史筆文華著聲三朝義門碑甚有古風中經兵火得賢宰呂仁甫表而出之又可傳遠予恐石本頗艱爲刻板付陳氏裔孫兼善使攜以歸凡族人皆當遺之一本惟其有之是以似之尚其勉旃高山仰止景行行止予亦庶幾焉銘以居官爲若官疑後來碑誤紹熙五年十七日

題吉州司戶趙彥法所藏山谷帖

紹聖元年甲戌夏山谷得郡武昌未赴坐蔡卞奏乞疏問前修神錄詆誣事改授臺祠卽開封府界七月至陳留寓東寺之淨土院院有深明閣書此二詩贈表姪李繩武翰墨燁然炤人時年五十是臘貶黔州後一百年紹熙五年甲寅八月旦周某敬觀

題汪季路所藏書畫四軸

右汪季路所藏歐陽文忠公在政府與蔡忠惠公
兩帖其一蔡公視題十字蓋嘉祐八年八月自翰
林學士右諫議權三司轉給事中正除三司使時
也其一稱端明侍郎則後二年當治平乙巳二月
解三司除端明殿學士轉禮部侍郎出守杭州時
也李嗣乃尚書都省令史見文忠公祭石曼卿文
殆亦忠惠故吏耶後人但謂二帖有遺剔往復之
語後又適題二十六二十九日遂以爲先後之序
宣正之紹熙五年九月旦周某書

右高學士家樂毅論歐陽文忠公集古錄跋云碑
石燬于回祿而尤延之謂無錫徐氏蓄此碑煇缺
已甚得非後人摹刻者耶乾道己丑同年楊志道
又以文忠所藏刻之金陵其失愈多茲乃天錫楊
氏舊物近世士大夫家絕無而僅有也紹熙五年
九月旦周某書

蔡忠惠公大字端重沈著宜爲本朝法書第一紹

熙五年九月十二日

吳画在唐已有妙絕動官牆之稱況數百年後乎
哉或謂線帛久則飛揚須良匠乃能補葺今赫曉
如新何也然滄浪東坡翰墨在前後來名勝賦語
盈軸可謂珍玩矣

跋劉賓之浩然集

故人李盛祖文力學能文辭然猶介少許可嘗著
章貢志都有大家事實嘗書而丐婉其詞者正色
拒之坐是獲怨謗弗恤也獨爲門人劉君所作沈
刻極道其孝于事親與人交重氣槩不幸嘗于壽
一子江童非巽然期有以立已而遂與計偕念君
之不及見也哀平生所爲古律詩五十篇求上郎
尚書謝公昌國序而傳之觀此可以知吾祖文非
諛墓者矣紹熙甲寅十月甲辰

跋何居仁自作墓志

故修職郎臨江何安宅字居仁長于十六歲紹興

辛未同上南宮是春朝廷待陳公景明使還知舉試期特緩四方舉子知秦丞相以言語罪人會于逆旅不敢及時事獨居仁學廣文多泛論古今來聽者惟恐後如司馬長卿之傾吐也已而高談闊論頗為鄉較之議其去者亦惟恐後又如列侯陳遵之驚坐也今四十有四年追思如昨日事遵其子鄉貢進士挺出示居仁自作墓文太息書其後
紹熙甲寅閏十月

題空春李椿詩卷

始余自湖南歸江西以紹熙甲寅正月三日過空春得郡人李椿永年詩書各一通知其種學積文非一日也屬客眾且余亟行不及款冬十一月十有三日李君復書寫詠古詩三百篇攜以相訪蓋平時玩味經史遇古人窮達利害成敗得失有會于心者各為數運以紀之議論折衷往往出人意料表彼胡曾絕句未足道也求余識其後老諱荒廢

莫能措辭回思少年間有是作姑錄一二為答夫投我以礪珠報君以魚目貴賤固殊矣相載而往垂棄而歸得無為鄉人所笑乎

題曾伯震所得子中兄二絕

子中兄自數歲已能詩稍長凡古人篇章無不窮極根源採擷菁華中年以後深味禪悅雖遇典間有賦詠要非所好也三十年前嘗以一二寄余今詩人陸務觀一見謂句法入律無愧古人識者以為名言曾君伯震得此二絕句可以自信不疑也
進此道矣慶元乙卯二月十二日

題李玠叔詩文

李公諱孝先字玠叔元祐元年賀范忠宣入西府啟草如右又嘗有詩題餘干縣干越亭云吳越猶干地要衝樹亭危岸勢憑空春潭倒影黃昏月古木喧聲白晝風鷗鷺慣來窺燕席煙雲無著蘆簾纓淒涼故國多遷變獨有溪山在望中誦此詩觀

此啟則公文行空爲忠宣所知惜乎忠宣大用之
明年公遽謝世又明年而忠宣遂相不及引類當
時惜之雖然豐積膏取後世將昌豈必在其身耶
虞部乃元豐以前官稱至元祐則當易朝奉郎因孫
奉新宰兼遠示遺墨爲詳記之慶元乙卯二月五
日周某子充

題陳誠之遠明樓記

陳君誠之示遠明樓記而請曰空秋空春山各誠
齋已各言之起居飲食與四時之景接賢兄之論
則然巧公補其說予曰夏空急雨有瀑布聲冬空
密雪有碎玉聲如此則四時備矣誠之曰樓覆以
瓦似非所空予曰六月捲簾森映山之銀竹同雲
垂野從玉帶以萬妃憑欄送目空乎不空誠之謝
曰空哉慶元乙卯三月十二日

跋百醉夫趙士墩詩卷

味百醉之名誦三篇之詩公蓋師友陶靖節者晁

景遷乃謂得句法于江西殆由禁錮初開詩社勃
興人以著錄爲寵故一時之言如此若李雲龕陳
簡齋汪龍谿跋語則不易之論也慶元乙卯四月
十六日

題劉昌詩母墓志

唐人欲銘其先世必得韓雲卿之文李陽冰之篆
擇木八分書乃稱三絕今劉君昌詩有賢母之沒
也鄉人徐思叔爲誌謝昌國題額而趙從善書之
蓋庶幾焉慶元乙卯六月八日周某題

題謝昌國與朱陸書

尚書謝昌國稱嚴陵朱君陸公廉勤敏元樞黃德
潤從而實之蓋嘗任左藏西庫監官上戊申大祀
會計冊知諸路郊祀之貢區處得空入可支出且
有贏焉其居官不苟類此秩滿格當擢用以未脫
選階一轉而爲撫州空廣宰尚有可諉曰大邑也
今再轉乃爲英之合光是特瘴鄉三家鄉耳何其

愈下耶君曰某歷十二考為王官者為壯縣尚關
職司之事良由中朝近地英俊所聚無有取知于
人故欲求諸遠爾予曰雖處囊則鋒必露鶴群雞
則潔易知通籍審官其在此行乎充子之公廉勤
敏可也慶元乙卯六月十日周某題

跋蕭唐叟時菴記

蕭君唐叟嘗示予易說矣今復以時名菴而求空
春歐陽永年為之記謝公昌國楊公廷秀為之跋
而丐予一言夫艮止也其象乃曰時止則止時行
則行君既有得于此予固無以伸其喙雖然剛柔
者立本者也所以況卦總主一時之事也變通者
趣時者也所以況爻就一時之中而趣其所宜之
時焉是道也豈特艮而已自乾至未濟諸卦皆然
夫惟君子而時中然後動靜不失其時其道光明
君其勉之慶元乙卯六月十八日周某題

題顏魯公書撰杜濟神道碑

右顏魯公書撰杜濟神道碑沈著端重真可入木
八分友人曾三異無疑寶藏之按六一先生集古
跋謂殘缺不能成文今乃粲然可讀得非摹拓有
先後耶濟蓋魯公友婿故又誌其墓六一先生亦
有跋云顏撰而不云書筆法非魯公不能為世顏
以為非顏書更俟識者辨之今考魯公文集大抵
碑詳而誌畧亦微有異同如碑以濟祖仕明堂丞
誌則云令碑以濟為惠第二子誌作第三又碑與
誌並歷渭南宰而文集于碑中乃以為尉皆傳寫
之誤當以此碑為正慶元乙卯六月二十日周某
書

跋金給事彥亨文集

某幼學之年已聞熙欽金公彥亨為名御史論擊
權強無所避紹興戊午春以母憂去朝服闋秦丞
相抑而弗用凡二十年當己卯歲高宗以宗正少
卿召還歷禮部侍郎給事中壬午六月壽皇初卽

位眷待良厚是秋某以起居郎兼中書舍人同在後省見公直諒多聞年高而德邵每與從官款其不可及吏部徐侍郎度因爲某言政和宣和後生少讀史一日沈狀元晦以博學至京師東南士子翕然宗之來者滿門聞舉古事莫不踈聽惟公在下坐數搖其首鄉人問故則云某事非也退而考按信然蓋公于史傳皆能默記叩之往往成誦迄今不以史書自隨其學問可知矣此某聞而知之者也若夫事上不欺聞義則從某所親見又有可紀者宜表而出之九月己未某兼西掖之二日有旨婉容翟氏進封本位官吏竝合推恩內礙正法人特與轉行卽壽成皇太后也時給舍例同銜繳進某密語公妃嬪位非中官卽醫流皆碍正法前德壽推江上扈從賞今上覃恩竝不轉行止令回授似當論奏公歎曰君言是也近夏賢妃位推恩某實未曉已書牘行下今恐相戾君自繳奏可也

某曰若爾尚可商量庚申講筵公與某皆以職事先後畱身初不知公奏何事某侍班廷下望見公再拜殿上公退而某升甫至榻前上迎勞云朕初止謂卿能文適金按節說卿欲論婉容位轉行碍正法事不謂卿剛方如此可便進文字來方悟公自引前事以爲失也章既上御批十三字云依奏夏妃位官吏亦依條回授後三十四年公之孫承直耶鑄錢司檢踏官麓持公文彙二篇求予一言因題其後非獨著公盛德補家傳之闕亦以彰壽皇從諫如轉圜他日史氏或有考焉至于文辭典雅如其爲人識者自知何待贊也慶元元年九月日具位臣周某謹書

跋范丞相覺民謝罷政表藁

庚戌夏五月高宗行在會稽高平公自參知政事拜右相年三十有一明年改元紹興秋七月坐討論事罷政奉祠故謝章有惜名器裁荷得之語汪

翰林草制猶引敬王如孟子選衆舉臯陶可以知其無他矣本朝惟王溥初相時年三十二然其除拜乃在周朝非公比也未強仕而薨不及再用迄展經綸之蘊惜哉慶元元年十月二十八日前進士周某題

又題范覺民與諸人唱和詩

取伯順韓子蒼范元長李西美李得升謝任伯宣和以來文人才士也高平公或同侍從于靖康之朝嘗引類于南渡之後觀此詩軸唱妍酬麗三歎而有遺音矣慶元元年十月二十八日前進士周某題

跋張忠獻公答宋待制手書

右張忠獻公紹興九年秋起鎮長樂答徽猷閣待制宋公景晉手書一幅不過數十字而公私故曲舊情意備焉宋公會孫文成謀刻之石初李伯紀為靖康執政景晉以待從充發運使徽宗南幸時

皆有調護歸京闕之勞其後伯紀帥洪宋為寓公此其所以眷眷也慶元乙卯十一月三日周某題

題張右丞如瑩奏疏

澹岩張公以文章才畧被遇高宗越卽位之三年自獨拜尚書右丞適值苗劉反逆豫政兩月而去平生奏議號為通達國體嘗紹興五年春虜兵初遁高宗用趙忠簡公奏詔宰執條具善後之計公上疏五六千言援古證今事事皆有規畫向使久在政地盡行其言何患不為名宰惜哉慶元乙卯十一月二十一日前進士周某題

跋六一先生跋杜濟神道碑

右六一先生跋唐杜濟神道碑蓋集古第四百五卷也今吉水縣鄉貢進士曾三異有此碑而未殘缺其文可讀得非嘉祐以前舊本歟慶元丙辰周某為皇諸孫彥法題

跋獨孤延壽碑

唐歐陽褚薛皆以書名此碑精勁可愛不知出于誰手趙明誠金石錄之第五百九十五謂無書撰人姓名今其前乃題于志寧製文又謂君諱某字延壽名殘缺不可辨今熟視之名左從言右亦彷彿可尋至于隋唐間多以字行則歐陽文忠公跋顏勒禮神道碑論之矣友人曾無愧持此相示爲題其後慶元丙辰正月癸卯平園老叟周某題

益公題跋卷之一 終

益公題跋 卷二

省齋題跋卷之二

跋後漢蔡常侍碑



右後漢蔡常侍碑歐陽文忠公已有跋今其文幸可讀以永壽四年二月卒是年六月改元延熹八月丁酉制誥湖陽長劉操追授騎都尉印綬至二年十一月其子勒文碑石俾不失墜而趙明誠金石錄乃以爲元年八月蓋因贈官而不考立碑在後也慶元丙辰正月癸卯平園老叟周某書而歸之曾氏

跋歐陽公堯祠碑跋

堯祠碑在集古錄爲第七百九十一卷左氏傳云巡祥屏攝正義謂東茅爲之國語云屏攝之位注以屏爲屏風攝如翼扇二義雖殊其指主人祭祠之所則一也今跋以攝爲攝或疑其誤豈得漢碑亦以爲攝豈古今傳寫不同邪事神之際當屏息攝伏以致其恭或爲屏蔽之屏攝以威儀之攝也

廬陵祠曹趙彥法示此跋敬題其下為輕改古書者之戒慶元丙辰正月癸卯周某題

題楊謹仲芍藥詩後

淳熙甲午奉祠廬陵三月十七日會同年楊謹仲

周孟寬賞芍藥嘗櫻桃謹仲有詩予次韻云清晨

自掃落花廳小甕新篔竹葉青簪盃莫辭過陋巷

臚傳相與記彤庭階翻紅藥曾重見僕兩直西掖 敕賜

朱櫻亦屢經老去飄零無此夢詩來吟詠有餘馨

今二十有三年二公墓木已拱因彭君仲識攜謹

仲帖相過且索舊詩為之悵然此花最盛于太和

而以紅都勝黃樓子為冠如牡丹之姚魏也黃樓

或得之都勝者邑中一二家有種惜不與人去年

子答鄉貢進士陳恂二小詩云芍藥名先記鄭風

那因加木辨雌雄姚黃後出今王矣合把黃樓列

上公韓魏王以芍藥花為花后六一先生舊帥楊分寧太史尹

西昌只緣未識紅都勝如杜詩中缺海棠蓋許元

寄歐陽公詩云芍藥瓊花應有限維揚新什獨無名公答云偶不題詩便怨人山谷宰太和時篇詠甚多未嘗及此花今謹仲云花出語與古事相類併錄惡語于後慶元丙辰正月戊申日周某書

跋胡忠簡公和王行簡詩

予嘗評胡忠簡公詩有不可及者三用事博而精

下語豪而工一也士子投獻必用韻酬答雖百韻

亦然蓋愈工二也此篇和王君行簡時年七十五

長歌小楷與四五十人無異三也行簡世家臨川

志大而瞻於文久從公游其人亦可知矣慶元丙

辰四月七日

題羅起宗廟食碑

紹興二十二年秋贛兵環攻南安以石壓卵未足

喻其危稅官羅君起宗獨冒白刃三人賊壘說之

使去城賴以全當時雖不與賞今乃附享神祠夫

人爵不過顯一時廟食自當傳百世羅君可以無

憾而其子孫亦足以自慰矣慶元二年四月十一日

跋王民瞻送胡邦衡南遷詩

有澹菴歷高岱排淮泗之舉然後可以發盧谿穿天心透月脇之詩不如是不稱二絕澹菴授之從弟廉夫鏐廉夫復授其子渙所謂文獻相承衣鉢軍傳者若能刻石人授之本則法周沙界矣丙辰四月十四日

題京仲遠與周孟覺帖

孟覺與子同宗同郡同年者子忝從班每有哀窮悼屈之心而未嘗效拔茅連茹之力孰知其子乃能于三十年後持相國帖自歸于光範乎愧歎而書卷尾其時日則誠齋題字之信宿也慶元丙辰四月二十三日

御書樂毅論跋

臣伏讀高宗皇帝翰墨志云魏晉以來筆法無不

臨摹又云每得右軍之書手之不置初若食蜜少甘則已味橄欖真味久愈在也故尤忘于手紹興三四年間嘗臨羲之所書樂毅論以賜樞臣韓公肖之謂世傳高氏石本間節三十餘字得非御府別藏真蹟自不同耶後六十有三年樞臣之孫前韶州守臣亞卿示臣使記歲月恭惟龍鸞飛動衆所共窺天日清明臣何敢繪慶元丙辰四月二十八日具位臣周某謹再拜稽首書其後

題呂獻可墓誌

呂公獻可以熙寧四年五月卒八月葬時王荆公正在相位司馬文正公誌銘不斥其名不沒其實荆公見之亦無所發其怒前謂樞密副使者陳丞相賜叔也方以憂去牽聯潛其姓名可謂深得史法矣是時太僕卿劉仲通自請書丹而命其子忠定公秉筆斯文一出其誰不知邵伯溫乃謂仲通初雖有請見文復遲回不敢器之代父書之仲通

又勸呂氏諸子勿摸本恐非三家之福按國史仲通剛方人也押伴夏人折正其章服奉使却乘常寶貨歸論不宜輕用兵因早條新政不便者五事又上書論人主不可輕失天下心是豈徇時畏禍者哉設前却之而器之亦安得強其父而陷之罪也大抵邵氏聞見錄頗多荒唐凡所書人及其歲月鮮不差誤因是畧為之辨此碑當日號三絕謂其人與文及書也真蹟之藏名相劉忠肅公元孫無欲家嘗以示忠定公會孫孝昌孝昌念祖之心切將傳之副墨而力不足會湖南部使者吳仲權鑑助其費久之乃能成是可以傳遠慶元丙辰五月九日具位臣周某某謹識

跋張元幹送胡邦衡詞

長樂張元幹字仲宗在政和宣和間已有能樂府聲今傳于世號蘆川集凡百六十篇以賀新郎二篇為首其前遺李伯紀丞相其後即此詞送客貶

新州而以賀新郎為題意其若曰失位不足弔得名為可賀也慶元丙辰五月十三日題

題蔡忠惠公帖

某之先君秦國公平生喜學蔡忠惠公書家藏京師舊石刻兩卷真行草畢備妙絕一世乾道間公會孫戶部尚書沈來守廬陵摹寫即齋雖傳寫失真而典刑故在今公元孫戶部侍郎撤出豫章復刻公遺墨俾某記其歲月恭惟高宗皇帝天縱游藝嘗評公書為本朝諸臣之冠且有入格律度騁之褒天監在上誰敢措辭惟公嘗仁廟天聖八年擢進士甲科名在第十後百三十七年歲在丙戌孝宗龍飛策士侍郎復踐世科名次若合符節詩云惟其有之是以似之慶元二年五月二十二日

題陳忠肅公尊堯集稿

陳忠肅公以元符庚辰入諫省力論蔡京姦邪弟

卞妄引王安石日錄詆誣神廟未幾出守無爲軍
明年改元靖國入爲都司上書責會布併及私史
事復出海陵又明年當崇寧壬午貶徙廉州此葉
董當時筆也書成名曰合浦尊堯集繼爲四明尊
堯集其詆蔡氏愈力不啻數萬言厥後果有靖康
之亂公可謂忠也已矣可謂明也已矣其蹟在公
塔前衡陽太守蕭君德家衡州之孫必得攜以
相示因爲記其歲月仍錄國史本傳使併藏之慶
元二年五月二十八日

跋歐陽文忠公誨學帖

歐陽文忠公年二十有三以五不琢不成器賦性
國子監其後十六年而次于變生變字仲純胡文
恭壻性惻儒文章豪放尤長于詩多至于三百篇
公以其質敏故書此以屬其學惜乎得年纔三十
四位不及美顯然熙寧末鄭俠得罪凡通問者皆
獲譴仲純獨傾資送之其大節如此可謂不墜先

訓非學力乎帖已刻而真跡今藏郡人胡祗家祗
字仲本佳士也慶元丙辰六月庚戌

跋徐夫人所書華嚴經梁武懺

鬱林蔡侯子羽故母徐氏三衛人宣和間刑部侍
郎諱敷言之女潛心內典學虞世南書嘗手寫華
嚴經梁武懺皆終部帙所謂女人身得度者其子
將藏是書于名山求予一言予謂夫人爲善如此
郝氏之業在所不論二經果報寧復唐捐華嚴經
云南方國有長者妻名曰善慧見佛神力心生覺
悟法華經云比丘尼憍曇毗得佛授記後各光相
如來予知夫人此念不斷盡未來世豈止資其冥
福而已慶元丙辰六月丙寅

跋胡忠簡公論和議藁

紹興戊午胡忠簡公三十有七以樞密院編修官
上書論和議此其藁也時長子方生未幾南遷公
知禍巨測惟從姪昌齡字長彥賢而可託故以藁

屬之今五十餘年矣昔魯公與魚朝恩論坐位帖
藥摹本已數百載人爭傳寶公之所論豈止坐位
而其心畫端勁實法魯公自當竝傳于百世慶元
丙辰六月

題羅煒詩藁

友人永豐羅永年長子煒天才雋敏而苦于學遂
至隕生子請其詩藁而悲之永年求子一言昔人
謂詩能窮人或謂非止窮人有時而殺人蓋彫琢
肝腸已乖衛生之術嘲弄萬象亦豈造物之所樂
哉唐李賀本朝邢居實之不壽始以此也今于羅
氏子猶信慶元丙辰八月六日平園老叟周某書

跋焦伯強與潘簡夫帖

歐陽文忠公贈焦伯強詩云焦生獨立士勢利不
可恐又云皎皎寒泉冰其清正如此余哀文忠公
集于書簡得公與伯強帖凡十有六意愛之厚期
待之遠情見乎詞觀伯強遺承嘉潘簡夫十六帖

淵源蓋有自矣簡夫諱約後為伯強壻三子文饒
字民則文孝字少穎紹興間相繼擢第文虎字叔
虎亦嘗魁薦鄉評推焉少穎之子檜今為臨江軍
職官奉檄至廬陵出示此軸為題其後慶元丙辰
中秋平園老叟周某

跋呂伯恭日記

黃太史晚謫空州自崇寧四年歲旦凡風雨寒暑
親舊往復以至日用飲食之類皆繫日書之名曰
乙酉家成止八月晦九月則易資矣呂太史抱病
東陽亦有日記起淳熙庚子春盡辛丑七月壬寅
其明日遂卒蓋絕筆也方病時出入起居雖不遠
山谷而編大事首周敬王修讀書記自唐無衣夜
致課程所謂造次顛沛必於是者兩賢相去七十
餘載何其相似也意長日月短悲夫慶元二年八
月二十六日

跋廖中精紀

天錫九疇一曰五行凡天地人有形則有數有數則囿于五行是善卜筮者預能測知人居其間又顯可推者傳不云乎死生由命富貴在天豈術者之臆說哉春秋戰國前善相者多若推祿命則盛于漢賈誼譏司馬季主曰高人祿命以悅人心矯言禍福以規人財後世又可知已今士大夫野老人人喜于談命故其書滿天下清江鄉貢進士廖中伯禮連舉未第乃刻意于此會粹類十家之說章分件析考驗得失較量深淺成精紀三卷擴以示予謂五行所寓有常焉有變焉常易推也變難推也理也自非心通意悟不足以盡此故稱善其事者莫如李虛中萬端千緒參錯重出學者就傳其法初若可取卒然失之茲豈易哉廖君歸矣苟因書悟理則將如由基之射百發而百中不然讀齊侯之糟粕其否未可知也

題謝昌國式華堂記

益公題跋 卷二

淳熙甲辰今太皇太后慶七十于德壽宮推恩四海盛陵進士歐陽鉞字仲授以高年賜初品服予碩取訓詞式華其老之言揭名于堂工部謝尚書謬實爲之記歲星一厠當慶元丙辰十月三日今皇帝奏上壽聖隆慈備福光祐太皇太后冊寶于慈福宮聖算八十有二矣於萬斯年慶典未央鉞也又將拜增秩之寵再新斯堂以延賓客其有日矣是月壬戌平園老叟周某書

題廬山西林道場碑

右隋廬山西林道場碑文歐陽率更撰而不云何人書要當出于一手昔唐草綱錄劉禹錫嘉話載率更行見索靖所書碑下馬布毯坐觀三宿而後去又云率更不擇紙筆皆能如志惟其好古如前說之勤是以肆律無不臻妙理當然矣三門銘遺姓名亦名筆也慶元丙辰十一月已卯平園老叟周某書

題裴晉公撰李西平神道碑

右裴晉公撰李西平神道碑以較江浙間唐文粹本大率傳寫膠謬且經改易不能編舉姑言其甚者乾元初立功成都邦人咸服具以狀文而諸本盡作具狀以聞何俗弱也乘庸經如通道殆有二義當謂士卒買勇升高步險如履平不然以而為如猶春秋書星隕如雨也今泉本直改作而通道或增一字為軌道於是下句垂桑鏡而清宮亦添一禁字按周禮秋官蒼筤氏掌覆天易之巢鄭氏讀如禮碑蓋用此替字而諸本盡改為磔尤更淺陋古書日壞俗本日多此予所以撫卷三歎也慶元丙辰十一月巳卯

題歐陽文忠公跋賽陽山文

大和九年賽陽山文在集古錄第五百四十三卷自唐乙卯歲至本朝嘉祐巳卯六賢同觀時蓋二百二十五年又至熙寧辛亥一紀之間文忠公已

有存亡今昔之數後百一十五年為淳熙乙巳而亡友劉子澄記之今十三年子澄墓樹森然矣重可歎也慶元丙辰十一月乙酉平圃老史周某書而歸之劉氏

跋歐陽文忠公與裴如晦帖

右歐陽文忠公與裴如晦名燧慶曆六年魁南省擢乙科嘉祐末以祕閣較理守澗州此公當時答書公文集書簡門先有嘉祐五年一帖而集古錄前漢馬足銘跋亦載如晦與公別幅至治平四年如晦以集賢較理判三司戶部勾院卒此帖藏紫微朱公家作跋在隆興二年後三十三年朱公之子軫字叔止攜以相示既刻付文忠公集又為記其大畧慶元丙辰十一月五日

題張志寧所藏東坡画

蘇文忠詩云空腸得酒芒角出肝肺槎牙生竹石森然欲作不可留寫向君家雲色壁英氣自然乃

可貴重五日一石豈知此耶慶元二年十二月一日

跋老泉所作楊少卿墓文

同年臨江楊謹仲諱愿往爲廬陵郡博士嘗爲予言乃祖中大夫諱申在京師從老泉蘇公明允乞會祖光祿少卿諱克從墓文又得王廣淵書丹時君卿篆額今有石本畱先塋頗恨未之見也謹仲下世之十三年其長孫光祖始軸以求跋予生晚不知中大夫何如人然碑成于嘉祐七年秋而刻于英宗治平之初先是時蘇名震京師廣淵直集賢院爲郡牧三司判官君卿自藩邸以藝文被幸由奉禮部換內殿承制三人雖不同同爲當時所貴非中大夫好學而篤志則其文其書豈易得哉韓退之謂唐人欲銘其先必得三絕予謂楊氏此碑非三難乎厥後謹仲旣以學行爲鄉先生今諸孫又表而出之不隕其業將無愧于老泉之辭矣

慶元二年十二月二十一日

跋宋待制張寧軒自述詩

右徽猷閣待制宋公詩藁四十一篇皆紹興間寓鍾陵時投贈帥漕及與當時名勝唱酬也嗣孫文林郎江陵府觀察推官文成將伐石刻實家塾屬某一言惟本朝承五季之後詩人猶有唐末之遺風也迨楊文公錢文僊到中山諸賢繼出一變而爲崑體未幾宋元憲景文公兄弟又以學問文章別成一家藻禮而歸之雅正學者宗之號爲二宋公蓋元憲曾孫字景晉名載詩序中東坡先生詩云吾觀二宋文字字炤繅素淵源皆有考奇險或難句後來邈無繼嗣子其殆庶此六語者今可復施之公壬午歲某在後省嘗草公贈官制云學知守其家亦此意也慶元丁巳正月戊戌前進士周某書

跋李先之禮記義

右章貢先生李公先之朴禮記義四首前兩道紹聖元年省元程文次兩道元祐八年監元程文是時兼用經義詩賦取士公賦已盛行于四方近德安府潁州刻公全集亦復收入獨經義不傳予幼從公族人養素處士學手自鈔寫往歲因吉水高君德懋畱意是經命甥李曠磨本遺之今德懋之子茲攜以相示為題其後不然將莫知之其為難之文也

跋陳剛中石邨廟詩

陳剛中字彥柔胡忠簡公同年進士其貶安遠宰也予適任贛識之豐肌便腹骨不勝肉而安遠荒僻瘴癘特甚汲水寘器中須臾墨色以故仕者多死士大夫固憂公不能生還未幾果然其後湘中有著紹興正論者公姓名在焉且云其妻無所歸削髮為尼未知信否謂公以辛酉歲貶則誤矣當以庚申為正

跋臨江軍劉昌詩之父青詞藁

翁山唐子西父病篤母史氏祈以身代死已而母死父生彼特伉儷之情爾或不容于兩全若劉氏兄弟則孝于事親也其感格空也

題胡邦衡侍郎撰胡從周寺丞誌文

金昆玉友無復二難鴻筆瓌詞有華三絕縉篋中之遺踪附冢上之豐碑解白墮之嘲俟焉隔世圖朱亥之夢恍若平生偉詩禮之傳芳森兒孫其競爽尚襲藏于手澤期光紹于寶章

白墮朱亥皆一時賢事

題張魏公與晁升道帖

右魏國忠獻張公遺晁升道十四帖其半親表也升道諱升之南渡寓肝江實文閣學士劉洪道資深見而奇之薦于魏公自是為公客公居潭連音問不絕凡國太晚年之起居欽夫早歲之學識皆于詞翰中及之最後謂人事無窮與天地相終始欲其撥置以全精神期之者至矣今公季子龍閣

尚書開鎮謙章熙父兄之勲業升道之孫子毅攜
公手澤信侯榮戰因爲記其本末慶元丁巳十月
丁丑

題呂紫微與晁仲石詩

晁氏一姓文獻相續殆無他揚號本朝盛族仲石
諱公慶紹興初與范頤言曾表父同學詩于呂紫
微故得是詩乾道元年平江守沈公雅刻紫微集
二十卷以歲月爲先後此篇在末卷中蓋暮年所
作也仲石之子子毅以示周某敬書其後慶元丁
巳十月丁丑

題李龍眠山庄圖

龍眠居士博學嗜古志尚清遠筆端餘力溢而爲
兩王荆公雅重之數贈以詩又從蘇黃諸公游蓋
文與可一等人也龍眠山庄圖匹休輞川張右丞
達明鳳峯談錄云正本爲中貴梁師成取去今所
臨摹蓋初本也居上出處具蔡啟作誌文一子諱

碩字天老湖南提舉常平是生四子子誠其二長
諱玠字西美通敏善議論終于郡倅季曰瑜字季
周嘗爲理掾能傳乃祖筆法子屢得之今亡矣西
美之孫咎如出此軸請予題其後慶元三年十月
壬午平園老叟周某

跋張魏公與彭子後書

尚書耶彭公子後德厚如璞玉歲寒如喬松紹興
癸酉守零陵郡故相張忠獻公謫居在焉竭誠盡
禮不以燥溼改其度已而按刑交廣總賦沔鄂當
時士大夫皆謂用未極也今觀忠獻帖其賢可知
若子若孫俱守家法雖由積善使然亦忠獻相勉
爲學擇師友之助也慶元三年十月日

題陸本益齋記

乘成兄爲陸本仲因作益齋記具論損益之義詳
矣仲因復求于跋難措辭抑聞之蘇文忠公爲學
務日益此言當自程爲道貴日損此理在既盈請

以是詩爲齋之銘立爾常心毋欲速成惟直諒多聞之是親可以致身可以揚名豈止一第而已慶元三年十月

題周洽所藏南唐牒訴

右南唐吉水縣鄉貢進士周洪諡牒訴七幅考之史氏五代僭偽諸國獨江南文物爲盛然每歲科舉取人甚少多用上書言事拜官惟廣順二年始命江文蔚知貢舉放進士廬陵王克正等三人而止雖舉子以少爲貴然鄉坊係家父子難乎俱免

累政縣判如此蓋優之也家傳二百四十年八世孫洽來求跋語按周顯德五年歲在戊午卽李璟係大之十六年方改元交泰而世宗盡取淮甸畫江爲界上下震懼謀徙豫章已而削去帝號奉同正朔故第一幅稱顯德六年明年庚申太祖皇帝受禪辛酉璟南徙而昶煜嗣位于金陵後十三年歲在甲戌王師弔伐明年乙亥國除士民始避本

朝廟諱其名上一字適同宣祖又明年十月太宗皇帝卽位其下一字復犯御名故前牒皆名弘義最後一牒乃改洪諡實開寶九年之十一月至十二月則改元太平興國矣先是公私狀式例以牒件謹牒爲文元豐四年十一月詳定官制所重頒新式此其所以異于今也洽字季宏不隕世業豈但遺蹟是藏固將起家以大其門老夫雖耄尚或見之慶元丁巳冬至日

題浮雲居士曾達臣雜志後

姓氏書曾氏望廬陵本朝大江以南清源南豐兩族皆出宰執侍從嘗通譜系其後賴之雲都則叔夏尚書大猷吉甫侍郎繼爲禁路之英惟廬陵一族文獻相承登科無慮數十人而未及三郡之顯今浮雲居士達臣有博古通今之學偶遺于科舉有知幾應變之才不苟于功名緒餘著書追跡前輩向使盡發胸中之所蘊其成就宜如何哉是生

諸子才學俱茂或仕于小官或貢名天府而仲氏無逸策第太常典中祕書爲尚書郎群從孜孜爲善方競爽迭興而未艾視前三家何患不及特時有後先爾況猶子無玷嘗以奉使朔方假大兩制歸而勸講修注備膺寵章是故爲之兆矣姑少徐之慶元丁巳冬至日

題至聖文宣公三十八代孫孔仲良唐真元

以後告身石刻

自古推尊孔子莫如孟氏既答公孫丑曰自生民以來未有孔子也又引宰我子貢有若之言曰夫子賢于堯舜遠矣生民未有句言至再三蓋然之也趙岐乃謂前聖不得相踰門弟子之言太過豈知孟子之意哉及唐韓愈謂天子至郡邑通祀孔子北面拜跪禮踰社稷彼堯舜雖得其位而不得常祀社稷雖得常祀而無天子北面拜跪之禮故云不得位而得常祀無盛于孔氏是爲遠過堯舜

之郊然後孟子之意明矣某竊謂虞賓三恪隨運推移孰有世世襲封如衍聖公者城陽蒼梧間置守冢孰有廟宅世祀萬乘臨拜如孔林者以此推之將歷千萬世與天地相爲終始何但生民未而已今莆田幸因賢者爲更版籍立四十九世孫之戶刻唐告于縣齋他日良二千石或能推擇闕人世居學宮使先聖苗裔益勸毋怠於以章皇朝崇儒重道之美又盡善也慶元三年十一月日

題俞洪所藏滕元發與俞退翁詩

四朝國史于遺逸中立俞退翁傳大槩用孫莘老所作墓表惟自西川召爲御史力辭不拜墓表但云以關員召傳乃謂王介甫籍其清望使擊故老夫清德安肯妄發介甫用人寧不察此竊疑滕元發嘗倅湖州退翁郡人熟知其賢觀所贈詩帖卽可知矣當熙寧元年神廟待元發方厚擢爲中丞必舉臺屬退翁之召或以其薦卽可知矣是歲十

二月元發改翰林明年春介甫得政素惡元發出之于外知幾而退是乃所以為退翁況舉主補外自應隨罷耶墓表不書其由莘老亦嘗攻元發故也慶元丁巳十一月退翁元孫洪相遇出示元發詩翰妄意如此來者或有考焉退翁子孫甚盛是則豐積災散之報洪福醜藉疏通稱其家者也

又書谿堂集後

再賦退翁谿堂集首詞並用其後畧有更改附錄于下

四朝國史云云退翁于孫甚盛且多顯者今其元孫徵入為廷尉屢更慶節純誠厚德克世其家因示谿堂集附此說于後使來者有考焉慶元庚申二月巳卯

益公題跋卷之二 終

益公題跋卷之三

題曾遠侍郎戒其子棠清廉帖

漢華陰楊氏自高帝時善以功封赤泉侯其後敝相昭帝傳至東京震並顯遂為名族大要以清白遺子孫子孫亦能守之四世清德見于孔北海疏殆與兩漢相為終始何其盛哉本朝賴川曾氏儒素相承弟兄俱上禁塗至文清公乃用此易其名是生仲躬出藩入從受知孝宗季子出仕之初授古證今誨戒諄諄無非清白之訓是豈教成諂者誰能世濟其美不墮其名則將與國咸休永世無窮矣慶元丁巳十二月日

跋撫州游武祿帖

某與家兄子中自少喜收法書前後得右軍祿帖以十數共評此軸游氏所藏謂謝脫拘束而動容周旋如印印泥無不愜當筆意變化其妙入神蓋傳于今者惟定武瘦本最佳茲其一也慶元丁巳

臘月丁酉

跋楊廷秀所作胡氏霜節堂記

清風嚴霜本不相爲謀兼二美者竹也友人楊公廷秀平居薰凌慈仁真可解慍臨事則勁節凜然陵大寒而不改名堂作記曲盡竹之情狀蓋身之非假之也今胡氏既知不可一日無此其可三日不讀此記乎慶元丁巳

跋唐子西帖

符山唐子西之文盛傳于世不待贊也史稱其論事精密通于世務爲宰相張天覺所知歷宗子博士提舉京畿常平貶惠州數年歸蜀而卒有子曰文若字立夫一字仲懿寬厚秀傑文辭高雅不妄與人交而襟懷灑落人自愛之登紹興五年進士第屢被薦召多仕于蜀二十六年入爲光祿寺丞遷祕書郎擢起居郎執政有惡其不下己者諷言官誣以事出知邠州改鏡州除敷文閣徙溫州三

十一年參知政事楊椿薦之高宗笑曰今不做否蓋或言其簡伉也以宗政少卿召再爲起居郎明年二月進中書舍人兼修玉牒官隆興元年以足疾求去正月丙辰除敷文閣待制知漢州明日改江淮都督府參贊軍事符離退師例貶秩二等求出幕徙江州病丐祠二年某月卒于南康軍年六十晚號遜菴初爲鄱陽破豪民一族人稱其政後與郡人王樞密剛中通姻因卜居焉在朝廷若不預事間出議論輒正平無向背高皇將內禪懲靖康吳敏輩自以爲功未嘗語人宰執亦不敢問獨立夫請對言不宜迫遽高宗諒其忠與詳論舊事會御批追崇皇太子所生父立夫已書黃因過某歎聖德不可及而疑名稱未去歸白宰相請更黃而堂吏執不可立夫請不已宰相以聞改稱皇太子本生親誥詔侍從臺諫就御史臺會議遂稱皇兄而加贈極品其端蓋立夫發之立夫素主民兵

或疑其迂雖子亦不謂然及守九江適虜騎犯舒立夫參用民兵備禦整暇方督匠刻東坡集人賴以少安其治郡能盡僚屬之才人皆樂爲宣力至簿書期會則不屑性既寡合遇所喜形迹都忘平生不言人過雖有憾亦容之常曰觀人以初見爲定往往十得六七少因讀史悟性理宜州僧宗杲及與子西竝遊張天覺之名震一時立夫適相遇于荆南先語其子云我今謁杲彼若叩我我便不服望見立夫遠曰尊公文章滿腹却欠此事群從何處得來立夫喜且服人兩奇之子輅字德輿亦能文進德壽宮慶古賦後省第入甲等乾道中由大理司直出通判漢州淳熙一十三年冬提轄權貨務高宗上仙獻噴議謂合稱祖破禮官之說又及巷市七日事孝宗下其議會御史察洪翰林邁議稱祖非是洪家居待罪孝宗曰議禮如聚訟何嫌異同於是禮官併疏輅夫言給事中亦乞罷輅

復通判隆興府子嘗與立夫同僚相善又惟文士子孫能世其家如唐氏者未易多得故傳其事于上舍游居所藏帖之後使修史者有考焉輅今爲刑州守慶元戊午正月乙卯

跋韓子蒼與曾公衮錢遜叔諸人唱和詩

崇寧大觀而後有司取士專用王氏學甚至欲禁讀史作詩然執牛耳者未嘗無人凡紹興初以詩名家皆當日人才也今讀韓子蒼與錢遜叔曾公衮等臨川唱酬畧可觀矣或疑所以然子曰舉子在場屋爲學不專爲文不力既仕則棄其舊習離乎新功彼有志之士其操心也專其學古也力譬之追風籟雲之驥要非繩墨所能御故子蒼諸賢往往不由科舉而進一時如程致道呂居仁曾吉甫朱希真皆是也其又奚疑慶元戊午正月戊午跋曾公衮錢遜叔韓子蒼諸公唱和詩

國家數路取人科舉之外多英才自徽廟迄于中

典程致道呂居仁曾吉甫朱希真詩名籍籍朝廷
賜第顯之今用觀會公家錢遜叔韓子蒼諸賢又
皆翰墨雄師非有司尺度所能得也紹興初星聚
臨川唱妍酬麗一時傾慕都之名勝游氏襲藏此
卷有年敦夫慶元紀號之四年歲在戊午上巳日
周基子充敬題其末

跋吉水蕭氏祖長官告

右武寧蕭長官所受淮南吳氏告一通按路振九
國志楊行密之子涓自吳王僭號改文散官大夫
爲大卿御史大夫爲御史大憲明年涓租十一月
弟溥嗣位收元乾真實後唐天成幾年也徐溫既
死子知誥起復乘政其歲月職制皆與此合予聞
蕭氏自武寧起家至曾孫諱定基字守一本朝天
禧三年登第嘗任侍御史風節凜然有孫諱服字
昭甫元豐五年登第擢監察御史時相蔡京憾執
政劉遵背已窮治達姻家章氏私鑄獄于平江久

不能決昭甫奉詔審鞠不知京指遂坐廢錮後起
爲吏部員外郎出知新州卒再世以直諫聞虜虜
陵名族祿仕不絕武寧七世孫武陵丞諱許字欽
英才具過人子嘗與之游諸公方欲薦用俄謝事
去議者惜之因其子特起出示祖告併題于後慶
元戊午上巳

跋蕭御史殿試卷

右天禧三年蕭公廷試三題卷一日之間文不加
點項在館閣同僚許克昌狀元出其從祖安世治
平四年魁卷與此畧同蓋祖宗時士人業精于勤
往往習慣如自然非若後來之鹵莽也家狀曾祖
霽不仕而其裔孫尚藏淮南吳乾貞中任武寧縣
令真告其以爲僞官故不書耶或疑賦原韻不當
押葉之法按廣韻入聲三十一洽與三十二狎通
用三十三業與三十四乏通用自唐迄天禧皆然
此舊韻也仁廟初詔丁度等撰定集韻于是移業

為第三十二而以狎之附之此今韻也慶元四年
上巳

跋宋運判駟奏藁

右故廣西運判奏章四藁公以紹興二年二月為
衡陽太守當孔彥舟馬友曹成諸劇賊破城侵境
之後黎庶凋瘵百孔千創官軍征戍日夜往來資
糧罪屢應酬無虛日而能悉心撫摩臨事整暇奏
課遂為湖南第一四年三月代還此陛對所陳也
如乞諸郡置將乘時和糴與夫鞭策諸將早圖恢
復皆中興急務深契高皇之心界以使節將試用
之攬轡踰年奉祠遂歸沒于臨二子子仍子倬仕
皆弗顯其孫文祚等得此遺墨俾其識其後公之
守衡也舅氏王公籍實貳郡事奉外祖母衛太夫
人在焉又叔父靜江府君侍叔母秦國夫人宰屬
邑之安仁某時年十七八歲侍先夫人省秦國于
衡尚能記公之政今追書大畧如此公諱駟字景

融益鄭國元憲公曾孫而外祖母之姪于先夫人
為表兄云慶元戊午三月十七日

跋張忠獻公與外舅帖

張忠獻公忠君憂國勸學為善之心造次顛沛未
嘗少忘凡見于手書者皆是也近世浮辭謬敬盈
于尺牘觀此得不見賢思齊乎茲八幅者外舅御
史王公彥先紹興庚辰守公鄉郡及移瀘帥答書
也德人士風之衰期待甚厚蓋聞名于過平江之
日知非溢美外舅季子嘉賓藏之有年今傳其子
紹祥而屬某題其後慶元戊午五月庚辰

跋義靈廟碑

義靈廟者勝侯棲神之所也侯宣和間據天台適
方寇鴟張初為曲突徙薪之計後收焦頭爛額之
功正使二千石智勇過人未必兼此二者孰謂一
戶曹乃優為之當時祠享永世廟食宜哉時慶元
戊午五月丁巳

題彙倅周臣所藏黃魯直送徐父宰餘干詩

蔡

山谷此詩今載外集不觀初草何以知後作之工
老杜云陶冶性情存底物新詩改罷自長吟孰知
二謝將軍事頗學陰何苦用心苟作者云乎哉慶
元戊午歲戊午月戊午日平園老叟周某書而端
之聶氏

跋江氏舊書

右安陸江氏書一卷頗有誤字首印江元叔書籍
記末用越州管内觀察之印不知元叔守越時錄
本或錢氏舊書也子孫不能守多入鄉人翰林學
士鄭辦殺夫家賴州典國主簿余鏞得此以遺余
乃錄毅夫郎溪集所載記文于後慶元戊午歲戊
午月戊午日

跋黃山谷書唐人詩

右山谷大書一軸紹興末外舅御史王公彥先守

漢武帥漚時得之今將四十年其孫紹祥攜以相
示昔山谷謫居多作字以遺蜀人中興後凡東南
士大夫之為監司郡守者往往有所獲而端歲月
既久遇其良輒取之郡無留良焉詩不云乎尚有
典刑慶元戊午五月十四日

跋張芸叟劉滙詩

右浮休張公劉將軍墳廟詩一首將軍諱漚慶曆
名將力戰城永樂蕃漢皆畏愛幾為狄青尹洙所
害故云生前毀譽豈堪聽身後功名始汗青此詩
雖載畫墁集亦潛其名故表而出之慶元四年六
月旦張公會孫繼祖攜以相示為題其後

跋司馬文正公手抄富文忠公使北錄

司馬文正公于廣記備言不啻飢渴之嗜飲食况
國家重事乎富文忠使北語錄首尾萬有餘字手
自鈔錄他人安能為此淳熙癸卯公會孫吏部侍
郎季思刻石泉南屬某題其後今十六年而侍郎

之子遵求踐宿諾感歎不已其昔為大史牛馬走
恭讀徽宗實錄宣和六年春既復變尚不得慶曆
國書管典真本藏寶文閣朝廷以為快祖宗累世
之憤則富公奏牘所謂影帶下策蓋用之矣當時
力辭奉使當抑有由也慶元四年六月十一日

題東坡上薛向樞密書

薛恭敏公元豐元年九月自樞密直學士工部侍郎
郎知定州召入西府蘇文忠公嘗與之論天下事
今復貽書深切著明如此責善為有加矣薛本以
理財論兵進及政路首尾三年同列質以西北事
則養威持重未嘗啟其端最後詔民蓄馬既奉行
復欲反汗為舒直論罷閣義能從不善能改未必
不因蘇公之書比之患失遂非者有間矣元祐間
特被褒表豈無所自耶公作此時年四十三是日
其生朝也身為二千石士民當盈庭為壽不則與
家人飲食燕樂乃齋心呵凍極陳國計其賢于人

遠矣官本不載此書于集惟麻沙本及別集有之
故人劉篋壽使君之子宗爽兄弟家藏真蹟慶元
戊午七月且以示前進士周某敬題其後

跋楊廷秀贈族人復字道卿詩

江西詩社山谷實主夏盟後四方人才如林今以
數計未為多也誠齊家吉水之澍澹執詩壇之牛
耳始自宗族延及郡邑孰非闢李杜之門晞歐陽
之蹤者粵無錫燕無函秦無廬胡無弓車夫人能
為之尚可以社名乎家生執戟耶又拔乎其萃者
也慶元戊午七月二日

跋曾氏兄弟帖

穎川曾氏兄弟俱有時名其以文章議論會致身
禁從者三顯謨學士字叔夏寶文待制字天猷敷
文待制諡文清字吉甫遠大理卿字原伯戶部侍郎
字仲躬同事孝宗克繼先業視南豐之會殆庶
幾焉仲躬子德廣守桐川哀兩世翰墨刻之石蓋

將對手澤而思承君子之澤卽心畫而推廣前人之心濟美象賢寧有既耶附以呂伯共禮部君二帖深有益于學者乃知五公義方之教施及宅相何其盛也慶元戊午八月丙寅朔

題侍講呂希哲歲時襟記後

本朝承平歲久斯人安生樂業凡遇節物隨時制宜雖有古有今或雅或鄙所在不同然上而朝廷次而郡國下逮民庶靡娛熙洽未嘗虛度則一也侍講呂公當全盛時食相門之德既目擊舊禮又身歷外官四方風俗皆得周知追記于冊殆無遺者惟上元一門多至五十餘條百年積累之盛故家文獻之餘茲可推矣慶元戊午公之孫仙遊邑大夫祖平以示平園老叟周某竊有生晚不及見之歎云

自題與黃談書尺

元祐給事中黃公夷仲之曾孫諱談字子默山谷

先生從孫實傳詩社之正印有文集三十卷自號洞壑居士早受知于胡明仲侍郎其後劉共父樞密張安國舍人繼帥湖南皆爲上介屬以文翰人門具美宜在朝廷而官止權務壽不及知命識者惜之嗣子早世其孫鈞以予隆興乾道間往復之書數十通聯爲大軸銜袖相過內十四幅乃予手筆餘皆弟姪及筆吏代作今三紀矣追懷人物之英豈易復得重爲歎息慶元戊午九月己亥

跋撫州鄔處詩

臨川自晏元獻公王文公主文盟于本朝由是詩人項背相望近世如謝無逸考槃兄弟及饒德操汪信民皆傑然拔出者也南渡以來又得寓公韓子蒼呂居仁振而作之四方傳爲盛事其後儒冠則曾季狸袁父釋氏則文慧大師惠嚴道士則黎道華師候同時以詩鳴人喜稱之今鄔君文伯復以科舉餘力刻意吟咏棄其新舊業遺以相示予

雖不能詩然亦知其為佳作也蓋木有本可以干
霄水有源可以至海以君之才進而不已追前人
而與之齊斯無難矣慶元戊午九月戊申

跋山谷草書太白詩

南豐洪氏收山谷草書李太白歌行一卷始中年
筆也子家藏數卷亦太白詩益非謫仙妙語不足
發龍蛇飛動之勢耳今江西豫章廬陵宜春皆刻
山谷真草惟蜀中劉氏十卷中草聖尤奇寶暮年
筆也始賴昌劉昱字晦叔與山谷友善暨其子瓌
孫伯虎三世相繼持節于蜀日哀月聚固宜得之
之富其間二說學者不可不知乃命小吏錄于左

題戊午歲吉州舉人期集小錄

選士于里登名天府為之首者期集同舉之人禮
也廬陵號士鄉故此禮尤盛而今歲特盛焉永新
左君淳熙已酉哀然居萬人之上今秋克復舊物
而其父母年方五十二者皆近所稀有其盛一也

誠齋楊公龍泉孫公朝廷鄉黨之達尊交以序美
之其盛二也每舉士或有故不至至或不多多者
僅三四今在坐乃五十人其盛三也左君既具著
于錄而附以坐客所賦詩強予題其後老詩雖不
能措辭竊有祝焉國朝天聖八年春參政歐陽公
國學首薦冠名南宮是年廷試榜眼則丞相劉公
其後鼎甲則侍郎郭公中興第五則資政胡公至
紹興十八年參政董公遂唱名第一其他登甲科
者猶未悉數也諸君勉旃踵前賢之高躅增吾邦
之盛事其在茲行乎其在茲行乎慶元四年日南
至

跋張如瑩歸去來詞

永嘉陳開祖紹興二年登第張公子詔雅重之仕
至廣德太守行誼表于一鄉廉靖著于仕途其倅
豫章戶部尚書張公如瑩以慶遠軍節度使來為
連帥素以翰墨馳聲位望既崇益自珍貴人欲其

尺牘不可得獨為開祖書歸去來辭于畫卷且推美其古雅今五十年而開祖之子求仁請于為之跋求仁三為劇邑以名字再與郡于嘗同僚知其端諒通達蓋名父子也開祖諱一鶚求仁名自修慶元五年正月十九日

跋王才臣十史論

淳熙中于備數政府故人劉子澄守衡言布衣劉德老之才孝廟亟命以官食衡祠祿因思于友王才臣才學不啻德老甚欲以名聞顧念才臣春秋未甚高猶當以科第進遂不果後歸老里中才臣猶在場屋偶見孫從之改其史論為之悵然才臣身雖益困而所養益厚與時會當有知之者于老矣尚庶幾及見之慶元五年上巳日

書譚該樂府後

世謂樂府起于漢魏蓋由惠帝有樂府令武帝立樂府采詩夜誦也唐元稹則以仲尼文王操伯牙

水仙操齊牘沐雉朝飛衛女思歸引為樂府之始以于考之乃賡載歌蕪兮解愠在虞舜時此體固已萌芽豈止三代遺韻而已新喻譚該居之舉業餘暇作上之回等十四篇因舊題而衍其詞用意深遠至于擬古詠史詠懷感遇諸詩多有佳句連而不止前輩可以企及為題卷末而勉之慶元己未五月戊戌韓文公云雉朝飛收積子作吳魏樂古樂府題要解以為處士積木子劉次莊樂府集序又作積沐未知孰是也

跋宋景晉暉手書佛經

待制宋公手書金剛經端謹有法度始末一體如摹印然敬之至也王荆公學王濛書多為橫風疾雨之勢每作帖初尚矜持後必坦率惟寫佛經專用楷法亦是理歟公以紹興己未五月書比其曾孫曾老以慶元己未五月示周某甲子適一週矣

題趙清獻公三帖

右趙清獻公三帖第一乃嘉祐八年春任度支副

使所作其云孫公勇退謂蜀人文懿公也名與公同尋除東宮三少致仕屹公長子是年登科第二則治平二年公知成都時仁舉不知謂誰之年有都官郎中廣濟河催綱石輅為梓州路運判或斯人歎第三云呂侍講三請留司益正獻公也是年八月出知蔡州慶元五年十月且平園老叟周某敬題

題楊廷秀新塗胡氏義方堂記後

誠齋作義方記理勝而文雄殊無老人諄諄衰弱氣象吾黨所共矜式豈特尤責胡氏家塾而已哉慶元己未十月辛未

跋東坡與張近帖

右坡公與張幾仲帖蓋元豐間謫居黃時也所謂授德興尉者長子邁也其將自黃移汝嘗賦長篇以銅劍易幾仲龍尾子硯幾仲作詩送硯及劍公又屬和卒以劍歸之具載集中幾仲名近仕至顯

謨閣直學士國史有傳其從孫子份家臨江軍實藏此帖慶元己未十一月甲辰周某子充敬觀

益公題跋卷之四

大元帥康王與向子誼咨目及御筆等跋

臣竊惟靖康大變地裂天傾沉塵已蒙鄙壇未設餘分閔位人懷向背惟世臣向子誼首符所部拘偽楚之族數遣行人及仲子澹詣大元帥府議軍國事領兵戡難見褒璽書謹重嚴備復勤親禮此權發運副使時也胡行鬼速漢箭無神金城湯池所在宵潰江湖諸郡送款相望子誼獨鳩叛餘之兵嬰十里之城八日然後失守江藻撰撫恤官吏軍民敕書有曰明于分義屬此艱危巧說百端堅持一意力為巷戰奮以忘軀此還長沙時也御書薈林泛宅古文孝經臨蘭亭序拜賜不一此為浙漕時也國步已安春秋猶盛禁塗輔郡倚注方濃上書請老留之不可特頒詔諭遠比漢疎侍從挂冠鮮有是禮此守平江時也向非忠誠慷慨心在王家終始不渝安能致上眷如此雖疾風草動向

日葵傾聖鑒昭昭屢行獎飭然責賢必備求全或毀時當多故傳聞累辭其孫士虎懼後人猶致感也敬哀奎畫刊之樂石謂臣昔以太史牛馬走遼事高皇俾書下方或可傳信共惟一字為褒榮于袞服衆言消亂折諸聖人今觀天文議論定矣慶元六年二月旦具位臣周某謹書

跋朱元晦所作南城吳氏社倉記

某遭遇孝宗皇帝陪二府者十年每歲必聞宣諭云朕自中春農事興即憂水旱直至十月米穀上倉然後放心洋洋聖謨二帝三王所未有也方社倉畫旨時某在東府實奉宣德意下之有司今南城吳仲吳倫兄弟請書此記乃敬載聖語于後當有告于太史氏者具位臣周某某書

跋山谷題橘洲圖記

橘洲在湘江中巨浸不能沒膏潤宜橘以是得名唐張曲江杜子美劉夢得皆見于詩又畢田序云

橋十餘本居民數百家佛刹神祠馬氏書堂詰盜官舍在焉張舜民記洲南北與州城等有巡檢寨及僧寺兩三所漁者數百家予比歲嘗至其上不復曩時之盛今觀山谷所題画卷亦似疑其畧也橋訣律切吉激質切本作兩音非人混而為一故鄭道元注水經橋洲或作吉字近世偽傳東坡緣橋傳亦指為吉五方音訛多此類予以舊游故詳記之慶元庚申二月乙丑平園老叟周某書而端之趙仲肅

題東坡晚年手帖

東坡以靖國辛巳北歸五月由金陵過儀真二十九日手簡別發運司屬官六月自潤還常州七月仙去此乃數旬前帖尤可貴也趙仲肅以示周某敬題其後慶元庚申二月乙丑

跋歐陽文忠公與張洞書

右歐陽文忠公與張洞手書五幅洞字仲通開封

人冕无咎雞肋集有傳任潁州推官文忠實為守甚重之皇祐三年從晏元獻公辟于長安文忠時守南京答第一第二書其送行長篇今載居士集第五卷明年文忠丁母憂歸潁答第三書至和元年洞以大理寺丞再從晏公于西京而文忠初服闋還京師答第四第五書次第皆可考其後入為三司度支判官歷江西淮南轉運使官至工部郎中治平四年卒此帖藏玉山汪季路家慶元六年閏二月

書馮頊自得集後

紹興辛巳三月予任秘書省正字被差充公試補試類試考較官時仁和縣丞馮頊子長來主管試院諸司開院與之關疑偉岸而文自言系出文懿公意甚奇之蜀人劉詔美侍郎負才擇交亦稱之不容口後二十餘年君為朝散郎京西安撫司參議官出所著書三卷名曰自得上論經旨十六事

中爲史評二十二下則詩話四十六其推明聖賢
之意考訂古今之說徃徃出人意表今詩匠楊廷
秀待制嘗序君詩謂清麗入江西深長幾唐人則
學問文章從可知矣年八十而終慶元庚申春其
子從政郎有年自循州理掾奉母還嚴陵過予話
舊感歎不已書此以遺之慶元庚申閏二月丁巳

跋黃魯直帖

山谷以紹聖元年冬坐史事安置黔南二年四月
至焉其年三月初奉大夫錢塘韋驥字子駿來爲
變路提點刑獄嘗任主客郎官故云子駿提刑主
客大夫四年三月宗正丞張向除本路提舉常平
實山谷之外兄乞避親嫌十一月移式州五年六
月改元元符方抵貶所其云從道者向也此十帖
皆與驥者是歲九月驥移知亳州未上易四明本
名驥皇祐五年登第後避濮王諱改焉臨汀有文
集蓋其孫作守時刻之慶元庚申三月戊寅書而

歸之汪氏

跋蔡君謨與唐詔帖

右蔡忠惠公與唐詔帖十二紙詔字彥範龍圖閣
待制肅之子侍讀詢之弟錢塘人其云厚之新得
書蓋指浙西轉運使元絳此至和二年公守泉時
又云清源若移動謂自泉移福及再知泉州時打
樸過歲則嘉祐五年召入翰林知開封時也皆當
真之卷首文字繁冗帖累辱降訪帖前邊出帖乃
嘉祐六年四月權三司使以後所作按仁錄是年
八月以江東運判尚書比部員外唐詔爲權發遣
三司開拆司十月改權發遣鹽鈔公事殆公所碎
置耶詔之在職嘗經憂惱故公自頃歲經由衢州
因抱骨肉之戚至泉遂以病解詔釋使之入省仍
勸其止市尸祭奠又每達老親之意于其家人可
謂親密之至者也先後偶失序畧爲之辨而歸之
汪季路慶元庚申三月甲戌

書歐陽彝四世碑

古者官有世功則有官族著之譜牒百世可考雖然引而伸之存乎其人若樂胥原狐續慶伯之後失其先後則降在阜隸者多矣友人歐陽彝字元鼎世居廬陵郡之永和鎮今為族長儒學行義表表一鄉其家世甚遠未暇徧舉姑以近數世言之贈奉議郎諱璟字粹明父諱襄字允成俱業儒允成少年貢于鄉游京師之太學不幸再世皆不及下壽其子孫日以蕃衍預籍登科第者相望其興特未艾也自奉議而下墓刻多先達名筆元鼎既哀四世拓本聯為卷軸又以近族之隱德者登科者別為一編于是歐陽氏之源流開卷可知傳不云乎世濟其美不隕其名此元鼎紀先烈詔後人之本意也乃為表而出之慶元六年三月既望益國公周某書

跋富鄭公與李仲師帖

四朝國史李仲師本傳言仲師在河南治辨刻深厚結中人神宗嘗稱其治狀富公為相奏曰陛下何從知之帝默然仲師平昔事公謹者望其薦已聞公此對勢應匿怨後與編戶同敷役錢聊以逞憾非但徇時而已公遇李厚于私覲或不能免上前臧否自有公論遑恤小人之怨乎慶元六年三月甲戌

題所書劉辰告墓碑橫石

乾道庚寅秋予初直北門為同年辰告君作墓碑又屬兩同年朝士書丹題蓋今三十有二年而君長子贊暨兩弟者孫吉孫請予別書此文欲以橫石刻真家廟義不可辭贊即召孫也以夢更今名甚文而才克肖父祖自淳熙辛丑至慶元己未再上南宮立身揚名其在茲乎宜孫亦負雋聲嘗兩貢于鄉與子孫皆亡矣六年庚申五月且某書

跋顏魯公書

真卿承命南來諸事草草但賊勢尚爾奈何張
貞不了國事可念可念真卿

右顏魯公帖凡四行二十八字或真或臨不能辨
也第一第二行盡處各減一字惟公忠烈巍然千
載猶有生氣况觀遺墨起敬謂宜如何按永泰二
年歲在丙午公秦宰相元載抑塞人言甚于李林
甫楊國忠載怒因公論祭器誣以誹謗二月乙未
由檢較刑部尚書知省事貶峽州別駕未至易吉
州司馬所謂南來諸事草草正此時也先是漢州
刺史崔旰陷成都蜀中大亂公貶後十九日癸丑
紹興元帥兼劍南東川節度張獻誠就近討旰三
月戰梓州獻誠大敗僅以身免所謂不了國事殆
指斯人張真之下闕文疑稱其字蓋誠貞義相通
耳初獻誠陷安史之亂將兵守汴後拒朝義州東
以降與公俱奮忠義者故公賢其人念其敗云爾
此帖當是公赴吉或到官所作自丙午歲距慶元

六年庚申凡四百三十五年而臨川梁世昌實寶
藏之遠來求跋考唐史永泰無二年蓋是咸冬至
改元即稱大曆元年至三月八日公自吉移刺撫
州六年書麻姑仙壇記今年三月戊寅夜山之仙
都觀大火焚蕩幾盡古杉星列亦隨飛烟衆碑皆
斷裂雜瓦礫中獨公壇記巋然其旁祝融回祿曲
意護持如此故併記其異爲後世忠臣之勸十月
甲子周某書

跋張安國與弟伯子家書

士大夫尺牘施之尊貴未免矜持用之交游容或
假借若乃行草得于肆筆獎勵發乎真情捨群從
家問何以哉觀此五帖則故紫微之墨妙今太常
伯之早成何待贊也憶乾道壬辰夏道由池陽常
伯之尊君持節在焉晤言累日其論難進易退學
道愛人皆可書而誦也施及賢嗣立朝濟世美家
法義方之教有自來矣茲用表而出之庚申秋社

平園老叟周某題

跋山谷書文賦

右山谷元豐壬戌歲年三十八宰太和縣書陸士衡文賦及半典盡而止以遺晁仲詢仲詢傳其孫勝之尋歸廬陵士人楊仁仁以遺太和嚴端禮端禮將刻真山谷舊治偕萬安郭澥求跋語昔王右軍距士衡屬耳已重其賦書之唐太宗時獨褚河南能辨右軍帖真偽愛而臨其本至國朝藏蜀中李翹叟家元符間山谷自黔移戎見之謂豪勁清潤天下奇書益悟古人沉着痛快之語今觀此卷書法娟秀不減晉宋諸賢自足名世或乃疑山谷元祐以後每恨向來字中無筆遂謂四十前書非其所喜殊不知前輩爲學日益新而又新晚欲自成一家豈遽矜夸滿假是殆癡人前不得說夢也慶元六年庚申九月甲戌

跋柳公權赤箭帖

唐柳公書當時自九重至外夷無不愛重史稱其結體勁媚蓋筆諫之意先形心畫此所以爲貴亦猶魏元成忠直而嫵媚耶後世真蹟日少楨石刻僅存典刑予官行都有朝士楊文昂蓄公碑三十餘種徃徃來自西北其在東南者山南西道修驛路記和州陋室銘潁州閑禪師碑台州國清寺額翠屏院天台佛三字題僧清觀簡及江州復東林寺碑耳東林近又煨燼或重惜之手笑曰趙明誠金石錄載何進滔德政碑在柳書中尤奇偉政和間太和尹磨去別刊新製厄會至此殆不若東林之一炬太和蕭知節示赤箭帖求予一言夫顏勅柳骨古有成說此帖字瘦而不骨露沉著痛快而氣象雍容歐虞褚薛不足逮焉昔歐陽文忠公最愛高口碑以爲摹刻之工鋒鉞皆在而蔡忠惠公則謂陰符經序善藏筆鋒柳書之最精者二說正相反每推忠惠善書而自云論此不同况晚輩寡

學乎宜擇良工刻石傳之以俟識者微知節儒雅
好事其孰能與此慶元六年九月辛巳

跋楊廷秀石人峯長篇

韓子蒼贈趙伯魚詩云學詩當如初學禪未悟且
遍參諸方一朝悟罷正法眼信手拈出皆成章蓋
欲以斯道淑諸人也今時士子見誠齋大篇短章
七步而成一字不改皆埽千軍倒三峽穿天心透
月脅之語至于狀物姿態寫人情意則鋪叙纖悉
曲盡其妙遂謂天生辨才得大自在是固然矣抑
未知公由志學至從心上規磨載之歌刻意風雅
頌之什下逮左氏莊騷秦漢魏南北朝隋唐以及
本朝凡名人傑作無不推求其詞源擇用其句法
五六十一年之間歲鍛月鍊朝思夕惟然後大悟大
徹筆端有口句中有眼夫豈一日之功哉吉水羅
惠卿之子且示公石人峯長韻讀之如身履羊腸
耳聞斑寅心膽震悸毛髮森聳詩能動人一至是

耶子懼夫不善學者欲以三年刻楮葉之巧而勝
秋花發杜鵑之神望公將壇場歷超之非但失步
邯鄲且將下墜千仞故歷叙公真積力久乃入悟
門證子蒼之知言慶元庚申十一月辛巳平園老
叟周某書于華隱樓

題嘉祐賀老人星見表批答

宋元憲公五世孫梓示嘉祐四年正月仁宗朝批
答樞密院官賀壽分前老人星見表一通使副凡
四人宋公爲之長故子孫得藏當時之批答觀所
續之紙正與表同乃錄某玉堂雜記附其後知南
渡已來百司失舊制多矣梓云人多以無御寶爲
疑卽告之曰詔書單賜所以用寶就批原表之後
何必寶也梓請併書之慶元六年庚申十一月二
十九日

題趙清獻公帖

儒書釋書雖異而欲人求放心復本性則同皆因

其所固有諄諄然命之非強以外鑠也趙清獻公習與性成庶幾由仁義行宜乎造次必于是觀其與弟姪家問可知矣慶元庚申臘日平園老叟周某書而歸之季路汪氏

題癸丑謝何同叔送羊羔酒詩贈尹德隣

永豐尹直卿德鄰學富而瞻于文有能詩聲紹熙癸丑補中太學生簾試問寢龍樓曉詩末句云書生憂國切幾白九分頭學官歎服寘名第一謁告還鄉屢枉佳篇今將參學見索鄙句老諳無辭可借偶記頃在長沙有謝何同叔運判雪中送羊羔酒四韻後欲再賦以酒有浮蟻可押慕羶對未成而止今錄舊作請直卿為足之若自有壓倒元白之句則九萬里風斯下矣庚申臘月十七日

跋蕭氏敦節堂詩

徽宗朝名御史蕭服字昭甫吉水人坐不肯羅織吳門章縵私鑄獄佛蔡京意鬻管皮州後起為吏

部員外郎出知蘄州卒年五十八嘗遇恩封其父汝夷字君係至通直郎所居有敦節堂本路提點刑獄張景修作詩美之此廬陵名士彭使君諱醇字道原政和初和篇也踰九十年堂壞而詩存蕭氏以歸彭公玄孫叔夜叔夏池飾藏之因為詳記本末按四朝國史蘄州本傳初謫處州今其玄孫祺出大觀四年印曆實貶虔州虔與處字畫邊備異爾即今贛州吉之隣郡近世既改虔為贛史官不考耳嘉泰辛酉四月辛巳

跋陳瓘書

張文潛謂韓文公揭陽上表頌德近諛此非知言古人愛其身以有待不欲死瘴癘耳其後為兵部侍郎宜撫鎮州甲士陳廷大聲數責賊師視死為何如今伯紀謂陳忠肅公跋敢疑論為懼死時語亦非也蔡氏烈焰燎原燕天乃至犯其鋒雖被罵斥辯論不已懼死者能之乎忠肅存心吾知之矣

私史廢而宗廟尊朝聞夕死可也嘉泰元年四月
壬辰廬陵宰黃伯庸以示邑人周某敬題其後

題山谷書大戴禮跋作篇

大戴禮跋作篇學者罕讀東坡妙語聞所未聞山
谷翰墨世其寶之可謂三絕大和彭惟孝字孝求
好古嗜學謀刻之石頗疑元祐甲戌四月改元不
應仲春先云紹聖竊意山谷或以仲夏書此誤作
春耳六一先生集古跋謂鍾繇賀破關羽表當在
漢廷庚子春乃作己亥閏十月唐羅池廟碑據書
撰官蓄在長慶三年乃題元年立石世既盛行姑
俟識者予于此亦云嘉泰辛酉四月丙午

題鞠城銘

李公麟字伯時堂弟素字德素南唐李先主昇四
世孫竝登科隱舒城龍眠山里人李冲元字元中
少年邁往善論人物如壁共爲山澤之游號龍眠
三友元祐三年亦登第典獄宜春作鞠城等十一

銘其實可知汪公洵字養源被遇孝宗歷左司諫
中書舍人蓋吏部尚書諱應宸字聖錫之兄嘗爲
吉楸喻公子才爲書此銘五十三年矣子才即聖
錫婦翁諱樛紹興初擢館職後宰懷寧避時相挂
其冠晚起爲郎久之再致仕今其孫來爲酒官兼
行祿事參前手澤服膺法戒矜式賢範謂于昔與
乃祖及汪氏兄弟俱厚善請題下方詳記之以告
來者嘉泰辛酉四月丙午

跋張子韶與陳朝彦序詞

張公子韶以布衣奉大對氣節凜然既登近班不
改厥度久竄庾嶺之陰所養益厚蓋剛者也其告
同年富沙陳朝彦及引楊中立溫柔寬厚之教以
煉金爲喻朝彦剛正抑可知已學者讀文忠公剛
說于此不能無疑予謂二者皆是也舜命夔教育
子曰剛而無虐專陶告禹曰剛而塞洪範曰沉潛
剛克高明柔克蓋天爲剛德猶不干時況在人乎

彼無禮不可治民如子玉者不學其蔽也狂如六
言者查之而不沒如陽處父者或虐或塞或不知
克之道也子韶所戒其在茲歟若蘇氏則明言剛
者必仁夫人至于仁剛不勝用矣不仁必害物焉
得剛子故曰二者皆是也朝彥韓廷傑紹興癸酉
自南康宰辟廣西經畧司幹官子韶時在南安以
序及長短句送之乾道丙戌朝彥嘗除司農丞未
上而卒其子希黯為廬陵督郵出子韶真蹟敬題
其後嘉泰辛酉五月朔

跋養正堂記

右冀州養正堂記并與魯侯帖山谷為北京教授
時所作年方三十五自云比平時書札似差老勁
明年調太和宰秋歸江南真積力久詞翰又非前
比所謂九萬里風斯下矣淳熙元年五月晦周某
觀于宗人虞卿兄弟家後二十八年歲在辛酉再
觀此卷恍如隔世徒有波斯匿王之歎嘉泰改元

六月癸未某書于平圃明農堂時年七十六

題李彥平遺書後

孔子曰朝聞道夕死可矣是理也載于易繫辭雜
出于禮經三代時佛教未入中國儒者于啟手足
之際往往不辭此理素明也及漢晉以後釋教始
行乃謂欲達死生之理非潛心釋氏不可故好之
者心溺攻之者辭費蓋亦反其本而已子與樂庵
李彥平既親且舊知其非逃儒而人釋者臨終超
然自在如此殆聞道乎其子嗣宗等屢求一言發
明遺訓敬題其後

跋曾無疑所藏二帖

范忠宣公心正氣和道醇德備三復尺牘如見其
人嘉泰元年七月癸酉周某敬題端曾氏
子家藏石曼卿大書華驛詩宛類顏韓公心畫
今友人曾無疑又示其行草二十字絕似柳誠懸
范文正公云曼卿之筆顏柳骨諒哉嘉泰元年

七月癸丑

題曾南夫集序

曾公提舉生二子長伯和諱墳次仲和諱笈伯和生彌泰有子曰寅亮子既昇公集序今仲和之子曰瓊曰璉求別本復書以遺之嘉泰元年歲在辛酉八月戊子某書

跋劉氏後隆堂詩

唐末楊行密奄有江淮國號吳吉其南境也郡人彭肝素強暴擅行郡事兵屬永新劉公景洪欲挈城附湖南馬氏陽諾而實不從肝獨攜部族奔楚邊陲晏然公不有其功退隱山林南唐既受吳禪厚禮招聘亦不應常曰吾免二國交兵活人多矣子孫富有隆者名其北山曰後隆生子諱煦煦之子諱素是生相國諱沆字冲之仁宗天聖八年進士第二人至和中拜相累贈曾祖太傅祖及父皆太師其居相位每務進賢歐陽文忠公在侍從被

譏出守公方提舉修唐史密奏畱置史局尋遷翰林學士今某藏富文忠公與公手書云每辱勉以盡瘁鎮靜有所植立其如五年無補雖強自勉恐終負教誨北望恩館神爽飛越富公書詞如此公之薦進可知達賢者宜有後故其子諱璉元忠孫侗字寬夫仕皆至待制三世貴顯歷事五朝後隆之名滋驗矣初相國兄弟四人其季贈金紫光祿大夫諱注生知蘄州諱璞蘄州生知太庾縣諱伸大庾生宜都令諱守柔字光祖復以後隆名先塋之新堂玉山汪端明聖錫桐鄉朱紫微新仲廣漢張左司敬夫莆田鄭省元叔友鄉人資政胡忠簡公及王敷文民瞻楊待制廷秀而下皆為賦詩光祖之子純出以示子懼來者未詳知也故推本末遺之子純嘗舉于鄉進修勳甚公侯必復尚其勉旃嘉泰辛酉八月癸巳

跋李伯紀青原詩

李伯紀丞相宣和中爲左史坐論京師水災斥去已負直聲靖康募戰定計城守雖不能解河東之圍然一時名望甚重高宗卽位首用爲相惜乎輔政日淺規復不竟其後歷帥江湖厥有成效淳熙末諸子皆不在其姪申之進家集奏議請謚于朝孝宗似未悉其人子爲歷陳本末聖諭云張浚比歎天監在上一言盡之有司請以忠定易其名稱曰可今登仕郎曾佐出紹興初贈青原主僧師珪長篇觀其志趣亦壯矣同遊向伯恭朱子發張恭甫仕未甚顯已而俱爲名侍從坐間議論必纒纒可聽豈止翰墨之勝乎嘉泰辛酉重陽日

跋董體仁帖

前賢遺帖士大夫爭寶藏之非獨慕其名亦以禮不浮辭不枝爲可法也近歲老成待後輩例稱契丈先達與新進皆用上覆否則訝其簡驩而不疑其侮段規也後世何觀焉今讀參政董公紹興末

與會彥及蕭長才帖雖視前賢交際之禮尚稍隨時其與數十年來足恭不情者相去已千萬里矣彥及名德廣長才名甲嘉泰元年九月彥及孫登仕郎忠佐請題其後

跋蕭臺詩

永嘉錢君文子序其曾祖姑蕭臺詩三卷刻版醴陵縣治復求跋語予觀詩三百篇有當時婦人女子所賦而後世文人或不能及蓋發乎情止乎禮義之難也景祐中歐陽文忠公序謝布孟詩云隱約深厚守禮不自放有古幽閒淑女之風欲引而進之衛莊姜許穆夫人之列請以斯言附諸卷末嘉泰元年九月二十四日

益公題跋卷之四

終

益公題跋卷之五

跋文與可草書李賀銅仙人辭漢歌

蘇文忠公謂亡友文與可有四絕詩一楚詞二草書三画四世少知音惟予一見識其妙處又有詩云斯人定何人游戲得自在詩鳴草聖餘兼入竹三昧他日觀其飛白復恨知與可之不盡況當百年之後不以蘇公之言求之可乎嘉泰元年降聖節書而婦之宗人愚卿兄弟

跋秦少章詩卷

右秦少章古律詩一卷宗人愚卿兄弟示予求跋昔東坡蘇公送少章詩云秦郎忽過我賦詩如阿何句法本黃子謂魯直也二豪與指磨謂其兄少游及張文潛也又云瘦馬識驂耳枯桐得雲和其見稱許如此今卷末有和錢象仲越州見寄一首東坡蓋嘗次其韻云二子有如雙白鷺隔江相照雪衣明嗚呼少章詩名為不朽矣嘉泰辛酉十月

庚子

跋秦少章雜文

予少時讀蘇文忠公帥杭時贈秦少章太息一首謂少章從吾游不及期年而議論日新若將施于用者今觀此文三篇豈溢美之言耶嘉泰改元十月庚子宗人愚卿及二弟攜以相過敬書其後

跋向子諲遺書

靖康二年二月半金虜議以張邦昌帝楚三月七日受冊二十八日虜兵方下城京畿運副兼淮浙荆湖制置司運副使向公子諲以是月二十六日牒廬帥馮詢及淮西提舉監范應密察邦昌家屬聽大元帥康王之命是時邦昌尚未退聽而公憂國忘家明于逆順具存印檢紹興二年胡文定公安國貽書宰相秦檜曰向某忠節在今日可以扶持三綱蓋指此也至八年檜再相孫近李光竝參政事公以徽猷閣直學士致仕列其事于朝十二

月省制下公開具繳申押劄子者三人也明年正月二十九日詔送史館敕下禮部牒公紹會牒尾侍郎馮楫也今六十餘年而公會孫公起以公手藁及省部真本范冲忠義相勉之書聯為一軸將刻樂石傳之來世屬某題其後惟胡文定公以春秋學為諸儒倡結知高宗其衰賤是非得聖人之公乃獨以扶持三綱推許向公其有功于名教昭昭矣贊言何益姑為記其歲月云嘉泰元年十月跋蕭服劉達唱和詩卷

觀中書劉公達與蕭昭甫手簡及沿途唱酬詩軸則其相善可知矣二公傳載四朝國史未必家有其本錄以示蕭公四世孫祺使併藏之蕭公初謫虔州而傳以處殆傳寫之誤耶嘉泰辛酉十一月丙辰

廬帥靖康勤王跋語

宣和七年冬北虜寇入十二月十五日壬子徽宗

得警報遣內侍梁方平以七千騎守濟州舊將灌以萬五千騎守河而命節度使姚古為京畿輔郡兵馬制置使兼都統制二十三日庚申有旨內禪辛酉欽宗即位丙寅詔畧曰金人犯邊諸道兵馬合入衛畿甸除沿邊守禦人外今京東京西淮南兩浙帥司于正兵并不係正兵內精選驍銳及召募武勇委兵將官星夜部發赴姚古使喚明年改元靖康正月一日丁卯虜犯相州戊辰犯濟州方平望風奔潰灌在南岸焚橋而遁時白時中為太宰李邦彥為少宰蔡攸領樞密吳敏知縣事李稅同知耿南仲簽書所謂排難解紛不過羽檄召天下兵耳昔唐李德裕為相請詔書付宰相司乃下自是號令明審本朝亦皆三省樞密畫旨處分今廬帥所被御前劄子五道雖或貳府擬進然內夫人直筆者書之用實入通大臣不與焉使當時有一德裕必不如此第一劄正月三日也至四日宰

執欲奉車駕狩襄郢中宮皇子已行因兵部侍郎
李綱越次乞對面除右丞守城之議方決故是日
及五日無內批既而外攻內禦事勢益急故六日
復催兵七日至再八日又催戰守雖備而虜已薄
城相繼請和亦不暇督兵矣觀淮西所遣副將李
齊以印狀具述到關日月及師臣劉備跋語則竭
力勤王大略可見今側曾孫復攜以示臣臣蓋生
于是秋謹太息流涕書其復後嘉泰元年臘日

跋東坡秧馬歌

東坡蘇公年五十九南遷過太和縣作秧馬歌遺
曾移忠心聲心畫惟意所適如王湛難乘馬于羊
腸蟻封之間姿容既妙回策如策無意乎康莊殆
是得意之作既到嶺南往錄示邑宰子家亦藏
一本然不若初本允精李璆道澗之語庶幾得其
彷彿今傳三家乃至嚴臨猶幸不出一邑所謂楚
人亡弓楚人得之也近歲務忠姪孫之謹已譜農

器成公素志于嘗爲之序其與禾譜竝傳無疑矣
璆字西美宣和中書舍人紹興四年守廬陵此必
當時所題也嘉泰壬戌正月戊午

跋吳仲所藏曾子固帖

南豐先生早從歐陽文忠公游素爲王文公
所敬而與蘇文忠公友其門弟子則陳無已也今
觀遺墨恨不執鞭嘉泰壬戌二月丙申平園老叟
周某書而歸之南城吳氏

跋尹焯帖

卯寬字居之紹興初佳士觀尹彥明過九江時所
與帖其人可知嘉泰壬戌二月戊午平園周某題

跋修襖帖

唐太宗始得修襖序命趙模韓政馮承素諸寫正
榻本賜群臣而虞世南歐陽詢褚遂良各自臨模
由是流傳人間今高宗皇帝臨定武石本則唐模
本亦下矣皇諸孫臣善璆好古博雅得紹興宸奎

寶藏之屬臣某記其後臣嘗伏讀御製御書翰墨志近三千言而稱美此序無慮數四既曰淵之益深擬之益嚴姿態橫生莫造其原又曰得右軍書手之不置自束髮喜作字晚年得趣又曰右軍揮毫製序用蠶繭紙鼠鬚筆道矯勁健絕代更無凡三百二十四字有重者皆具別體之字二十許無同者歷代論書遂集大成方孝宗皇帝在王邸詔摹寫爲日課乃知二聖心書雖曰天縱亦積學之助也使羲之復生將云非恨陛下無臣法恨臣無陛下法耶嘉泰二年三月三日具位臣周某謹書

跋汪達所藏東坡字

右蘇文忠公手寫詩詞一卷梅花二絕元豐三年正月貶黃州道中所作昨夜東風吹石裂集本改爲一夜二月至黃明年定惠頤師爲松竹下開嘯軒公詩云喧喧更詆訕更字下注平聲而集本改作相詆訕嘻笑之下自添一聯云嵇生既處率孫

子亦未妙今集本改作阮生已愈率孫子亦未妙按阮籍遇孫登與商畧終古及栖神導氣之術登皆不應籍長嘯而退而半嶺聞有聲若鸞鳳響巖谷乃登長嘯也嵇康雖有承嘯長吟頤神養壽之句特言志耳其用阮對孫無疑某每較前賢遺文不敢專用手書及石刻蓋恐後來自改定也水調歌頭題元豐七年三月二十五日黃州已刻石于公法帖第一卷遠方無良工失真遠矣浴室院東堂三絕句元祐六年六月作集本但添注遂良事歲月之序如此既內殿印銜幅不容輒易至于李杜佳句公常愛而錄之路難八句豈一時漏寫歟老泉詩則家難也嘉泰壬戌三月甲寅東里周某書而歸之汪氏

跋趙弁雪圖

趙弁祖文往至臨安諸公貴人愛之凡祕書省及新作政府所画炤壁多出其手迄今固存觀此雪

圖風度可想十六弟奇字祖頴紹興中屢爲監司
王初察之壻文采似水清安靜有家法蓋其祖吏
部郎諱俛東郡人元豐末知登州民宜其政元祐
末以河北轉運使權中山府兩得蘇文忠公爲代
故祖文祖頴字畫亦皆慕藹云嘉泰壬戌三月甲
子廬陵戶掾趙公括仲肅以示周某爲題末卷

跋山谷與孫端帖

元豐八年七月孫覺莘老自祕書少監遷諫大夫
是年四月山谷以較書郎召夏秋間到京所謂子
實名端孫公之子山谷先娶孫公女故從俗呼端
爲大舅今集中有次韻寄秦少游并題寄寂齋二
詩卽其人也嘉泰壬戌三月丙寅平園老叟周某
書歸之皇諸孫仲肅

跋胡邦衡奏藁

歲在戊申高宗策士淮海胡忠簡公年二十有七
因御題問治道本天天道本民公首答云湯武聽

民而興桀紂聽天而亡今陛下起干戈鋒鏑開外
亂內訌而策臣數十條皆質之天不聽于民又謂
宰相非晏殊樞參非杜衍韓琦范仲淹旣批逆鱗
復侵當軸聖主獨察其忠擢實龜科是時直聲已
著縉紳間後十年當紹興戊午以密院編修官上
書乞斬宰執時年三十七直聲遂震于夷夏尚有
可諉曰年壯氣剛也已而竄逐嶺海去死一髮陸
興初然後還朝攝貳夏官年已六十餘議論盡少
卑之今覽奏劄殘藁忠憤峻厲視戊申戊午反有
加焉其孫知邕州擬將刻石傳遠見屬一言夫人
之生也有血氣有浩然之氣少而剛老而衰血氣
也衆人以之秉彝好德養之以直塞乎天地少老
如一浩然之氣也忠簡公以之嘉泰二年四月

跋張德遠與胡邦衡帖

右張忠獻公與胡忠簡公帖或在廟堂或居邊請
或罹憂患無不勸人以學潛心于天所謂造次顛

沛必於是今者忠簡公家集亦有與忠獻九帖往
往相應長孫觀守邕管宜併刻之嘉泰二年四月

跋陳少陽哀詞

陳少陽之死讀右丞許公哀詞思過半矣臨川梁
光遠喜聞前輩遺事寄此求跋予有少陽行狀蓋
其弟南所作今錄示光遠宜繕寫入軸以便觀嘉
泰壬戌七月癸丑

跋包孝肅公帖

右包孝肅公自帥鄉部坐失保任降知池州與同
年手帖一通惟公剛正之名至今播在人口國史
本傳云性峭直然惡苛刻務重厚嫉惡雖至人情
不及即推以忠恕未嘗偽色辭以悅人不為苟合
不作私書親舊于請一切絕之今觀此帖亦非絕
物離人者也後有戒子孫石刻末云天禧四年五
月男珙奉命勒石按公以天聖五年登甲科當天
禧時公猶未仕而于數年前垂訓如此當考嘉泰

壬戌八月辛卯平園老叟周某書而端之臨川梁
世昌光遠

曾三異所藏盤松贊跋

德壽宮苑園分四地分盤松在其北御製贊如右
今大府丞張鎰以遺廬陵曾三異屬臣題其後臣
嘗敬觀御製祭土地文為此松也其全文云維淳
熙五年歲次戊戌十一月日太上皇帝遣內侍張
宗尹特設牲宰旨酒珍果香花致祭于本宮土地
之神神有百職職各不同典司草木土示是供我
游湖園乃獲奇松植之禁苑百態千容婆娑偃蓋
天矯騰龍翠色凝露清音舞風醉吟閒適予情所
鍾壘培封殖久或力窮烏鳥外擾蟻蠹內攻神其
勦絕勿使能終精邪竊據盜斧適逢神其呵逐勿
使遺蹤常令勁質坐閱隆冬堅踰五柞弱異雙桐
歷千萬年鬱鬱蔥蔥推牢旨酒嗣錄汝功尚享件
錄以遺三異使寶藏之御書後一絕蘇文忠公賦

詩也嘉泰二年八月二十三日臣周某恭題

跋魚計亭賦

徽宗皇帝宸文天縱最重內外制詞學俱優不在此選蜀人宇文公黃中以政和六年自右史除中書舍人既兼修國史又兼詳定九域志又修神宗寶訓八年言官疑公學術淵源蘇氏奉祠而去宣和二年秋上思舊人復還詞掖方且進用而公疑不自安明年以顯謨閣待制出知陝州又明年二月爲棗陽趙公獻作魚計賦引物連類開闔今古深得東坡頽瀆之筆勢適有天幸出入侍從身名俱榮者值好文之主也趙公字彥思熙寧六年進士當元祐初英俊聚朝以奉議郎禮部編修貢籍首爲孫逢吉彥同作職官分紀序後數年泰觀少游方繼之才名亦可知矣尋自祕閣較理遷太常博士知登隨通三州召爲郎出提點京東刑獄稱帥青社年五十九奉祠就養間居二十五年其子

諱賜字又若若紹聖元年甲科大觀三年爲郎宣和四年知同州靖康中除少府監左右正言祕書少監建炎間直龍圖閣提點江淮路鑄錢子澤終胸山薄薄生漁終奉議郎通判沅州二子審學問過人恬于進取連任岳祠俱以詩鳴弟藏亦嗜學好修有子曰適慶元己未擢第距熙寧已百年而家學不絕今藏得宇文公墨刻于兵火之餘求記本末于傳有之五世其昌竝于正卿又曰世濟其美不隕其名請以是爲祝規嘉泰二年九月辛亥

跋梁仲讓尚書奏藁

紹興初高宗駐蹕臨安外禦強敵內緩疲民六宮百司事務紛至版曹鮮能稱職惟縉雲梁公仲讓迭處三省治繁以簡轉難爲易士大夫往惟比漢趙張唐晏異而已今觀奏藁近二十紙當虜來求成公敷奏其情多詐昔與遼人戰爭議和至十有二卒望其計今豈可不審旋詔遣婦朝人北還公

引宣和靖康覆轍及近遣趙榮王威彼皆用之願
爲龜鑑是時論方倚張俊抑劉錡公乞令俊分兵
進屯廬壽錡駐鎮江以備江陰訐浦福山仍戒韓
世忠臨敵持重至有二府不爲諸將所服檢發英
斷毋失機會之語又乞召楊沂中速還爲行在不
測之衛又言秦丞相檜用原樓炤謀以川陝付胡
世將乞選知兵者助之其他如淮西不可弃捷報
多失實岳飛宜以樞臣總帥江漢劉錡旣帥荆南
當雷部曲爲之爪牙至于諸路水災浙東經界擾
民纖悉具奏不特此也十五年四月彗出東方秦
自草赦文云永惟再造之邦當有維新之政宜除
舊弊用表中典方具矯誣遷就而公乃論政事失
當左右前後不思所以答天心者盍依故事降詔
求言雖問兩社任言責議論未必敢爾而公不以
典郡廢論思獻納之義忘寢與食鬚髮爲白然後
知高帝欲大用公益察其愛國憂民密禱廟算非

專以才術過人也惜乎命有所制不能展盡底蘊
肆其諸子或以文采或以治行自昭于世傳謂臧
文仲有後于魯宜哉嘉泰壬戌九月戶部郎官總
領淮浙軍馬錢糧季泌以示周某敬題其後

跋黃通老尚書奏藁

邵武簡肅黃公淳熙庚子年八十有五易箚之際
自草遺奏一通事之至大莫如故疆陵寢之未歸
事之難言莫如進退人才之未善公皆極力披陳
幾千千字援古證今無一辭消亂平生學力茲可
見矣其子衡州使君瀚以某與公接武禁塗道同
志合使題其後昔荀卿論成人云德操然後能定
能定然後能應生乎由是死乎由是嗚呼公其有
得于斯乎嘉泰二年九月

跋楊无咎画秋蘭

鄉人徐丙字漢章博于學而贈于天示予楊无咎
手画香草題曰秋蘭後有兵部侍郎章茂獻國子

博士湯君寶跋語其說特未定也子老而學圃問
 諸圃丁則曰春蘭夏芷秋蕙冬菹葉莖花色往往
 多寡不同予異其說徧以古書考之屈原離騷經
 紉秋蘭以爲佩張衡東京賦秋蘭被涯又思玄賦
 幽蘭可喻潘尼贈河陽詩流聲秋蘭之類言蘭以
 秋而花也屈原九歌春蘭秋菊隋煬帝烟花錄用此句陸機
 庭中奇樹詩勸友蘭時往注春時也梁元帝詩春
 蘭本無絕唐太宗詩春暉開紫苑淑氣媚蘭湯之
 類此言蘭以春而花也宋玉招魂光風轉蕙汜崇
 蘭抱朴子春蕙秋蘭陸機悲歌行春芳傷客心蕙
 草饒淑景是蕙亦可言春矣本草圖經蕙七月中
 旬開花至香是蕙亦可言秋矣故騷經曰蘭芷變
 而不芳荃蕙化而爲茅說文荃菴同音文選以菴壁爲荃壁蓋合四
 者而言之湘君歌亦云薜荔柏兮蕙綱荃橈兮蘭
 旌湘夫人則竝言菹壁蘭橈蕙穆芷葺司馬相如
 長門賦擗芬若以爲枕席荃蘭而莖香乃知四時

香草同出異名葉常青而花隨時自屈宋至漢唐
 皆于蘭蕙互言春秋豈特邵伯溫見聞錄證黃氏
 之誤而已然則圃丁之說未爲無據所謂禮失求
 之野歟嘉泰壬戌下元節平園老叟周某書

益公題跋卷之五 終

益公題跋卷之六

跋歐陽徹遺事

高宗皇帝卽位南京宰輔不思將順求言之美意
 專為身謀殺上書人鎮江陳東少陽撫州歐陽徹
 德明六飛南渡亟黜時相再贈二人朝奉郎祕閣
 修撰玉音惻怛過禹湯之罪已錄孤賜田光于史
 冊草制者中書舍人王居正也右丞許崧老既為
 哀詞某人鈔少陽行狀授梁君世昌刻之世昌曰
 德明吾鄉人也其孫瑀嘗哀次事始里中文士鄧
 名世亦誌其藏將并刻之按唐韓文銘死事之臣
 張徹云嗚呼徹也世慕願以行子揭揭也噫暗以
 為生子獨割也為彼不清作玉雪也德明生而命
 名與之同為國捐軀又同是真能希顏慕蘭者先
 是郡庠繪晏元獻公會子固汪信民謝無逸祠于
 講堂德明預焉其視及世不解或遺臭萬代者孰
 得孰失耶德明弟衡子飛黃將黃帖皆蒙恩補官

飛黃終建安尉瑀蓋其子也嘉泰壬戌臘月乙亥

跋會無疑所藏黃龜直晚年帖

右友人會無疑所藏太史黃公帖其前一帖崇寧
 癸未公寓武昌窺宜州十二月赴貶時畱與黃州
 何頡斯舉者明年二月南過洞庭寄家永州五月
 初道由桂林題名于行勳太師榕水閣是月十八
 日至宜有債黎秀才宅子手約今刻石秀峰帖中
 後六帖皆與融州都監高德修乙酉九月晦公卒
 自崇觀以後凡片紙隻字禁切甚嚴至炎興間則
 雖宸翰猶俯同其筆法蓋一弛一張人事也抑武
 舉有天道焉觀三代兩漢以來彝器碑刻沈埋蝕
 泐之餘傳寶百世何獨公遺墨耶嘉泰壬戌閏臘
 丁巳

跋何居仁與張斗南序

江人臨江何居仁學廣聞多下筆衮衮不休高談
 雄辯常屈坐人屢上南宮耄老而終觀送鄉人張

孝子序議論淵源詞采賅蔚胸次筆力可窺一斑其稱張君至矣古者求忠臣於孝子之門既舉其孝復勉以忠此誨人本末之序也張舊名楠字南叔後改名斗南而字如初今監郴州酒稅敏達和易喜從名勝遊子友許凌志伯高弟也嘉泰壬戌臘月二十一日

歐馮軫所藏五帖

東坡書富文忠公神道碑

富文忠之使虜所謂肅肅王命仲山甫將之也蘇文忠之翰墨也所謂吉甫作誦穆如清風也大雅烝民茲可無媿富公孫樞密蘇公猶子侍郎皆題名卷末抑所謂滅孫有後于魯者嘉泰癸亥四月戊申

東坡書陶靖節詩

東坡云吾于詩人無所甚好獨淵明詩質而實綺癯而實腴自曹劉鮑謝李杜諸人皆莫及蓋嘗和

其詩尤喜此四篇再三書之嘉泰癸亥四月戊申平園老叟周某題而歸之馮氏

東坡潁州詩

東坡以元祐六年秋到潁州明年春赴維揚作此詩題曰西湖月夜泛舟今集序以趙德麟餞飲湖上為題是也按公在潁僅半年集中自放魚長韻而下凡六十餘詩歷考東坡所至歲月惟潁為少而留詩反多蓋陳傳道履常趙德麟歐陽叔弼季默適聚于潁故臨別詩云五君從我遊傾瀉出怪珍又中間劉景文特來送行詩云歐陽趙陳皆我有豈謂夫子駕復迂邇來又見三黜柳共此煖熱餐毡蘇自注云郡中日與叔弼景默履常相從而景文復至不數日柳成之亦見過賓客之盛頃所未有乃知樵發妙思羅列于此抑有由也堂名聚星今古相望使有俗物敗人意如坡所云其能爾乎馮吳江軫遺示真蹟敬題其後嘉泰癸亥孟夏

九日

米元章上呂汲公書

右元祐九年春未改紹聖時米元章知雍丘縣上呂汲公書元章字畫豪逸非以纖令事宰相故加謹惜殆由切于為民有莊敬之心心既莊敬字畫隨之此與檄報鄰縣打回蝗虫之戲異矣雍丘本杞子國初以名縣嘗名州云嘉泰癸亥四月戊申

山谷書六一先生古賦

六一居士集共五賦山谷寫其三黃揚宜少作憎蒼蠅嫌譏刺耳外集別有四賦惟取述夢蓋因悼亡辭意俱妙類李太白耶嘉泰癸亥四月九日

題趙遜可文卷

揚雄有言事辭稱則經此為屈原發也自國風雅頌之後能庶幾于此者其離騷乎或推為經雖曰太過未為無據也晁補之續楚詞二十卷自宋玉及漢唐至于本朝諸賢辭賦問對歌詩序引之類

咸在雖一代英傑盡心力而為之遜以名世然其原皆出于離騷特體制殊耳予同年進士趙兄彥博字富文仕至權工部侍郎政事文學皆過人而詩禮之訓尤切淳熙中予在西府富文之孫時遜字遜可年方妙齡攜篋窟篋一編為贊凡辭賦銘贊傳序及莊周八篇總二十餘篇意高詞古大抵祖楚辭也予固已駭嘆其不可及後二十年遜可自尚書郎出帥大藩復示十八賦他文亦十餘篇意並高調益古號山宵斐葉屬予訂之予既喜楚詞之有傳又慶吾同年之有後也昔杜牧作皇諸孫賀集序極道其歌詩之妙當矣末乃謂賀生二十七年而死使未死少加以理可以奴僕命騷是何言歟杜審言屈宋作衙官之語奚以異大率唐人失之矜誕予無取焉今遜可年方強仕進修未艾他日復有如補之者出將擊節于斯文其附二十卷而傳也必矣予何足以知之嘉泰三年五月

題

跋楊廷秀對月飲酒辭

韓退之稱柳子厚云玉佩瓊琚大放厥辭蘇子瞻
答王庠書云辭至於遠而止矣誠齋此辭可謂樂
斯二者嘉泰三年八月二十日

跋陸務觀送其子能赴吉州司理詩

吾友陸務觀得李杜之文章居嚴徐之侍從子孫
衆多如王謝壽考康寧如喬松詩能窮人之誘一
一洗萬古而空之嘉泰癸亥九月四日

跋劉共甫胡邦衡帖

右劉共甫樞密與胡邦衡資政三帖前二者陸興
甲申共甫守衢邦衡自海道罷歸經過時後一幅
淳熙乙未共甫帥金陵邦衡隨其長子泳守官時
也邦衡書二幅所謂季羔正字者王端朝也時紹
興已卯量移在鴈峯惟知郡一幅不知何人親題
衡則乾道庚寅歲也最後子與邦衡書亦乙未歲

者鄉人羅克宜次召出以相示今遺者四十年延
則二十九年邦衡父子季羔墓木皆拱惟子養疾
山林王羲之云俯仰之間已為陳迹況歲月如是
之久乎太息題其後嘉泰癸亥九月戊寅

跋王獻之佻母墓碑

銘墓三代已有之薛尚功鍾鼎款識第十六卷載
唐開元四年偃師耕者得比干墓銅槃篆文云右
林左泉後岡前道萬世之宰茲焉是寶蓋古者範
銅精巧鑲以為器窆死皆用自漢錢幣並重銅禁
日嚴不宿業于是陶土堅緻與鉄石等予得光武
時梓潼扈居蕙甄先叙所歷之官末云千秋之宅
撫脫隸書而非鐫也又有章帝時范君謝君甄銘
以四字為句厥後銅雀之瓦遂可作硯字亦隱起
以此知東漢誌墓初猶用甄久方刻石紹興中予
親見常州宜興邑中斷出靈帝時太尉許馱塚有
碑漫滅惟前百餘字可讀大畧云夫人會稽山陰

人姓劉氏太尉之婦也任昉在梁撰文章緣起乃謂誌墓始晉殷仲文洪丞相適跋云世傳東漢墓碑皆大隸疑昉時尚未露見其說良是惜乎洪公不見漢輓也由今論之自銅易輓自輓斲石愈簡便矣嘉泰癸亥故友四明沈煥叔晦之子省曾出示越上新拓王獻之休母墓碑因詳記于後十二月壬寅

丁酉歲恭和內宴御詩草跋

淳熙丁酉九月戊午早赴明慶寺開啟聖節先是有旨令閣門依倣太宗太平興國二年故事宜宰執侍從正任內宴觀擊毬午時入東華門過選德殿其後即毬場也相對有大堂曰冰堂其左為芙蓉閣右為凌虛閣至則公卿左右朋立班樂作上乘馬來迎駕兩拜上御芙蓉閣遊城花正開群臣起居上乘馬擊毬畢下馬再坐皇太子以下奉觴稱賀上飲訖宣群臣就坐各賜酒飲酬乃接盞上臨軒

群臣分侍皇太子乘馬擊毬次左右朋擊屨傳旨宵擊既畢上乘馬歸群臣少憩幕次移刻宴選德殿酒五行宣勸者再大畧如景靈宮對御時亦用雜劇二段第四盞宣示御詩一首明日群臣皆和進某時為翰林學士此其藁也不知臨江貢士劉君昌詩何自得之後二十八年出以相示俾題其後嘉泰甲子正月辛巳

跋蘇黃門在筠州旋榜嚴標指

蘇文定公以元豐二年己未乞納官贖兄文忠公罪旋自南京簽判謫監筠州鹽酒稅明年至官又明年四月僧惟盛刻榜嚴標指要義十卷成公時年四十三史夫人四十一其九月印施十本贈機長老卷末親題名氏嘉泰甲子筠幕玉牒彥璋南夫得之求志歲月觀公文集後二十二年歲在癸未復題此經云十年來漸悟佛法經歷憂患真心不亂今輒覆熟讀乃知諸佛惠我無生法忍無滿

勝果願心守護持勿令失墜蓋與頃年求福田利
蓋之意異矣二月辛丑平園老叟周某子充書

題文氏雙秀亭詩

此子少時遺廬陵永和鎮文安國者今三十六年
矣其子立方不遠二千里攜以相示揚雄少作之
悔今威化鶴之念徒耿耿耳淳熙乙巳十月旦書
後二十年再觀于平園華隱樓嘉泰甲子三月望

跋韓忠獻范文正歐文忠與尹師魯帖

尹師魯素為韓忠獻王所重此帖可見又于范文
正公義兼師友及論陝西改守乃與范異是豈以
水濟水哉歐陽文忠公與師魯尤為道同志合方
師魯欲械治劉滬文忠作諫官奏疏云寧移尹洙
不可為洙曲故有黨比正指韓范也師魯竟自涇
帥徙知晉州尋因仇人上書論官而卒嘉祐中韓
公入相始復師魯官錄其子而歐陽公誌師魯墓
亦極口褒美前賢先國事後伸朋友之誼皆可法

也嘉泰甲子三月甲戌

題范文正公帖

右范文正公前一帖慶曆六年正月自郟赴鄧與
龍圖閣直學士田況書也况知秦州丁父憂仁宗
詔起復又遣內侍持手教起之不得已乞曠葬託
邊事求見泣請終制上惻然許之帥臣得終喪自
此始詳載正史今公既以喪道叩聖門告元均復
欲讀書涉道而自樂前賢書問類如此可與識者
道難與泛泛不情者言也後一帖呼提點疑部使
者或內外主判差遣學士則帶館閣無疑族家乃
同姓考仁宗實錄及百官表必可得矣兄弟少年
向學試為披尋此非八十老翁事也嘉泰甲子三
月甲戌

跋趙逢原得母詩卷

高宗皇帝孝通神明宜和皇后歸燕慈寧振古未
聞也風化所覃自親及疎則有宗室伯梁字逢原

居之安福縣別母三十年後乃知流落蜀中某
 少時親見其迎侍來婦名士如曾端伯及其子子
 長晃子西程詠之皆贈以詩後有朝奉郎任紳字
 公垂東州人靖康之亂與母相失齋戒禱天者十
 七年紹興和戎河南來婦徒步求母而得之奉事
 十有八年詔擢剛定官又兵部沈尚書介字德和
 湖州人宜和間父官濟南生德和而嫁其所生兵
 亂莫知存亡紹興末以祕書少監使北方往回厚
 賂驛舍承應人宛轉物色得母所在婦懼荆襄將
 帥指金用間母遂與其異父弟偕來皆奇事也今
 蓬原孫豐城主簿希恭出示舊詩予方修廬陵志
 當併記所聞備史官采擇以彰聖化嘉泰四年四
 月二十一日

題平園圖後

使臣王思恭昨寫予真求贊因記書對文苑之勞
 今又繪平園圖集予詩文于後用意益可嘉也嘉

泰甲子端午日

題宋姓西園詩藁

金華宋姓字茂叔生于紹興壬申十二月三日卓
 然自立為鄉里先進所知從呂伯共學其論通鑑
 貫穿不窮伯共大奇之紹熙改元第進士主筠州
 高安簿豫章帥漕王謙仲丘宗卿尤延之鄭舜舉
 皆待以上客宗卿使虜以為書狀官繕循從事耶
 榘融州秩滿辟廣西監事司主管官漕張君量胡
 元之又待以上客蓋其氣象和平議論堅正明敏
 足以決事廉勤足以勵俗不幸年四十餘卒官平
 時于經史皆究極本原尤工詩篇與寄殊高遠嘗
 大陸務觀韻云欲求平易多成拙稍學新詩
 工得句直須參造化此身何必計窮通
 可見矣其子自適亦佳士示君西園詩藁
 後嘉泰甲子五月乙亥
 益公題跋卷之六






3

4

1566

益公題跋二



叢書集成

初編


主編者
王雲五

商務印書館發行



跋題公益

二



3 0649 1834 9

撰大必周

益公題跋卷之七

家藏御書

紹興淳熙兩朝內禪詔跋

淳熙十四年臣某誤尸宰事恭奉至尊壽聖皇帝
 手詔命今上皇帝參決庶務越明年正月開議事
 堂傳授之意昭然會故相陳康伯家繳進紹興內
 禪御札默契聖志密遣中使持以賜臣自是開通
 位之訓又明年春歲奉親筆移御重華於是兩朝
 宸翰東宮謝章皆萃私室後四年臣假守長沙漕
 臣何異願得摹本刻石盱江之麻姑山俾臣記大
 略于下臣竊惟孔子大聖人也抱帝王之學而無
 其時定書百篇以堯舜二典為之首意猶未足嘗
 以堯曰咨爾躬舜亦以命禹之數語者諷道之于
 口諸弟子因記善言遂以為論語末章之冠凡二
 十篇所載惟精惟一允執厥中之旨無大于此者
 向使夫子遭堯舜之時居禹舜之位奮麻熙載自

應見諸行事豈特載之空言而已臣
 宰輔乃萬世一遇非大幸歟夫奉本
 學士大夫有不容見闕宸文於金匱
 得窺焉至於藏之人臣之家不過榮光
 騰池孰若傳之副墨刻諸名山如日麗天萬目咸
 覩如岳鎮地永世無窮彼周石鼓秦嶧山漢燕然
 唐涪溪尚何足尊他日聖人復起比宋德于唐虞
 配斯文于二典其由此也夫先是高宗以壬午五
 月甲子降旨立儲丞相康伯折簡禮部侍郎呂廣
 問密議典禮時土王祀黃帝廣問為初獻官臣以
 監察御史因語臣皇太子改名從火從華臣謂唐
 昭宗曄字同音可乎廣問亟告丞相取旨別擬定
 乃用今名宣布而初札不復改矣當時朝士尚不
 及知況于後世疑以傳疑將何所取正敢併列之
 背他日史臣採亦以見臣今得寶藏是書者非偶
 然也紹興四年十一月朔旦少保觀文殿大學士



判潭州軍兼管內勸農營田使馬步軍都總管益國公食邑一萬六百戶食實封三千八百戶臣周某謹題

高宗皇帝

紹興乙丑御筆跋

右紹興十五年四月宰臣以下拜表乞御殿復膳太上皇帝御筆付學士院淳熙五年四月臣偶因入直緡故書而得之敬命工標飾寶藏于家學士臣某謹記

御筆千字文跋

臣以紹興丁丑中詞科今上皇帝在普安邸數對宮寮稱其試程逮庚辰九月召試館職太上皇帝喜所對策諭宰相陳康伯參政朱倬欲除授書郎宰執奏選人只當為正字偶不記前朝李邴等例耳上又宣諭他日當令掌制康伯親為臣言如此未幾自依格改秩而授書丞郎著作關員進擬皆

不及口口雖簡記然非侍從臺諫未嘗親批壬午夏察官陳良祐引執政汪澈荐舉之嫌出臺為郎五月御筆監察御史尋闕諫官同僚為臣必選臣測聖意不在此果就下用袁字為正言今上受禪累月遂擢左史兼外制此則兩宮本指也後十七年叨忝大政表謝太上云鑿坡召試金口褒揚許以能文欲其掌制之援助廟堂之上甘滯留館閣之中會臺寮之虛員簡宸衷而親擢皆記實也暨入謝德壽宮太上盡已本末面賜御書千文一軸前者執政罕嘗得此退而伏讀太上御製翰墨志云智永禪師逸少七代孫克嗣家法居永興寺闕三十年臨逸少真草千文擇八百本散在浙東後并稜帖傳弟子辨才唐太宗三召恩錫甚厚求稜帖終不與善保家傳抑可重也余得其千文藏之今觀宸奎所臨疑皆是本淵民旦之外又缺才字按米芾云吳郡滕元發家藏辨才弟所書併闕

承字以尊智承茲拜賜書却有承而無才字豈非辨才門人別本歟謹刻於石歷敘遭遇之由以示後世淳熙七年七月日通議大夫參知政事榮陽郡臣周某恭題

御書禮記經解石刻跋

右御書經解一卷紹興三十年三月詔摹本賜新進士梁克家以下臨安守臣端禮因以別本分遺百執事臣某時爲大學錄謹受而藏之

孝宗皇帝

撰國書御筆跋

乾道六年冬詔差趙雄趙伯驢充金國賀生辰使十二月二十四日夜直玉堂內侍霍汝弼持御筆來令例外撰國書二鼓進于二十七日得旨來早對二十八日早自東華門行修廟曲過小閣兩重皆垂西簾復轉一小閣前臨清池中有假山上坐杙子再拜起居訖策獎諭前日朕未曾宣諭卿以

國書之意而卿能道朕心中事可謂大才袖出范成大所攜虜主回書云九月日叔大金皇帝致書于姪宋皇帝和約再成界河山而如舊緘音遽至指筆洛以爲言授曩時無用之文讀今日既盟之好既云廢祀欲伸追遠之懷止可奉遷卽俟刻期之報至若未歸之旅柩亦當並發于行塗抑聞附請之辭欲變投書之禮出于率意要以必從于尊卑之分何如願信誓之堅安在事當審慮邦可乎休方界霜嚴善綏福履今因資政殿大學士范成大等回專附書奉答不宜捧讀數遍奏云臣初不知彼專說陵寢刻期俟報今止及受書竊恐未安上曰難爲辭奏以太上高年未敢奉遷答之如何上不以爲然又奏容臣別作意度來日封進退詣都堂上已批降前禁付二府矣於是改書曰比致祈懇旋勤誨緘欲重遣於輅車恐復煩於舍館惟列聖久安之陵寢既難一旦而輒遷則靖康未

返之衣冠詎敢先期而猶請載彼諄諭之旨詳及授書之儀蓋今叔姪之情親與尊卑之體異敢因慶禮荐布忱詞尚冀允從式待企望今賀生辰國信使副翰林學士趙雄泉州觀察使趙伯驥行謹再奉書不宣二十九日錄進三十日宿衛加上德壽宮尊號冊寶于麗正門待漏院宰執在皇城司招往諭旨令削去陵寢衣冠一聯雖具言其不可弗聽也七年正月十二日雄等出門十七日丞相忽召至都堂云虜果移文問二事何爲無報甚悔不用前說答云幸彼問差早度尚可及空亟易書馳遣而檄對竟云所問已有書附賀生辰使者矣仍錄本付雄毋如慶曆中不使富弼知書意也二府特以爲然奏行之追及雄于盱眙虜自此亦無辭祕書少監兼權直學士院臣周某謹記

皇太子領臨安尹御筆并御批詔草跋

乾道七年四月甲子詔皇太子兼判臨安府用至

道故事也或謂當以大中大夫爲判官通領府事恐名稱未正遂議改尹而以侍從爲少尹餘判推官用卿監郎官丁卯將鎖院降麻或又疑宜麻給告非待儲貳之禮已已後省官會議於史院檢照唐太宗征遼命太子監國及大帝命太子受諸司啓事或詔或制與尋常白麻不同可以爲則上然之庚午臣當日被宣中書舍人范成大先以待講邊宿蒼黃而出薄暮至玉堂御藥李某持御筆皇太子某宜領臨安尹總二十字有御押焉三鼓進草又擬格式一通御批竝依辛未遂告大廷推此盛典號爲稀濶而臣適以史官備討論詞臣參潤色復得宸翰寶藏于家非僑生之榮遇乎祕書少監兼權直學士院兼國史院編修官實錄院檢討官臣周某謹記

王炎除樞密使御筆跋

乾道七年七月二十六日國忌假薄暮快行忽宣

鎖院既至御藥甘澤齋御札來除王炎爲樞密使
依舊宣撫又出方寸紙載選將帥足財用及招軍
買馬等事傳旨云晚不及召對令論費用炎之意
澤退吏匆匆擬熟狀進入徐念向來未有中大夫
爲樞密使者別具奏乞轉大中奉御批依不然遂
失故事矣初炎與宰相虞允文不相能屢乞罷歸
允文荐權吏部侍郎王之奇爲大議除大制充四
川制置使允文欲進雜學士上疑太超躡此月十
三日乃先正除之奇侍郎上猶難之當令學士院
取侍從入蜀例俱無以對暨宣炎制宰相以下皆
莫測云新除權尚書禮部侍郎兼權直學士院兼
同修國史兼實錄院同修撰臣周某謹記

改左右丞相御筆并御批詔草錄跋

乾道七年十二月辛酉有旨以僕射之名不正欲
採周漢舊制改左右丞相令有司討論臣適備數
史院與聞其議右揆虞允文深不以爲然嘗語客

云既易履爲靴又改相名與虜奚辨有司知其意
亦頗遲遲但條具歷代宰相官稱中尚書省八年
正月巳卯上忽遣中使王某至臣私第傳旨問緩
故回奏云昨日上之矣允文始以進呈二月癸卯
御筆令草詔登時封入迫遽殊不工尋奉御批依
卽寫大本請寶乙巳御前誤用答臣僚辭免不允
詔例復付學士院丞具奏繳進乞降付中書門下
省後五日遂鎖院拜二相詳見拜相御筆跋上初留乾道
新書未頒欲候改丞相修入雜歷允文難之聞上
嘗遣人諭以毋沮過此事蓋自左揆陳俊卿去國
允文獨相久之言恢復寔不驗且以專政稍失衆
心或謂上欲進梁克家故爲是舉云新除權尚書
禮部侍郎兼權直學士院兼同修國史兼實錄院
同修撰臣周某謹記

虞允文梁克家拜相御筆跋

乾道八年二月庚戌從駕過德壽宮既歸得旨申

時赴東華門祇候宣引至則闕有內宴或云恐改日言不敢退酉後忽引入選德殿起居單上出親札一幅諭以拜二相奏云命相轉官前例固不一今竝命而或三或四更取聖製上曰大臣同心輔政革苟且之弊故衰進之然特進一官即少保所以允文只三官又請戒訓大指上再三曰衰之而已前設小案伸紙其上屢以牙尺漆匣盛小歛研玉格真筆兩枝墨一笏髮便坐所御者遂鞠躬除目進呈奏問兼樞密使否上曰今樞密亦非古先改丞相稱呼將來別理會且帶可也又奏所領書局上曰卿自焚勸又及左右相序位上曰欲升左三少之上三公之下賜坐奏問賀正使回房中無他否上曰無事但聞築黃河堤耳速開請起宜坐賜茶飲訖再拜而退御藥李彥直同自禮道入學士院已乘燭矣舊例草后妃宰相制皆有錫賚紹興以來就賜御前所用金硯匣筆格鎮紙糊筒黏

版等後既不設此乃謂打造不及金百兩代之殆減半也凡鑲院若中書進熟則隨事云鎮某日欽曉快行數十輩絡繹宣當直官遇大除拜臨時特旨宣召上帽帶御別殿面諭之俗呼鎖小殿子今日上特祕其事不用宣鎖之制院吏授夜關闕門移御史臺報百官聽麻雖虞允文亦謂用新制改官名爾明日雙制出始大駭且疑學士多轉梁克家一官為有所抑揚云權尚書禮部侍郎兼權直學士院兼侍講兼同修國史兼實錄院修撰臣周某謹記

幸學詔御筆跋

淳熙四年二月辛未奉御筆如右前一聯大哉王言也後八字毋固毋我也試尚書吏部侍郎兼直學士院臣周某謹記

御書白居易詩跋

右唐白居易太和八年以太子賓客分司東都賦

飽食閒坐詩一首淳熙五年皇帝親御翰墨下臣拜受而寶藏之謹按居易先以長慶二年過漢江賦詩云秋水浙紅稻烟烹白鱗今復云紅粒陸渾稻白鱗伊水魴蓋於一飲食間默寓忠愛不忘君之意所謂造次必於是者時文宗雖恭儉儒雅而中人之禍已萌其云朝廷重經術草澤搜賢良殆譏不能用劉蕡也又云堯舜求理切夔龍啓沃怙言上雖銳意于治而王涯口口爲相非徒無益也又云懷才抱智者無不走遑遑指李訓鄭注等也明年而甘露之亂果作居易其知幾乎生雖不逢其時孰知三百餘年之後乃一遇聖明發揮其語光榮多矣臣叨陪近侍獲此宸奎敬題卷末以示來裔翰林學士臣周某記

後七年當淳熙乙巳歲四月戊辰臣某稽首重觀于西府

御書蘇軾和唐人惠山泉詩跋

右蘇軾元豐二年自徐州移守湖州道由惠山和唐人三詩皇帝書其首篇臣某敬寶藏之淳熙七年四月一日吏部尚書兼翰林院學士承旨兼侍讀兼太子詹事兼修國史臣周某記

御筆掌記跋

上勤勞萬機每臨朝以方寸紙作掌記微偃兩旁而中摺之實在御手若內殿則開香案上三省密院各奏事畢卽視所記俟宣諭已乃收之率以爲常淳熙十一年八月十七日後殿坐親以此紙授臣蓋記陳有功詹大舉趙善誦三人姓名字畫頗類御筆以小楷不能深辨玉音云此是去年臣僚荐可爲奉使接送伴副使者卿選擇誰可又問劉端姜特立如何臣奏皆其選也退而寶藏于家樞密使臣某謹記

光宗皇帝

東宮秋兩詩跋

淳熙四年八月四日東宮講畢袖出御製秋雨過書懷詩一篇六日又蒙送示和章詞翰雙美光照

御批辭免兵部侍郎不允奏跋

右辭免兵部侍郎奏其云灼見肺腑蓋聖語也御批降詔不允翰林學士王淮撰文正本藏篋中別令書待詔鄭漢卿錄于後寫奏者待詔雖榮祖淳熙二年閏九月臣某謹記

內批辭免侍講不允奏跋 淳熙二年

右手書辭免兼侍講奏內批降詔不允權中書舍人程大昌視草既以真本藏制書篋中復令學士院待詔鄭漢卿錄本于此閏九月十五日臣某謹記

御批辭免兼太子詹事降詔不允奏跋

淳熙二年秋太子詹事沈樞罷王淮尋入西府衆謂吏部侍郎趙粹舊爲宮僚兼權中書舍人程大

昌乃恭邸講讀官宜在此選而臣猥以小司馬蒙恩承乏亟具奏控免其云英望舊僚實指二人上親批降詔不允四字時翰林無他官例下西掖視草於是大昌用綺里事對李勣蓋相酬答也元詔寶藏篋中特令待詔鄭漢卿錄本附辭免之後其奏亦院吏闕端朝所書敬加標書傳示子孫十一月旦臣某謹記

內批辭免經修太上日曆轉官不允奏跋

右辭免經修太上日曆轉官奏內批降詔不允詔權直學士院程叔達撰既藏正本復令待詔錢滋別錄於此寫奏者筆吏吳牧也三月二十七日臣某記

御批辭免內翰不允并詔書跋 淳熙四年

右辭免內翰奏上親批降詔不允詔書程叔達撰文并以謝宣詔表葉附其後六月既望臣周某謹記

御批丐祠不允奏并詔書跋

淳熙五年五月請對丐外上恩不允閏六月繼請又不允會諫議大夫謝廓然乞令朝士久次者聽更迭補外於是吏部尚書韓元吉侍郎李椿相繼得請或謂臣汚朝最久廓然未必不相及既袖札子面奏即蒙宣諭云無人譖卿元吉以老李椿以病乃許其去卿何預此況諫疏亦非謂侍從也卿奏便批降詔不允毋得再請其餘獎勞之語不復具載敬以御筆及中書舍人王希呂所草詔書軸藏于家九月三日臣某謹記

內批辭免幸秘書省轉官不允奏并詔書跋
右淳熙五年九月同史院官程大昌等四人辭免車駕幸秘書省轉官奏內批詔不允陳騷芮輝官品未至直批不允而已時翰苑無他官例付中書後省於是權舍人鄭丙實視詔草臣既實藏而軸之命院吏錄批語諮報三省劄下臣騷并臣輝俾

有所被受益一時綿絕也十月旦日臣某謹記

內批辭免春官翰苑不允奏并詔書跋

淳熙五年

右辭免春卿兼翰苑奏內批降詔不允院官崔敦詩視草十二月六日臣某記

御批丐祠不允奏并詔書跋

淳熙五年冬臣為學士一年有半矣數求去未遂曾觀韓彥古輩間言曰間因答北虜賀會慶節國書曲意指撻適殿帥王友直提軍大擾密疏其事遠近滋不悅孤蹤益危急援揚億鄰壤事引咎丐祠而上恩過厚保全甚力御筆塗去說改國書等六十餘字親批降詔不允不得再有陳請他侍從殆無此禮以是不敢復言旋被獎擢進位宗伯視草如故蓋異數也今以宸翰同崔敦詩所撰詔書共為一軸而藏曲折于後十二月七日臣某謹記
內批辭免經修乾道日曆轉官不允奏跋
右辭免經修聖上日曆轉一官不允詔權直院崔

敦詩撰待詔王世賢為其奏乃筆吏曹大亨書淳熙六年四月五日臣某謹記

內批辭免東宮講禮記徽章轉官奏跋淳熙六年

右辭免東宮講禮記徽章奏內批降詔不允今以權直院崔敦詩所作詔草附其後使子孫識玉堂詞頭之一其為奏乃筆吏俞允迪也六月一日臣某記

內批辭免吏部尚書兼學士承旨兩奏跋

右淳熙六年冬辭免吏部尚書者一辭免兼學士承旨者再兩奉御批降詔不允其詔并崔敦詩草各附真草於後上批第三奏云依已降詔不允不得再有陳請徑付三省亦錄堂帖於此明年二月手奏乞依舊分日內直上親批十一字今共為一軸寶藏之三月旦臣某謹記

御批巧祠不允兩奏并詔書跋

淳熙六年九月宗祀禮成即請對巧祠上願露大

用之意親批降詔不允四字詔中書舍人鄭丙撰待詔羅來祖為

外不相說者故漏密指而誦言之是冬遂徙吏部尚書明年夏擢參大政權要近習絕無知者蓋上察其奸也第二奏又有御批十二字乃取諸省中附卷末七年六月一日臣某謹記

御筆辭免吏書兼承旨兩奏跋

淳熙五年五月四日對濟華閣巧外上曰內翰未可去方將擢用安祥卿監郎官能文者相代且令撰選德殿記至閏六月記成十四日進呈於倚桂殿上再三稱善遂出求去劄子上曰屢令卿荐一人能文者此亦何嫌尋御批降詔不允詔中書舍人陳然相忌七月一日復入奏申前請上又親批十二字付外後二年入中書得以案底附卷尾非特寶藏宸奎亦使子孫知恩遇優渥如此相勉圖報云七年六月十日臣某謹記

御批巧祠不允兩奏跋

淳熙七年四月臣以病求去上親批降詔不允視
草者學士院官趙彥中也既拜賜復具奏申前請
上又批依已降詔不允不得再有陳請奏下三省
中書批旨勝本丞相趙雄參知政事錢良臣押字
于歲月之下用中書省印舍人鄭丙押其背錄以
黃紙用門下省印謂之錄黃宰執給舍皆簽名然
後送尚書省出劄子其次序如此後一月臣蒙被
恩擢參預政機既取原奏于翰苑附以詔書又進
第二奏及底本于中書聯為一軸非特寶藏宸奎
亦使子孫識省中文移之大略云六月二十有五
日臣某謹記

淳熙癸卯生日御筆跋

右淳熙癸卯受生日牲餼文書一軸首以宸翰而
詔書次之趙彥中賜目又次之用錫賜併錄謝表于
後例以生日先是夏早七月十一日侍講李燾進
五更投進

故事乞避殿損膳求直言十二月上諭三省令降
旨如故事丞相奏恐合降詔臣等亦欲待罪郊外
上令召學士院官趙彥中草詔仍許侍從等實封
言事十三日四鼓宰執分詣天地社稷宮觀禱雨
禮畢赴後殿起居從駕過德壽宮回竝出浙江亭
有頃中使宣押歸第次日歇泊不坐例入局治事
私念於理未安約丞相再奏乞罷黜而賤生之日
適在既望當賜牲餼方此引愆亦難下拜乃別入
奏控免仍報天章閣勿排辦十四日中使復宣押
入堂具御批十六字于免奏之後於是天章閣奏
審依式前一日賜今已日晚上令就來早十五日
辰時內侍鄭懷持詔來蓋新儀也既拜賜于階下
與懷同升廳撥笏拱讀詔書及賜目訖就坐茶湯
如常送懷錢十五千從人三千取旨本關使臣厚
子快行各支錢酒有差翰苑舊例抄生日詔止畫
進呈之日往往與文不相應昨日蒙恩直院即奏

云雖前期進草其晝日欲隨生日後肯從之遂為定例因詳載於此臣某謹記

益公題跋卷之八

家藏法帖書畫碑刻

題後省封事看詳

紹興壬午秋上新卽位詔求直言四方封事皆至或留中或付後省看詳時中書舍人劉珙出使某與給事中全安節舍人唐文若晝夜分閱次第上三省而省吏以逐房事有所主互相避免不卽以聞九月有温州潘生投匭言前所上書有司不為施行御筆督責甚峻是月十八日也翌日某約安節文若攜此藁就漏舍白執政欲少道蔽抑之罪執政遂袖至榻前某是日立左螭望見御手開閱數四天顏甚悅退朝赴講筵安節留身頓首謝上曰早來執政已詳言非卿等過也後三年歲在乙酉繕故書見此敬題其後而不敢毀所以尊御覽也五月一日

潘生恐召天覺

題夜光集

子以丁丑拜命分教金陵庚辰春入官學者凡三年間書啓往復與夫士友相遺者皆聚此編示不敢忽也

題秦少游瑤池宴

少游所書瑤池宴蘇易簡也事在冷齋夜話湖山野錄止有數句恐與此不同 乾道辛卯九月十七日周某子充題

後四年令工鄭源重裝時再掌內制故用翰苑印識之

淳熙跋詛楚文

右詛楚文待制董公守汾日辨證刻石先公時爲州學教授實爲書丹後四十年得副墨于董公之子弁今十年矣此文六一先生集古錄趙氏金石錄方相泊宅編皆爲之說而嚴陵延平各有別本今特以爲先公手澤在焉故重刻之蓋爲家塾之寶也淳熙元年甲午七月十九日嗣子某題

家塾所刻六一先生墨蹟題跋十首

試筆

世傳文忠公試筆自說研而下凡數十紙有元祐四年九月東坡蘇公跋此最後數紙也初入劉氏後歸王晉卿今復遺歐陽氏餘不知何之矣公薨于熙寧五年距元豐五年其遺墨已爲諸公珍愛如此況百世之下乎淳熙甲午十月廿八日某書

唐贊草

右蕪郡人會昌尉羅良弼家良弼字長卿博雅士也

錄徐嶠書

右蕪郡人安遠令曾崇家試察之下尚有孟乘二字餘皆漫滅不知何人帖也

會食帖

右爲帖不竟豈筆誤別書抑意倦遂止也

誨學帖

右因友人胡公武而得之世有歐陽忠公別集二

十卷自志學至夢奠詩書惟說之類文集所略者
舉集焉而亦不及此乃知遺書散軼多矣惜哉

小草古詩賦

右藏思仲之子將作監丞當世所或脫字弗補或
衍字弗塗或意未愜重書悉仍其舊

臨小草洛神賦

右臨率更所書洛神僅存其半某實保藏之王子
敬好寫此賦決非一本殆率更臨本耶比近世所
刊字畫差瘦小云

家藏小草洛神賦 不魯入石

錢穆父謂王子敬草洛神賦在范堯夫王晉卿苑
中濟三家元祐未合而摹藏之遂以入石今歐陽
文忠公所臨四百八十五字題云歐陽詢書或乃
以穆父所聚即率更筆未知孰是予不識書特以
人之賢而寶藏之耳按歐陽家譜文忠蓋率更三
十代孫是固一家也紙背乃晏元獻行狀當時求

銘于公者淳熙二年十月一日東里周某記

家書

右與伯和家書蓋熙寧四年守蔡時也後兩月而
公歸矣今藏元孫儒林郎雋所

前漢玉器銘

六一堂集古錄千卷卷為一透縹以細紙束以縹
帶揭秩次于外列名物于首而係考證於後銜幅
皆用名印其精謹如此靖康間公諸孫避難南行
不能盡載乃取遺澤而棄舊刻此五銘者總為一
軸背尾獨備人皆云前漢昭宣時字畫跋誤以始
元為宣帝
年公得之頗艱愛之甚且以劉裝手書附其中
今併刻之不特使後世識其全篇體製抑亦成公
遺志也歟五風黃龍三器字極小兩銘雖大而瘦
勁刻銅既不能深藏久印染復點昧熟視之前銘
容十之下但晦平字與後銘同亦彷彿可辨蓋不
必均以四字為行也

總跋自刻六一帖

歐陽公道德文章百世之師表也而翰墨不傳于故鄉非缺典歟某不佞好公之書而無聚之力間有藏其尺牘斷棄者輒假而摹之石多寡既未可計則先後莫得而次也替公爲集古錄上起周穆下迄五代雖僊釋詭怪平時力闢而不語者苟一字畫可取一事迹可記莫不咸在旣軸而藏之又從而發揚之惟恐其泯沒無聞于世嗚呼公之存心可謂仁也已矣老子曰其事好還天殆啓予衷哉不然以公心畫之妙宜冶金伐石布之四方久矣而予何足以與此

題六一先生丁憂居頽帖

右六一先生丁母憂居頽時兩帖故人朱蕪湖似知予方刻先生遺墨持以相寄按蘇子容丞相傳爲南京畱守推官歐陽修以府政委之曰子處事精審一經目覽修不復省矣則前帖遺蘇無疑後

帖與知縣寺丞不可考也先生母夫人實歸附吉州永豐縣瀧岡阡頽西之地未嘗用云淳熙己亥十月十四日

右歐陽文忠公丁母憂居頽時二帖文忠嘗畱守南京蘇丞相歎曰吾家初得前帖固疑遺蘇公者會蘇公曾孫玘相遇見而歎曰吾家青毡耶尚有秋寒帖事辭與此相貫他日并二跋攜以示余然副墨爾不若予有此真蹟也因錄其卷尾以著夫賓主之賢焉樂安者文忠所封郡也後一帖與知縣寺丞不知何人按文忠公母夫人歸附吉州永豐縣瀧岡阡其言瀧西地蓋未嘗用也淳熙七年歲在庚子二月二十四日東里周某題于摘文堂先公己亥年旣題居頽帖其後庚子年再得蘇氏秋寒帖副墨蘇丞相二跋遂改初本方崧卿已刻于六一帖第六卷今以舊藁手澤具在故兩存之某謹書

題六一先生九帖

右文忠九帖皆與其姻戚者宣和後簡板盛行日趨簡便親舊往來之帖遂少使前輩時已如此安得翰墨流傳百世耶淳熙辛丑季春三月周某書

題六一先生與王深甫帖

右同年史志道送歐陽公帖一紙深甫必王回也淳熙庚子二月二十九日周某子充

淳熙十五年四月二十八日觀舊題轉燭八年而史志道墓木已拱太息久之

題六一先五代史藁

右歐陽文忠公五代梁史斷藁九葉其元孫僕攜以相遺余曰陳尊俠徒也其書人猶藏去況文忠翰墨乎雖然在子孫則為手澤世當寶之他日得傳玩足矣僕曰僕無子羣從又多流落謀食之不足且以揉壞如此終當棄之耳予既悲其言為加緝治而題其後淳熙十年二月五日東里周某書

跋六一先生詩文集

右六一先生詩文集二幅其元孫休息四明攜以相遺休尋臥疾旅即予體之使歸至家而歿此帖遂留于家

題六一先生夜宿中書東閣詩

右歐陽公嘉祐八年冬末詩按照陵以是年春宴駕十月復上時厚陵再屬疾兩宮情意未通故有攀髯路斷憂國心危之句云淳熙乙巳春某謹記

題六一先生家書紙背猪肉帖

右熙寧三月春歐陽文忠公家書一通蓋其仲子下第時也前二年公方自毫帥青故戒以勿令人城所謂黎君卽州學教授公集中嘗贈答三詩曹不知何人其舊吏或邦人之賢者歟紙背乃壽光邑官光穎謝書偶無其姓壽光青屬邑公職帶觀文官為兵書屬吏捨職呼官又不稱在朝前街當時大率不以為簡也所送纔猪肉斤餘非上丁分

昨則例冊如此前雖翦去度不過尊酒之類豈敢
如近歲公遽甲令上下以貨帛爲禮耶以狀易牒
蓋自元豐四年十一月改行公式士大夫亦改之
云見司馬氏書儀第一卷注淳熙十二年十月十一日周某書

題六一先生慰富文忠公書

右歐陽公書彙必是與富文公以嘉祐六年三月
丁憂歐公方爲副樞是年閏八月遷參政至明年
正月則入東府恰半年與書詞正相應或疑京洛
密邇何爲經歲方遣慰疏蓋仁宗本虛首相起富
公公懇辭甚力閏月方許終喪韓忠獻公遂拜昭
文而歐公亦遽遷又數月然後發此書爾淳熙戊
申三月二十九日某題

題呂吉甫帖

白樂天持心忠厚安肯幸時宰之禍識者讀詩便
知真焉不待考歲月先後也呂吉甫幸災乃爾於
溫文正公何損直似罵耳其視樂天可分顏跖表

而出之使觀者略窺其心術淳熙丙申上巳

後七月歲次癸卯十一月太史李仁甫見此帖
命其子應題其後考證極爲精詳謂溫公誤國
者陳瑩中矯枉之言也某重書

跋十賢相帖

十賢相帖或手書或口占合爲一帖思人愛嘉木
之義也淳熙三年四月三日重裝

太父秦公考試耀州倡酬詩卷

政和乙未大父知郟之洛交縣邵封二公同考貢
士於耀州此當時倡酬也二公又與族伯同以大
觀三年登第故少詩及之後十餘年歲在己酉大
父既薨家寓廬陵會金寇掠地避難於安福縣楊
梅村書篋悉寄王秀才家亂定化爲烏有五十年
間雖聲迹相邇然不復致詰矣淳熙初某備位於
朝王氏子攜之遠來乃泣而識之丁酉中秋某重
裝

淳熙丙午中秋日某再觀于西府王氏子名之記

題于祿書

子開成四年湖州刺史楊漢公跋顏魯公于祿書碑云工人用為衣食業晝夜不息利缺遂多親姪顯項牧天台欲移他石費用且乏不能克終漢公繆慈業陰得以餘俸成之乃知唐時不敢妄用公錢如此近世若止刊刻文字乃是伯夷公儀休其他以公帑為私帑可勝計哉淳熙戊戌七月二十一日夜偶書

題王荆公家書

右王荆公與和甫二書前一幅嘉祐五年為江東提刑時後一幅當在熙寧末或元豐初也卷首十字乃亡弟子乘道跡屢讀憤涕淳熙七年三月一日周某子充題

題蘇文定公批答二藁

右元祐四年蘇文定公與丞相以下批答二藁首尾以省覽允許為兩官之別蓋定制也家藏久矣此或夏官適公曾孫誘為同舍郎出以示之乃謂公子遲代書熟視信然蓋字畫太真謹爾淳熙庚子三月乙亥講筵退置酒學士院與侍讀史少傅侍講王尚書說書崔著作同觀某題

跋韓魏王與包孝肅公帖

右魏忠獻王與包孝肅公帖王慶曆八年知定州在鎮五年孝肅皇祐四年方自諫院出為河北都轉使當是時也稽子細事省費重農委曲尚爾則凡興利除害惠及民者固應不遺餘力搥鼓立祠豈徒然哉淳熙八年

題山谷書太白詩

乾道庚寅寓直翰苑書錄山谷草書李太白詩使開卷者不至愒恍淳熙甲辰十一月十七日復題於西府俯仰之間已十五年矣

題山谷書長楊賦

山谷書此賦三十年而會紆公褒跋其後又五十年而東里周某題于行在所淳熙甲辰十一月十七日

題初寮王左丞贈曾祖詩及竹林泉賦

大父太師與初寮先生同為元符庚辰進士大父在忻州法曹侍曾大父太師以行先生謫濠州里椽未赴而母裴夫人卒其考孝孫宰代州之五臺縣先生端憂侍旁曾大父遊臺回過之先生年才二十九投贈古賦律詩各一篇詞氣臺臺乎東坡字畫駸駸乎山谷蓋崇寧癸未歲也後十五年而

先公莒公以文受先生之知又七年先生自燕山以檢校少師入為實籙宮使兼侍讀時大父倅廬陵始刻斯文於石系以跋語未幾亡之而某實藏其真跡紹興丙子抱關京局又燬于火恫傷乃心寤寐弗敢忘今先生季子通直郎辟綱出示錄本

捧讀恍然如魯人之得寶玉大弓燕人之悲晉國

城社也泣書而重刻之庶幾副墨之子洛誦之孫

傳之乎無窮蓋自宜和乙巳歲行適周其日月又

同嗚呼此豈人力耶數也十二月且孫適奉大夫

樞密使榮陽郡公某謹記

通直郎田
榘填諱

題東坡與佛印元師二帖

國極老僧者年八十坐亡于湖州道場山留手書并以坡字寄子為訣時淳熙乙巳臘月二十七日也佛印元師兩住金山東坡往來數見之嘗以玉帶襦裙相唱和計平時書問甚多殆元祐中所作耶明年正月十五日某題

題東坡子高無雪帖

丙午秋有衣冠子持坡帖兩紙從小兒鬻錢以七十千官陌得之朝士有祕書監沈虞卿檢正尤延之彈見洽聞因請題其後

題東坡遺遊卷銘

右吳子野遠遊菴銘廬陵鄉僧知顯項在廣東得之富胄之家自云傳授皆有據寶藏數十年淳熙丙午住通州琅山大病垂死囑其徒從子易錢二十萬爲塔費會病愈相訪前舉是說予笑曰與其死後求售孰若生前踐言旣歸遂以爲寄且謂人多指爲屢公能識真不暗投矣然予亦未敢自信以賴兄書鑿極精走介求辨得報云初看亦甚疑反復細觀乃大佳雖老少不同却筆意嚴謹非名筆不能爲然後可信不疑明年七月二日某謹記

又跋東坡遠遊菴銘

潮州刺史毘陵張侯寄蘇文忠公與吳子野詩帖副墨數通其第一帖但記遠遊菴銘用龜殼蛤蚧事而無其銘豈當時未及刻耶聞紹興初真蹟藏老胄家坐事籍沒遂歸有力者廬陵僧知顯久在廣東喜作詩善醫術因治病有功宛轉得之又數十年乃至于某附公長子伯達帖于後今摹寄侯

併刻之石使來者得寓目焉亦璧返邯鄲珠還合浦之意也梨黎相近故集韻驟馴通用世俗直以爲蚘公引淮南子慮或者未之察爾紹興四年正月三日

題東坡元祐手錄

前輩云古事勿語子容今事勿語君實益二公有所聞必書之冊也然當時士大夫疑以傳疑未必皆信後世以二公名德之重率取法焉記事所由異同也今東坡書子容數說往往與史不合如朝廷捕斬李壹乃云爲經略使所誅杜祁公坐蘇塔奏邸獄及與韓范富公厚善爲小人所擠以慶曆五年正月守兗今乃謂雷蔡襄孫甫子容既有是說君實亦筆之記聞近歲李燾作長編又雜取二說不知去年十月襄自緣親老得守福州且是日旣同首相章得象簽書矣祁公何懼于執中遽焚聖語也程林以參貳被譴後歷外任方除使相未

嘗正拜今謂之宰相何耶至如王鞏作甲申錄十
事九妄吳春卿自潞州辭疾改留臺非因召還也
宴殿拊牀何至是哉淳熙十五年四月一日某題

題五代應順年堂檢臨本

右後堂宰臣劉昫兼判三司堂檢其內批用御前
新鑄之印予從洪景盧待制借本臨之真贋幾不
可辨按應順元年三月戊辰愍帝遜于衛必以印
寶自隨自四月壬申從珂入洛乙亥卽位始倉卒
鑄此印耶乙酉大赦改元清泰時愍帝已殂璽應
來歸後十餘年晉出帝奉玉璽金印歸契丹契丹
謂璽非工與前史所傳異命求真璽出帝曰從珂
自焚玉璽不知所在疑焚之事載晉家人傳所謂
金印亦新鑄之類耳本朝紹聖三年十二月長安
村民段義掘地得玉璽玉綠色以獻于朝蹇序辰
安惇等皆言此秦璽漢以爲傳國寶自五代亡之
今爲時出尋詔禮部御史臺學士院祕書省太嘗

寺講求定驗於是蔡京等奏考之璽文皇帝壽昌
晉璽也受命於天後魏璽也有德者昌唐璽也惟
德允昌石晉璽也此卽出帝
獻契丹者今云受命于天既受
永昌其爲秦璽無疑哲宗皇帝遂以五月朔御大
慶殿受寶行朝會禮仍降德音於諸道改紹聖五
年爲元符元年云淳熙丙午四月辛酉致齋龍華
寺題

題李西臺和馬侯詩

姑蘇名士朱長文謂唐書餘學廢璽非也時人作
字尚不苟特氣體稍卑爾李西臺獨能拔乎其
萃是以古今貴之熙豐以後學者爭言道德性命
之理翰墨一藝固在所忽矧等陵節豈惟筆法之
絕乎此可與善學下惠者道而難與失步耶耶者
論也淳熙丙午七月一日孟享致齋東里周某題

題周立本列帝圖

右闕立本畫列帝圖凡十三人嘉祐名勝楊之美

夏藏之後入吳升內翰家吳氏子孫今寓賴貧質諸市過期不能贖子兄子中為守用錢二十萬鬻以相示初展視而斷爛不可觸亟以四萬錢付工李謹葺治乃可觀十三人中惟陳宣帝侍臣兩人從者并執扇各兩人潔輿者四人筆執尤奇絹亦特敝是間真跡無疑餘似經摹傳故稍完好自富韓公而下皆有題識往往缺落破碎第一跋文雖具而年月姓名俱漫滅賴紹聖間張勵引六一先生戲楊直講詩兩句而印縱有之美及四世三公之家兩印然後知其為發也古帝王多矣繪事必不止此無乃後人欲獻宮禁而削其偏方不令之主故間得流傳於世如晉人平喪帖耶然漢文光武儼然卷首何也文帝而曰昭文殊不可曉豈題者誤耶林叔豹謂孝文廟樂曰昭德頗似遷就或云載記李壽在蜀嘗以漢王僭位改元漢興其死也謚昭文帝廟曰中宗豈其然乎必有能辨之

者東里周某書是日延和奏事退皇太子初決庶務于議事堂蓋淳熙十五年正月二日也

題司馬溫公書臨本

右溫文正公與劉道原手書今藏范夢得曾孫處此論所臨也淳熙戊申正月十六日某題

題蘇子美帖臨本

歐陽公名蘇子美謂喜行狎草書今玉山汪季路所藏頗備此體其間峽東崑排之詩既用杜工部句又錄漫興惜花二絕其愛杜至矣俱字子美得非馬相如慕簡之意乎衡本滄浪集改蕭然作飄然梁寺作蕭寺能驅作聊驅向城市易松門路還自修易却自修蓋加潤色比舊為勝世以前章真蹟證別本未必盡然淳熙十五年三月六日命小子論臨而藏之

題修襖帖

朝士喜藏金石刻且禪見洽聞者莫如沈虞卿尤

延之王願伯子每春同焉淳熙乙酉正月五日某題

題聿寒園

右聿寒園紹興末在臨安西伯官宅傳之陸務觀龍興癸未秋歸廬陵村居戲題二絕時朋友多屬和者已而為人借去不還淳熙乙酉復與務觀同朝再傳此本命小兒錄舊詩于後某題

再題劉子澄聿寒園二絕句

右亡友劉子澄當時所作紹興三年臘月二日子澄門人劉敏季章自廬陵送子澄遺集來二詩在焉因併錄之

題清虛居士真草四詩

右王鞏真草四詩故人瀘帥張恣同山谷先生煮茶賦遠以相示蓋與茶賦跋語相連耳紹熙元年三月十二日某題

題麗莊敏公帖

右麗公與劉冲之帖按冲之以皇祐二年三月自開封除參知政事而麗公是年十月由樞密使拜昭文相五年七月坐趙清貺事為言者所誣罷守鄆州故有同政府行及二年之語紹熙辛亥五月三日某題

益公題跋卷之八終

益公題跋卷之九

跋劉仲威蘭亭叙

晉人風度不凡于書亦然右軍又晉人之龍虎也
觀其鋒藏勢逸如萬兵銜枚申令素定推堅陷陣
初不勞力蓋胸中自無滯礙故形于外者乃爾非
但積學可致也昔梁昭明以一語不中廢此敘而
不錄後世因以絲竹管絃為重複之病至齊梁小
兒偽妄之作則信而不疑是蓋以微瑕棄玉而以
玉表重珉也唐太宗親傳晉史備載斯文豈無意
耶雖然翰墨如此閱千百載終當輝映學海後之
覽者亦將有感於此固右軍期望於士大夫之志
也故吾樂為仲威言之紹興乙亥九月二十七日

書

跋周德友所藏蘇養直詩帖

後湖居士歌詩清腴蓋江西之派別而字畫健逸
又老坡之苗裔也吾宗德友丈寶其遺墨殆且百

紙可謂富矣僕生也後不及從居士游今以德友
數十年染指之勤一旦得大嚼焉正使親見揚子
雲所獲未必如是之富也欣玩彌日拱揖不暇姑
識歲月而歸之紹興戊寅十二月既望

跋宋景文公墨蹟

柳子厚作司馬刺史詞章始極其妙後世益信窮
人詩乃工之說常山景文公出藩入從終身榮顯
而述懷感事之作徑逼子厚贈楊憑等詩自非機
杆既殊經緯又至安能底此殆未可以窮達論也
紹興三十年十二月二十一日

跋劉子澄曾祖帖

大中大夫劉敦忠父與原父貢父兄弟也少嘗令
桐廬元豐庚申復來守睦歲久事逸而邦人猶能
頌其清白董氏圖經實載之紹興壬午其曾孫左
迪功郎清之清之得李尚書公擇帖將刻石烏龍
山中公擇仕久且顯其夢莫也甥黃魯直為東坡

贈質所服帶僅能經紀家事平生清白身後益見清白所以脩身也身脩則無不治矣思父真公擇之友哉是宜特書使來者知爲吏之本

柴翼秀才著書求跋語

三衢柴鴻舉著易索隱若干卷芻言四卷可謂勤且博矣談禪不必病戒律用兵不必廢行伍講解會粹之學有功於道豈少哉子夏曰日知其所亡月無忘其所能此鴻舉之志也故爲發明之紹興三十二年閏二月一日

題中書舍人趙莊叔字

莊叔書此數語所謂非苟知之亦允蹈之者年四十死矣或謂養生爲無益蓋非也莊叔若不作句天上則當脩文地下耳紹興壬午閏二月二十五日

跋宗室士會所書周以宗強賦

漢二獻皆以好書聞故傳國亦皆最久彼其遺子

孫者固有以致之矣今賀王不以金譜玉局是務而孜孜短檠佔嗶間無惑乎文章盛於王門而餘澤遠及苗裔也僕少時應舉死官乃未嘗手抄一賦見此不覺汗下壬午十月十四日

跋湖州沈壽岡之祖墓銘後跋藤撰

志墓有美而無箴久矣然東坡謂錢翰林陳義峰嶮不少自貶則其所以稱寺丞其諸異乎人稱者歟隆興元年正月二日

跋平江張漢卿推官華山就隱圖

洞庭楚之巨浸而山乃在震澤中其產橘柚皆足以冠天下世謂地脉潛通宜哉太華之峰有玉井井之蓮十丈自古記之矣今吳郡有華山山有天池池嘗有異蓮其地脉亦洞庭比與儒者知禹貢職方氏必以斯言爲疑安知造物之事方輿直塊土耳況區區秦吳間相去殆不能以寸復何疑哉誰能補圖經之闕願以是告之隆興元年四月十

一日

跋羅良弼家歐陽公唐草贊

長卿博雅好古藏本朝名公帖至數十百紙以那為首不在此墓乎隆興癸未十二月九日

跋宗室世颺與教授閻丘仲和帖

孝穆公宗室祭酒而敬愛儒者如此子孫其有不樂善者乎一傳為安定郡王表之遂以才名發聞於世今忠訓郎子松公之諸孫也醇雅好書驟見之疑其為寒士尚寶此帖籙金可散此不可失也隆興二年五月十一日

跋黃承議宗諤所藏文潞公劉莘老韓師杜

諸公題顏魯公懷素書

予昔在館閣凡古今法書盡見之而魯公祭毫州刺史文懷素書皆在焉嘗以告監少刻為中興法帖數十卷使學士大夫盡得寓目亦一段奇事諸公雖然予言而未暇也黃君延老蓄元祐名卿二

跋久矣今歸會稽道行間蓋以是告有位者乞併刻之殆將補商頌之亡合豐城之劍邪隆興二年五月十七日

跋黃廉夫仲行狀

熙寧元祐人才參辰相避冰炭不相入其或毀譽兩忘者非棲遲下位而不與事則脂韋其間而不任事者也給事中豫章黃公在熙寧時實任御史將使指在元祐時則祿公府踐禁省出入要劇獨無間言其致此必有道矣昔予外祖安陽王公脩泰陵正史閱五年於公帖傳或與筆削焉紹興辛巳予攝太史牛馬走訪求故史已亡三篋而新史殊未殺青惟得公行事於新舊實錄而參校山谷十詩如金門戰袍之語猶未盡解也奉祠歸廬陵適公之孫季文為郡丞始見山谷所作行狀然後知公所以被遇兩朝始終如一者忘已徇公中立不倚故也季文謂山谷詩已載集中而行狀止藏

於家欲與舊傳併刻之非特備史氏他日未擇亦使生知前輩立朝本末如此予贊曰明著祖烈古人以為崇孝山谷斯文黃氏之鼎銘也可無傳耶季文因詩題其後隆興二年十月十五日

跋劉原父貢父家書

前輩口遠公之文集僅有蜀本而於全書學者或未盡視况其遺墨尺牘豈易得耶吾友子和于澄公之從曾孫也樂道嗜學篤行能文寶此數帖非特如鄭公之笏而已要須挺挺有其風烈乃無愧耳昔二先生皆以忠愿爾雅之文雋明邁往之氣事累朝為名臣然不得以直玉堂議者惜之不在其身子於二君深有望矣隆興二年十一月十五日

又跋原夫貢父和仲馮帖

此墨莊寶章集也更數百年學者讀三劉漢書而思其人或於蛛絲煤尾中觀此帖宜如何愛慕耶

隆興二年閏十一月二十三日同家兄子友子中胡和懷趙從季觀于永和本覺寺而歸之子澄父

跋蘓子由和劉貢甫省上示座客詩

集中觀詩難為詩猶羣姝中觀色難為色也吾友陸務觀當今詩人之冠冕數勸于哦蘓黃門詩退取樂城集觀之未識其旨趣甲申閏月辛未郊居無事天寒踞爐如餓鴟劉友子澄忽自城中寄此卷相示快讀數過温雅高妙如佳人獨立姿態易見然後知務觀於此道真先覺也掖垣故事最重省上及題名禮填子綴斌倡班後會張夔州真父初拜正字老吏持供職牒請舍人署舍人涉筆從之次則驪吏以狀交展而已開宴既無近事題名初未具石而受責並并唱酬亦廢我思古人豈獨歎其筆力哉

跋劉仲馮與斯立宣德帖

西樞劉公為從官時丞相劉忠肅公實在政府觀

元祐施設則二公立朝本末蓋可攷矣紹聖間忠肅既被晉昭之誣貶死新州樞公亦坐朋黨謫柳久之會靖國改元忠肅之子跂始能辯雪父冤卜明年正月以丞相禮葬公于鄆之須城而樞公來守適在靖國之冬故有春首喪事且夕前榭等語未幾國事一變死者奪生者徙前帖所謂搢紳之禍者猶未已也昔漢末奄宦用事欲掃除善類濁亂帝室以謂人誣以過則辭費而易窮各議其罪則罰輕而弗徧故創為黨論以網羅之識者所宜寒心萬世所宜絕口也崇觀用事之臣忍復以姦黨為名網人於聖世乎彼徒欲誣害者廣不暇為國計而不思以士大夫竊奄宦之緒餘為可重羞也悲夫後六十三年樞公族孫子和子澄構此帖相過因題其後斯立劉跂字也

跋蕭御史薦宗室世懿奏狀蕭任三官教授口

某往聞大觀御史蕭公特操如松筠不以時宰風

指輕重詔獄九原雖遠直氣凜然今讀薦宗室孝穆公書又知好賢獎善出於天性要之此公任職居官無不盡其心非為神羊在首一時以決獄為剛也此藥初藏友人胡季懷家會孝穆諸孫從季與季懷遊遂以歸之季懷此心蕭公獎善之心也執柯伐柯從季豈以為遠哉圖為似是而已蕭公諱服字昭甫吉水人隆興乙酉歲旦試昆陵吳祺筆

跋山谷發願文

此書藏河陽李彥將家豪勁端重所謂入頽楊鴻雁行者今已刻石廬陵郡齋然可傳者位置形勢而已若乃濃淡纖妍體備衆妙則副墨之子亦如佩夫子象環耳乾道元年二月二十六日彥將自賴上來僕具脫粟請少留遂出示此軸獻豚蹄而得禾車者耶

跋王平甫所撰王職方墓表

職方父子廬陵名士平甫兄弟四海文儒而此石壽未百年幾以貨泐于既用萬錢購得之不敢復寘王氏之阡懼再泐也他日遊靖居上方得職方父子像于闈室壁間遂囑長老法宇表出之而立石於門右使來者得覽觀焉賢賢善善誰無是心有官君子勿恃強有力而取之乾道乙酉

跋宗室子提藏前輩帖

國朝雍熙中詔改拾遺補闕爲司諫正言然猶沿五季舊制未得守其官但以寄祿往徃狀元登第者自匠丞再遷始得之其高選如此不則特敕許赴院供職乃曰諫官至天禧初又詔兩省別置諫官六員明道元年復置諫院然後名正而官備至今守之此帖不知遺何人計非延魁卽嘗供職諫院者文正公稱爲長者必醇正人也乾道元年五月一日

故翰林學士錢公希白吳越廢王子也忠懿納土

時一門鼎貴希白獨刻意讀書故啓有不求族蔭之語年十七試御前三題立就以輕俊被黜故云妙齡試才中間雖簡在神宗章聖之心然欲成就其才每每抑之年三十有二方登進士甲科故云晚歲得雋旋以內艱解官免喪時當在咸平四年或五年於時呂文穆李文靖向文簡爲宰相此必三家舊本特不知出於誰氏凡幾易乃至從季爾昔韓退之三書不能動時相而希白一啓遂召試改秩通守斬春雖曰人主記其姓名且鼎甲格當擢用然列聖抑揚有法大臣薦進無私皆可垂憲萬世子特詳言之亦使從季知公侯子孫自立如此得不見影而逝也哉

二蘇兄弟行如冰雪足以下照百世望如九鼎足以坐銷羣奸學士大夫得其片文隻字輒藏去以爲榮蓋非特取其華藻也質公帖是中年書南至帖疑叔黨輩代作寄米帖淵明詩道媚秀傑晚年

精妙蓋如此黃門銘其兄云撫我則兄誨我則師

讀載公詩便知此言為實錄

子頃官秣陵令每休必出白下過半山上鍾阜訪
定林酌八功德水想公跨驢却蓋往來其間與實
覺行詳之徒遊其高風絕韻殆古今宰相所未有
自非遺物離人而立於獨不能爾也至於談禪之
病則山谷道人嘗喻之龍蛇必有能辨之者

山谷翰墨毀棄於大觀政和間而中興之初搜訪
甚急故散在士大夫家者浸少不然此公平生喜
為人作字仙去纔數十年未應爾也往聞唐文皇
盡收二王真蹟惟不取弔喪問疾者此帖得傳於
世亦幾是耶

跋三蘓畫像贊

侍讀公贊蘇氏父子兄弟之盛游夏不能措辭矣
英彥以示省齋周某乃續一轉語云是家一辨香
竝為文忠公此圖盛行於廬陵宜也乾道丙戌五

月十二日

跋此庵記

韓退之力排佛氏欲火其書槧子厚乃推尊之謂
與易論語合浩初之序左右佩劔今攷二公心迹
誰為善學展季者耶侍讀胡公平生未嘗啟梵夾
效膜拜戲為証老作此庵記而辭理超詣便得儒
釋之妙正使三十年默坐照破蒲團一萬里行脚
踏盡草屨恐亦未能到此地位真今代退之也若
子厚者風斯在下矣乾道丁亥二月十一日

題王龜齡石鏡溪詩碑後

子往與龜齡同在道山見其拒佛說過於楊臺乃
來廬山讀數詩皆食蔬筍帶葛藤韓退之決非大
顛所能移道一而已丁亥清明

跋劉季高與深陽筆工顧綱帖

杆山老人筆精墨妙獨步斯世而顧綱之藝數見
褒稱東坡詩中李文政也乾道三年八月辛酉

跋黃魯直所書金剛經

此經最貴徐柳所書今或漫或燬所可致者獨淮
溪本但恨傳刻失真耳山谷遺蹟自當盛行於世
故四明別駕陳篆藏而未刻者為其非全書也然
經複語類而次之計所欠無多山谷翰墨滿江南
匡廬又產藥石取諸人而補華衰攻他山而傳剛
畢斯無難矣此孝子慈孫所宜勉也乾道丁亥十
二月二十三日敬觀於天池院文殊亭

魯直自題卷後云寫到此絹已盡亦可笑然觀
以前九分筆弱終不成器可謾留與六郎學書
若兄須讀當以驚溪白絹寫一卷他時寄上某
再拜 後又有跋云得李伯時畫須菩提乃求
魯直書經已巳春末叔和

跋上藍長老了賢所收張丞相帖

丞相魏公言訂千金義烈之稱二字師號也賢乎
不朽也乾道三十年十一月某日觀於豫章南浦

亭

跋西山翠崑寺南唐保大中賜僧無殷詔書
李氏世敬桑門其賜書徧江左諸刹至於不失舊
物如翠崑者鮮矣乾道丁亥十一月十三日同長
老子堅觀

跋余安道題名後

上即位首命編類聖政所訪國朝勲臣後將祿之
某與吏部侍郎凌公實奉行詔書未及條上會觸
罪去今讀故人馮卿跋語乃知始與襄公四世孫
竟如初詔興滅繼絕天下之民所以歸心也尚有
一說宜具為今凡勲賢之後所居州若縣藉其名
氏遇三歲大比而不中選則別考其德行道藝上
之文武隨所肄有司按其家祿仕或闕則官優第
者一人於以勸人自力於善毋忝厥祖亦使赴功
趨事之臣歆慕跋及以燕其子孫且於三代貴重
世胄之意為粗合某已收朝蹟無由發此議因公

聞孫出示手澤為書其後庶幾告有位者讓而行
之乾道五年正月二十八日

跋王民瞻詩

人年八九十語必諄諄雖衛武公未免蹈此懿戒
最詳於二雅是也盧溪丈人年至矣而詩益清壯
簡古如揮魯陽之戈日可再中其壽豈易量耶安
復隨高坐出示此篇知子非續貂手苦求跋語為
題其後使攜歸為丈人賀乾道丁亥五月二十二
日

跋孫萃老告身

龍圖閣直學士高郵夢奠僅八十年而曾孫浩鶚
衣菜色困於逆旅微手攜命書數通吾亦白眼賢
者類矣既呼匠標飾歸之因為紀其歲月後有觀
者考前輩立名節之難而思後人持門戶之不易
必將有感於斯焉乾道戊子三月告朔

跋解繼善所藏柳書千文

張長史草書以雄放名而魯公謂其模楷精詳最
為真正乃知真生行行生草果有徵也解使君家
藏柳書千文予雖未能必其否然筆勢雄放而法
度精密如造父王良馭八駿駕輕車馳驟萬里其
進退曲折未嘗不由規矩豈非書家之傑然者耶
亦恐歐虞褚薛未必能辨此耳乾道四年

跋安福令王棣所藏王介甫及其子渙之沈
之等帖

王公與荆公同學眉山蘇公同科二公皆弔以詩
其人可知矣敬觀翰墨恨不時也彥魯豈從荆公
學故手筆數字頗有橫風疾雨之勢乾道五年三
月
按理公制策登科而官止祠部郎中至延康寶文
兄弟乃同時位少常伯典大藩府不在其身在其
子孫諒哉

又跋歐蘇及諸貴公帖

尺牘傳世者三德爵藝也而兼之實難若歐蘇二先生所謂毫髮無遺恨者自當行於百世

跋大輦渡永興觀舊碑

王僊諱子繇字大輦事迹著於廬陵王山名山王田名村嘉福之觀大輦之渡值夏之市皆是也參攷碑識同謂飛昇於晉永嘉中而郡人導峽葛先生作嘉福觀記云故老相傳仙東漢喬之弟頗疑相去二百餘年特世俗附著之耳予按湘東王古今同姓名錄有王喬其一晉廬陵太守以時輿地攷之仙豈太守弟耶而大輦爲渡略見南史陳紀今俗謂仙擲篋而渡訛曰大篙此又妄之甚也永興距渡里許主者王道貴葺棟宇於廢壞之餘侍讀胡公寶紀其成尙有政和舊記頗序歷代沿革碑漫詞僅傳道貴欲併刻之而患文不雅馴或曰無傷也侍讀之文江海也豈必廢濫觴哉道貴因求跋語予嘗自郡城涉江東行二里入洞元觀問

賜額何時道士出大中祥符中牒視之始創于南唐國朝之間初亦曰永興治平中方改洞元今攷此記永興得名甚遠中間葢移於洞元遂失舊物至大觀始復耶乃併書以遺道貴使爲觀門故事且補導峽之遺意云乾道五年三月二十三日

跋趙德麟書

詞翰雖君子餘事必淵源有自乃可貴焉德麟既著錄於老坡之門子禮復順風於德麟之實而誠父又子禮過庭之佳子弟也文獻相承夫豈偶然推而上之傳道安可以無宗哉乾道己丑五月二十四日

跋米元章書秦少游詞

借眼前之景而含萬里不盡之情因古人之法而得三昧自在之力此詞此字所以傳世乾道己丑五月二十四日

跋黃丞相書

相國江夏公與大父同登元符進士第為一世相國猶子達觀得此帖而伯父轉運公跋其後又為一世今相國之孫仲實仲文復以示其蓋黃氏周氏周旋三世矣使吾二家子又生孫孫又生子世篤契好於文字之間不其休哉乾道己丑九月五日

跋吳說千字文

尚書郎吳傳朋王逢原先生外孫也往見其論唐孫氏書譜自言總角以來徧參博考始悟筋脉相連之理蓋與近世不知而作者與矣皇諸孫從季家藏吉帖甚富又求千文於傳朋而刻之非樂善好事安能若此其於書情然而季兄子中筆法絕高常問道焉共評此字雖未至類張醉素之雄放而圓美流麗亦書家之韻勝者也乾道己丑九月

跋張魏公批劉和州事因

庚寅

魏公獻公克己復禮之學愛人利物之心雖片言

隻字亦可想見所謂造次必於是者年家子周某題

跋虞丞相尺牘

陳孟公口占私書數百封親疏各有意河南大驚韋郁公命侍史答牋記惟書名若五朵雲時人慕之翰墨之貴古今一也

跋張文潛帖

右張文潛右史遺李彥誠忱十一帖右史以元符末貶監黃度二州酒稅祐陵初政乃起守東魯方黨禁未解時同寮雖鄰近不覲右史亦眼高無人也一境令獨相親如此又得文人之稱彥誠才行可樂見矣乾道九年 天申節

跋東坡與趙夢得帖

南海上有義士曰趙夢得方蘇文忠公謫居時肯為致中州家問其賢可知公既大書姓字以為贈又題澄邁所居二亭曰清斯曰舞琴特良禍不欲

賦詩故錄陶阮篇什及舊作累數十紙以寓意然
會茶帖云飲非其人茶有語閉門獨吸心有愧詩
在其中矣僕生晚不獲從夢得訪公遺事而識其
孫左奉議郎荆寬厚夷雅力學工詞章所至榜書
室曰見坡其慕向豈特翰墨而已夢得真有後戴
乾道九年六月十九日

題故饒州府西溪居士蔣謨傳後 獻之子

予初從外家聞丹陽蔣公政和間爲中執法有準
擊鳳鳴之稱今觀饒州府君復以十事倦倦納忠
乃知滅孫有後於魯管仲世祀於齊非無驗也淳
熙元年二月十八日

建炎御筆跋

德壽皇帝中興初肆筆使入神品庭堅書法特筆
蹄耳臣宋錢孫之子以遺臣跋元愷元愷以示臣
某謹稽首再拜題其後淳熙元年二月既望

跋曾無疑所藏米元章帖

元章初學羅讓書其後超邁入神殆非側勒等趨
策掠墜所能束縛也

又跋章友直畫扇

近時文與可上行草篆隸飛白溢而爲畫章伯益
蓋同時人也後題無礙居士卽米元章元章亦兼
嗜書畫尤有好古之癖使此軸出晉唐間當在巧
偷豪奪之數耶淳熙元年三月二十四日

題鄭忠愍公驥遺事

某頃爲兒童聞伯父言虜破關中時得全節之士
二人其一卽同州鄭使君先大父同年進士也其
一蓋陝西轉運副使桑景詢伯父嘗爲之屬是詳
知本末始桑公行部望騎蓋薄長安官吏駭散獨
旋軫入城城陷盛服向闕再拜訖與一女俱赴井
死今鄭公賜諡立廟子孫祿仕相繼又得當世名
人暴揚忠烈定可不朽惟桑公無子知者甚鮮因
附其說於鄭公遺事之後毋亦使其無傳也淳熙

元年四月四日

跋劉楚公沆拜相告

右彭城公拜相制書一通元孫石城尉德循實寶藏之按公以至和元年中秋日相前一夕仁宗召當直學士楊偉不至乃宣趙槩視草自此遂召學士有故不宿者以次官遞宿然制詞與今實錄所載不同多為史官潤色惟不改雅性內融敏識先覺八字殆後世公議非後世褒詔也自至和距淳熙改元實百有二十年而歲次俱甲午云七月丙戌朔

跋朱新仲自誌墓

唐杜牧之以辭章名仕至中書舍人嘗典數郡將終自志其墓近世同鄉朱公亦與之同但壽過牧之耳與哉淳熙乙未二月六日舟過豫章公之子輔出示此軸敬題其後

跋蔡敏肅公平戎慶捷詩卷

在其元孫西安丞家

熙寧中收復熙河北岷疊宕等州裕陵歸功介甫親解玉帶以賜元厚之詩云何人更得通天帶謀合君心只晉公蓋謂是也蔡公久為西帥晚預籌帷斷章專及舜功殆有微意介甫和篇為推舊伐則公之勞亦不可揜矣淳熙乙未二月辛未

跋吳仁傑所藏張旭草書酒德頌

張顛蘓人吳君斗南實與之同郡寶藏其書固宜然莫于齊云章申公家有酒德頌甚奇偉紹興間入御府茲豈別本耶淳熙乙未八月旦

跋司馬溫公呂申公同除內翰告

神宗皇帝天縱將聖煥乎其有文章即位之三月首擢司馬文正呂正獻為翰林學士此當時贊書也惟二公道德文學冠映本朝故其進用大同者三在仁宗時力辭知制誥竝改次對人侍經幄同乎初也右文初政竝升翰苑同乎中也蔡陵副服俱在揆路同乎終也追觀前世名公卿同時被遇

者固多至於更歷累朝名位均一如二公則鮮矣
今文正曾孫及正獻曾孫企中適爲司農長貳相
與論述先契感嘆不已於是摹繪言刻之石以基
寓直鰲禁俾題其後昔唐文宗問魏文正公五世
孫慕曰卿家書詔頗有存者乎慕對惟故笏在詔
令上送今司馬氏保有此書過魏氏矣與國咸休
永世無窮惟後之人實圖之淳熙二年九月一日

跋宋景文唐史藁

香山詩語平易六一文體清駛疑若信手而成者
間觀遺藁則竄定甚多景文之於唐史刪煩爲簡
變今以古用功既至尤宜不苟也如吳兢一傳具
藁不知其幾此本似定矣然以新史校之亦復不
同杜詩云更覺良工用心苦茲可嘗鼎也自不足
累德而上頗有脫簡惜哉淳熙丙申二月二十二
日新安程叔達清江蕭燧上饒楊恂東里周某同
觀於東舍直舍

卷之九終

益公題跋卷之十

光堯御筆賜陳正彙白金三百兩跋

諫官陳瓘夢奠於宜和墓木拱而光堯眷禮正彙
如此其不能恭承嘉惠者天也是年十月正由遂
爲考功又數年正同亦自曾郎驟擢公府竟至侍
從興王賞諫臣善善及子孫古或有之然未有如
我光堯眷眷陳氏者有加而無已也後之人盍思
紹先烈而報國哉淳熙三年四月三日

跋皇祐朝賢送張肅提刑詩卷

右皇祐庚寅冬朝賢送張肅赴江東提刑詩一卷
由司馬溫公范蜀公而下十有四人溫公復追錄
岳州送行一篇按仁宗實錄慶曆七年五月張公
自廣東運判擢利路提刑會有指其前在任過市
物者九月貶知岳陽至是乃得牽復今讀溫公新
詩以松不彫寒絲曾斷直爲褒舊詩有出羣得罪
鶴介鷄憎之嘆是必以廉直反爲同僚讒賊多端

有巧中耳又一聯云飲水豈容吳刺史謗書藏似馬將軍前輩用事精確如此張公雖止祠曹郎中按刑罰服然蓄其餘澤敷遺後裔子孫祿仕變世不絕紹興初曾孫延壽遂為侍御史天之報施昭昭矣庚寅距今實百二十七年侍御史之子宜教郎適正來求跋語偶夜直玉堂敬附名於卷尾且以見太史氏因官文書紀事往往是非失實秉筆者當致審云淳熙丙申七月十九日

跋程宗正之子鑄墓銘

天經傷烏聖賢有所不免今新安程公銘冢子之藏筆力得於天成慈愛出於天性使人讀之於十年之後猶太息不已黃太史云眼看白璧埋黃壤何況人間父子情予於程亦云淳熙丙申七月二十一日東里周某書時同試館職于玉堂

跋范元卿所藏醉翁帖

右南宮舍人范元卿所藏醉翁帖翁喜賢俊重文

友出於天性其立朝尤相善者劉與蔡也觀此略可見矣今居士前後集有手書數卷而寄原甫帖在焉所謂用快大過及饒聖從與景仁介甫清坐終日等語良是至於才薄任過有望於公以濟不逮及未歸間不惜時枉問之類大率意同辭異獨論簡事為外名迹幾百言而真跡殊無之數日大風至照管公儀家則集本略不載夫尺牘出於信筆非若著書容有刪潤也縱後人傳寫差誤亦當不過十數字乃爾與同耶謂二者非一時所作則又事辭不應甚似如此元卿素以博洽聞願質疑焉淳熙三年八月二十七日

跋韓忠獻王帖

右韓忠獻王答司馬文正公手書其前二幅蓋熙寧四年春文正自雍移許時也後二幅則歸洛矣二公在嘉祐中固已忠義相許及治平初忠獻畫陝西義軍之策文公肆論其非略無假借已而自

劾至於三奏六申中書前章周而不比和而不同大抵如此暨王介甫得政時與事變尺牘酬答孜孜以爲國爲宗社爲天下爲禱大忠大義執鞭欣慕忠獻豈受辭相悅哉使當時見之可以動悟人主後世觀之可以廉貪立懦彼爲無使齊年知無使上知之語者讀此類其泚矣寶君卽舜卿也淳熙三年十一月二十日奉敕同文正曾孫權吏部侍郎仍齋祠璿瓊觀出示此帖敬題其後

題金華喻葆光書佛經卷

良能之父

王龜齡遇人談釋氏輒詆罵乃首爲喻居士題經卷古人能起後人之敬必有道矣非專以其子爲同年進士也淳熙四年三月十二日

跋宇文虛中書

宇文公忠謀義槩謂當享平國君之封而天不相之乃從庾珉玉傳於地下可爲痛哭流涕淳熙丁酉三月戊午

同前

蕪屬國看羊海上假雁足帛書而得歸宇文公真有此書而不得歸悲夫淳熙四年三月十八日

跋初寮先生帖

初寮先生未冠時及拜東坡於中山筆精墨妙宜有傳授當政宜間禁切蕪學一涉近似旋坐廢銅而先生以奪胎換骨之手揮毫禁林初無疑者靖康而後黨禁已解玉佩瓊瑤之辭怒視馮驥之書盛行於東南然後人人知其爲蘇門頰閔也晁張復生其雁行先生歟仲明尚公及某之大父俱爲元符庚辰進士故尚公之孫中庸出示此帖敬題其後淳熙丁酉四月既望

跋鄒志完曾祖詩

詩語忠誠心畫莊厚天禧天聖間氣象大率如此可以尙論其世矣忠公作政時正遭外艱所謂聽祖考之英訓未葬讀喪禮既葬讀祭禮者耶淳

熙丁酉四月己卯六世孫朝奉郎燧以示舊同僚
東里周某敬題其後

錄書

跋閒樂居士陳師錫與了翁陳璣論王氏日
陳了翁以元符庚辰八月為司諫雖論陵裕史不
當用日錄然名是王介甫而非蔡卞明年八月自
都司出守海陵閒樂先生實遺以書其後了翁猶
有合浦尊堯之作大觀四年始因星變復上四明
尊堯集及尊堯餘言痛悔前作則此書為有助矣
淳熙丁酉予判吏部南曹閒樂之孫昌年適來調
官出示遺墨乃略考歲月而歸之五月二十五日

跋淨慧寺東坡題名

佛日淨慧禪寺在桐扣黃鶴峯下寺中有池池有
渥洼泉東坡先生嘗賦五絕句所謂細泉咽咽走
金沙者堂上畱題今既百年而詩僧慧舉乃謀人
石可謂好事矣桐扣以張華得名俗云同口非也

淳熙五年正月九日

跋陳晞顏從古和簡齋陳去非詩

淳熙五年正月丁巳天寒甚獨直玉堂快讀同年
陳晞顏和簡齋詩五百一十餘首已愧王摩詰不
能致孟浩然之伴直當如裴均他日對草吉甫制
耳

書簡修行狀後

從事郎清江簡公之卒也其鄉人胡開孺實為行
狀今四十七年矣而從事之弟致政息遠公屬某
以銘昔政和中先君隨侍大父官鄆州法當由隣
郡升貢簡公實為坊州教授蓋嘗擊節先君之文
今行狀備載其事可謂有先契矣銘何敢辭然聞
開孺乃山谷先生同年彥明之子詩人藏之之弟
承父兄師友淵源之正其詞日光玉潔雲蒸而川
流也從事得此自宜不朽鄙辭尙安所措姑題簡
末歸之簡事淳熙五年二月十七日

跋趙善應行實

有關雎之應然後公子有信厚之風有行葦之人
然後人有士君子之行周則然矣本朝奚愧焉觀
子直著作敘其先人之遺事寧不樂見蓋古者子
孫論譔先世之美明著之後世雖本於崇孝而終
實重其故家沂流求源固非一日積也採詩者倘
有考於斯文淳熙五年六月晦

跋趙子崧詩集後

靖康之難近畿諸郡皆陷獨端明公以宗室祭酒
堅守淮寧首尾半年迄收趙筆保境之功又能詆
呵閭位糾合齊盟高邑築壇遂參佐命不幸為媚
嫉者所不容復使出鎮京口名曰因任所長實欲陷
之死地未幾狂寇暴至無城可守無兵可禦猶與
其下力戰重傷然後退保江岸上章待罪媚者計
得坐貶冀州昔唐天寶之亂河朔盡陷獨顏魯公
固守平原及至德改元不能當史忠明尹子奇之

鋒乃棄郡渡河惟公始末大率類此魯公進官公
則遠徙人謀不臧一至是耶賴德壽皇帝深察非
辜尋復朝散大夫示將復用而公遽卽世矣豈非
命歟淳熙戊戌秋公之孫師聰示公詩文及遺墨
因為略辨當時之事以告著作氏

跋向子諲家邵康節戒子孫文

康節先生心聲正大可以銘盤心畫道勁可以貫
準鄰林公寶藏以示子孫厥有旨哉淳熙戊戌十
月十二日觀於摘文堂

跋汪聖錫家藏東坡與林希論浙西賑濟三

帖

林子中與東坡公素厚善後又為杭州交承故書
問倦倦如此林雖尋為利誘折資草制詆公不遺
餘力然猶愛此帖弗棄至其子孫始以遺玉山汪
氏乃知惡直醜正顛倒是非者豈盡喪其良心哉
根秀害之耳淳熙五年十月十三日東里周某觀

於構文堂

又跋徐鉉篆李衛公項王亭

常侍此書陽冰之後一人而已淳熙戊戌十月十

三日

又跋蕪舍人題臨蘭亭序詩

有若象夫子向興闕里門虎賁狀蔡邕猶旁文

舉樽昭陵目一閉真迹不復存予今獲此本亦

可比與璠翰林學士承旨中書舍人蕪易簡於

玉堂北軒題

蕪易簡題蘭亭軸詩以其官攷之當淳化二三年

或四年中距今淳熙五年十月始一百九十年翰

林學士中奉大夫周某題於行在玉堂之東軒

又跋黃魯直蜀中詩詞 王公權荔枝錄項姚君王安樂泉頌茶詞

滿庭芳 阮師歸

杜少陵劉夢得詩自夔州後頓異前作世皆言文

人流落不偶乃刻意著述而不知巫峽峻峰激流

之勢有以助之也山谷自我徒黔身行夔路故詞

章翰墨日益超妙觀此三帖 淳熙五年十

月十三日

又跋王禹玉内外制草

中書舍人陳騷翰林學士周某同觀岐文恭公内

外制草淳熙五年十月十三日

又跋王禹玉謝翰林學士承旨表本

翰苑多雜著故其體不一某以乾道庚寅歲初忝

寓直凡詞頭之小者院吏輒以片紙錄舊作謂之

屏風兒子笑曰此陶穀所謂一生依本畫葫蘆今

觀王岐公謝承旨表藁亦連別本殆屏風之類矣

其詞謂由西掖入北門行將二紀又云鼎聖曆之

肇新領藩麾之屢易則為張文定公安道無疑然

閱博燕閑浮籥宣精等語岐公表實用之文體大

畧亦相類二公蓋同直者顧不嫌於同此前輩廣

大規模也淳熙戊戌十月十四日

又跋王禹玉立英宗爲太子詔草及當日請

對奏藁

岐公既於中書聚廳處受御札立皇子夫復何疑
猶請對而後草詔可謂過乎思慮矣然卒不免於
讒語賴英宗聖明延見藥珠進職端明且有盤龍
金合之賜逢辰則然智力何有哉不然先日之謹
畏祇足以成後來之罪戾耳淳熙戊戌十月十五
日

跋歐陽公與通判屯田等三帖

張幾仲
待制家

某已刻六一先生帖數卷于家塾他日當摹此三
帖附益之淳熙戊戌十一月二十五日

又跋黃魯直與全父醉帖

僕以淳熙乙未春與幾仲同次對敷文閣幾仲旋
鎮襄漢三年而歸又獲接武內朝會江西謀帥幾
仲復在選中千騎塞塗旗旄赫奕僕往慶焉天盛
寒飲沆瀣一杯徑醉幾仲出山谷醉筆輒題其後

他日歸爲部民再當觀於滕王閣之上淳熙五年

十一月二十五日

又跋王介甫彌勒偈

王荆公書楷法如此者絕少端明胡公已茂所謂
不敢以易心爲之者是也又平生儉約未嘗輕用
縑帛獨於佛語用之亦是意耶淳熙戊戌十一月
二十五日

又跋黃魯直畫寢呈李公擇等四詩

詩雜古律字兼行草此山谷得意之作也淳熙戊
戌十一月二十五日

又跋東坡帖

淳熙戊戌十一月二十五日東宮講讀因與同僚
共觀坡仙墨妙而戴子微太常亦出懶放一帖大
槩絕相類惟拜字與耳真臨雖難辨夏皆法書也

跋馮京與朱諤右丞家書

右馮文簡公與其孫婿朱忠靖公書前一幅元祐

八年冬後一幅紹聖改元春也馮公時以太子少師致仕居京師而朱公為壽陽節度推官所謂蘓相蓋楊帥子容也馮公作此帖僅數月即夢奠于兩楹後六十六年朱公之孫叔召自蕪湖來求跋語按熙寧間馮公與王介甫同在政路能使介甫有所畏憚至為無使齊年知之語其正可知矣翰墨自應傳遠況家問乎惟某外祖少師初佐壽幕朱公實來為代兩年契好不薄其後叔召遂為外祖孫皆淳熙六年四月二十八日

跋秦少游帖

觀自去歲入京遭此追捕親老骨肉亦不敢爾鄉里治生之具緣此蕩盡今雖得生還而仰事俯育之計蕭然不給想公聞之不能無惻然也不知能為謀一主學處否試望留意幸甚惠及銀杏尤見厚意感悚忽遽未有以為獻者行甫聞授宣城是否家叔已赴涪州渤海知縣祖父

在彼幸安但地遠難得書耳李端叔從軍都不聞耗不知何如也與公別未幾世間事多變如此既可嘆復可笑耳何時展晤以盡所懷觀再拜

少游作此帖猶未仕也今淮海集有對詔獄二詩所謂一室如懸磬人音盡不聞老兵隨卧起漂母給朝爨者殆去歲追捕時耶淳熙七年正月十四日東里周某同崔大雅觀於吏部直舍

跋彌明石鼎聯句圖

昌黎公詩中有畫李伯時畫中有詩此雖臨本亦可見吳生遠擅場之意

跋山谷萍鄉縣寶積禪寺記

寶積禪寺本周廣順中民李氏施地宅建梵林寺寺有僧伽像顯德中見光怪累日因改寶積寺星布六室以元符二年十二月敕改律為禪以僧紹樂於萍鄉無法緣居十月而里人不施

一錢於是棄而去三年十月予伯氏元明爲令也擇請延慶院山主宗禪來尸法席禪倦游諸方號稱得安樂法其居延慶院也變飲酒食肉處爲菩提坊開草萊荆棘葺爲金蓮聚故元明以爲是必能興我寶積三招而後肯來至則破六律院爲一叢林誘者杜口檀者傾施不閱歲盡徹蜂房之屋鬱爲鷲峰之會建中靖國之元方丈三門世尊之廟崇成矣粵明年樂淨堂德味厨法堂皆畢工凡率有家之錢爲五百萬而所以庇覆安樂道衆冗徒之屋無不具使齷齪者口談般若鄙吝者心悅檀施若禪者可謂有功於此縣而其道行之化或溢於鄰邦矣伯氏來屬爲禪記之故敘載如此崇寧二年十一月丁丑朝奉郎管洪州玉隆觀雲騎尉賜飛魚袋黃庭堅魯直記并書泮鄉令黃大臨元明立石

壬午歲涪翁杭荆州略洞庭涉脩水經七十二度

出萬載宜春省元明於泮鄉爲留半月明年在武昌始作此記未閱月而承天院記之禍作遂長流宜州計未暇刻也故集本缺焉他日當同承天塔記附錄以成東哲補亡之義淳熙七年正月十四日

跋東坡草烏頭方帖

仇仙慕葛稚川陶隱居孫思邈之爲人欲以救人得道故常留意各方此其一也淳熙庚子正月十四日

跋山谷書東坡聖散子傳

山谷作龐安常傷寒論後序云前序海上道人諾爲之故虛右以待道人指東坡也今又書聖散子傳若安常所謂得二公而名彰者耶淳熙庚子正月十四日

跋陳簡齋法帖奏藥

德壽皇帝嘗論近世絳帖已少錢希白所臨潭帖

為勝臨江帖失真遠矣又淳化帖大觀帖當時以
晉唐善本及江南所收帖擇善者刻之風骨意象
皆存今觀故參知政事陳公與義為侍從時奉詔
定法帖十卷釋文一冊其間稍辯劉次莊之誤殆
臨江或潭帖歟陳公子字畫清簡類其詩文紹興
初步中朝故特承善誘知人堯哲茲可觀其緒餘
淳熙七年正月十四試吏部尚書兼翰林學士承
旨周某為起居舍人木待問題

跋鄧延所藏其祖溫伯與東坡唱和武昌長

篇

蘓鄧兩公同直禁話舊賦詩建今踰八十年東里
周某始獲敬觀鄧氏別本於行在所因命院吏印
其後印蓋景德二年舊物兩公嘗佩之矣升堂伏
几而襲其裳得無象環之恧歟淳熙庚子正月二
十八日

跋趙忠簡公答魏侍郎砭手書

故吏部侍郎魏公邦達天資鯁挺忠憤自信方趙
忠簡公再遷海島萬里通問情誼彌篤觀此答書
槩可見矣忠簡既夢奠歸之常山縣邵守知
中外士大夫平時多書疏往來至是必爭持酒漿
會葬意可為奇貨以媚時宰密諭邑尉翁蒙之以
搜私釀為名馳往掩取蒙之許諾守猶疑漏言潛
戒左右伺察之蒙之略入解書片紙自後出迎趙
氏子告之故趣盡焚篋中書及屏棄弓刀之屬比
蒙之挾吏卒至一無所得守大怒劾于朝時宰疑
其已甚徒蒙之尉蘭溪使避守是時士氣未泯喧
問遷客議論時事決非一族微蒙之以身扞蔽則
根株牽連當起大獄魏公且為罪首非仁乎蒙之
初被委苟能避免便足取名然懼小人代尸其任
則於善類奚益故詭詞以承之陰謀以洩之忠簡
之家賴以免禍非智乎凡小吏忤二千石罪或不
測况相國深怨宿怒决懷不得逞鼎鑊在前直趨

弗顧非勇乎一事而三善從可書也已蒙之字子
功富沙人彥國之族也長不滿五尺語不能出口
見義必為不擇難易輕財樂施嘗鬻田宅濟人之
急交友付託之死不肯為一尉已能如此向令踐
貴任臨大節其所立必卓然不可及上初即位大
臣誦言其事詔特改京官除寺監簿出佐帥幕再
入為寺監丞年五十卒懼其無聞故因是書表
而出之庶幾附趙魏二公而名彰云淳熙庚子三
月二十一日書

政唐相梁國忠公為吏部侍郎加勳告

右唐相梁國忠公為吏部侍郎日加勳告一通子
孫世寶藏之至紹興 吏部邦達蓋二十三世
矣山神龍乙巳距今淳熙七年庚子已四百七十
六年而印色如新蓋古者百工之物皆良故能耐
久如此按舊唐史中宗以正月二十五日丙午即
位於通天宮此告云二十七日制者後兩日方單

敕也然所載推恩頗略當以告為正史又云二月
甲子立妃韋為皇后內外官陪位者賜勳一轉則
與制合甲子乃十四日告稱十五日制者後一日
也

跋趙霈張致遠魏疋奏劄

右紹興四年十二月臺雜魏公邦達副張端公子
猷拾遺趙公公時同論和議疏一通具兼者魏公
也欲上而改貳秘書張公實代之後四十七年魏
公之子欽承以示東里周某敬題其後淳熙庚子
三月十三日

跋先大父秦國公所作涪州使君李昌年墓

誌銘

右涪州使君李公墓誌銘先大父宮傳所作先人
少師實書丹按李氏之先以勳業事太祖皇帝自
是世有顯人誌其墓者又皆一時名卿凡園亭在
汴都則有翰林王公元之記丞相李文正公而下

諸賢歌詩在洛中則韓忠獻公富文忠公司馬文正公而下皆賦焉今涪州曾孫哀之以予家三世通姻好萬里相訪且出其家傳石刻甚備獨涪州銘文不在乃錄本以遺哀之且以補史之闕文云淳熙八年辛丑歲謹記

跋江權卿所藏諸家帖

國朝兩制極天下之選文章名世者率居此官籀門四子周旋館殿垂上詞掖乃復流落士大夫至今以爲恨觀此數帖大略可見鬼雖幸郡正彙升然事亦隨變黃九卒不及聯事天官云淳熙八年三月五日

臘歲終祭名也于文從肉其後乃有從虫者玉篇以爲蜜泮二義實相通學者每疑柳文中臘言梘貌字當從虫是殆因古今謂十二月爲臘月遂疑其傍從日月之月偶讀此詩就爲之辯淳熙八年三月五日

蘇長公黃岡冬至帖妙甚已漸變右軍書矣仲俞仁丈未詳其姓名既云鄉息浩然相同此味殆蜀之老成人也少公詩皆僉判南京所作長篇蓋憶在齊州與孔常父游從耳二絕句乃和張厚之厚之樂全之子恕也淳熙八年三月五日

予閱王荆公帖多矣大抵始稍謹未必縱蓋平居好深湛之息孰肯致意於尺牘此又其暮年者尤宜坦率也淳熙八年三月十五日

跋陳與義贊肅張擴被召省劄

三英之召或云富季申爲中丞日所薦館閣才也嘉祐以前兩府初除各舉館職三兩人卽將召試其後乃上簿候聞治平中歐陽文忠公益嘗論此官制旣行盡歸秘書省至元祐初復置館職許大臣各舉所知三人未幾又罷太上皇帝當國步多艱之際兼採累朝故事極養異才富公方執法已能薦士如二府大用之意固自可見已而遂升右

府云淳熙辛丑中秋日題

跋陳從古梅詩

淳熙辛丑冬淮浙告饑欲詳知郡縣荒政次第聞於上退食接客或至日暮官舍後有梅一株不暇問訊何如也同年陳兄踰顏和古今梅詩千篇聯爲二十大軸遠以相示乘燭快讀雖未容舍英咀筆固可望之止渴矣夫以聯顏之學之才筆端滾滾宜有餘地然吟咏一草木安能閱麗與衍千變萬化不窮如此讀最後兩卷乃知自其曾大父先大夫世以詩名鳴皆眷眷於此花源遠矣哉漢崔篆生殺殺生駟駟生子玉然後文名著唐杜審言生閑閑生甫然後詩名顯彼日鍛月鍊雕肝琢腎工可能也多文以爲富則非世業殆難能也十二月二十日

跋伯父與鄭庶手書

紹興初叔父靜江府君爲衡州安仁令某年八七月辛丑

歲因侍行而識武尉鄭幾仲其後伯父再守襄陽幾仲實爲僚吏某時年二十餘矣由初迄今已五十載幾仲之子承信鄭謨自長沙來出示伯父尺牘八幅前六幅乃某代作後兩幅手澤也死生契濶少壯衰老蓋有不勝嘆者淳熙九年三月九日

跋蘓石帖

歐陽文忠公好賢樂善克其天性得交友間寸莛尺書必軸而藏之况曼卿子美俊才直節公深知之雄詞健筆公素推之而位皆不過館職年皆不登知命此公之所尤悲也故於遺墨獨致意焉熙寧壬子公夢奠之歲也猶親跋於卷尾去之百一十載會稽王佐以大司空行內史事得此本於元孫欽尉伋欣慕前哲亟刻之石惟公道德文章師表百世而干旄緇衣之好至死靡倦彼爭名者相傾屬文者相軋聞公之風其少愧哉淳熙壬寅八月辛丑

跋與徐林書

紹興末龍圖閣直學士徐公推山以舊德再還從班宅在銀鎗寨中予以左史兼行詞掖居暗門城下相去百餘步而東徧書室適隔一墻公忘年下文屢欲開便門相過從予曰壁壘已定穿窬不由路如禮法何公笑而止公既歿予挽之云昔者陪簪筆比隣銳鑿垣蓋謂是也後二十年壬寅冬公之孫武康尉雲紀錄予中間答公書以相示覽之慨然

題蕪子美草書蔡君謨大書跋帖

蘇草蔡真可稱二絕淳熙癸卯仲春吉朔周某敬觀

題唐人硬黃臨王獻之帖

臨本猶可愛如此況於真蹟伯時寶之伯長仲晦書之可不題其後淳熙癸卯二月朔

題米芾馬賦

元章詞筆俊拔略無滯礙使能約以法度博以問學則生當獨步翰墨之場沒且登名文章之錄其成就豈止此而已惜夫淳熙十年二月一日

題蕪子美寶奎殿頌帖

仁宗朝華太宗御書大相國寺額於石即寺為殿而藏之御飛白名曰寶奎殿舜欽此頌當是召試館職時所作年方三十餘也其上宰宗更為醉章者謂呂夷簡作記章得象題額之類歟淳熙十年二月五日周某書而歸之玉山汪氏

題蔡君謨書柳子厚吐谷渾詞

蔡忠惠書洛陽橋記與吐谷渾詞皆大書之冠冕也淳熙癸卯月日

跋趙湖州祠堂記

右湖州刺史趙公子嶧祠堂記仲并所作其載守城之功甚備獨云事甫定公遽罷後以御史言復還又數月竟去凡稱罷者再漫不言坐何事于懷

武者疑公爲罪行故以聞諸太史氏者補之蓋已
西冬宣撫使出於無策謬用武臣楊應誠代公守
湖父老邁道閉關不能留至明年五月上用臺評
黜揚而還公公感上之知念民之困也益息撫摩
以爲報會轉運使督緡錢十萬餉劉光世軍而堂
帖隨下謂州故貸梅管錢二萬糴米七千斛期以
旬盡償公言民力不支請先軍須後償欠朝廷遂
勅公侮慢貶秩而罷其始末乃如此是豈以一時
守城爲功可謂能固邦本矣湖人奉書至今有以
也夫公子伯行要求于書將刻之碑陰云淳熙十
年九月十日

跋文潞公帖

熙寧大臣獎用新進指安靜爲委靡故於邊防河
事指畫紛然潞公在北都作箴頌四篇以諷而二
頌尤深切著明殆諫書也時公年過七十筆力猶
清壯如此非獨見其所養深厚亦足占壽考之祥

矣是後安享富貴又二十載其年謚名位可以伯
仲衛武而中書之考幾於倍徒郭令嗚呼盛哉此
帖藏參知政事北陵張公家張公之孫大理寺丞
抑以示東里周某敬題卷末淳熙十一月二十三
日

跋汪季路所藏山谷與柳仲遠帖

仲遠二蘓公堂妹婿柳君也故山谷此帖多及東
坡穎濱其後坡祭妹丈云玉立二甥一秀不實豈
非所謂十三者耶淳熙十年閏十一月二十五日

跋汪季路所藏朱希真帖

朱希真避亂南渡流落嶺海江浙間德壽皇帝因
明棄薦特召而用之旣掛冠矣秦丞相擢其子爲
勅局刪定官希真間來就養是時東閣郎君慕其
詩名欲從之游爲脩廢官畱爲鴻臚少卿希真愛
子而畏禍不能引去未幾秦薨例遭論罷出處固
有可議然亦可憫也今觀其字如其詩其詩如其

人後世不待激面當知為伊洛勝流矣

跋張魏公與連壘帖

富貴不足道孝弟忠信可以垂名百世利澤萬物紹興辛酉重陽前一日書贈連君幾宜紫崑張德遠

應山連處士一布衣耳既沒而鄉人法其孝友禮遜凡矜寡饑饉之人皆追思之歐陽文忠公表其墓謂行之以躬不言而信蓋實錄也有子四人而寶文公則第三子之孫以文章贊書命才略典方面克孝而忠大其家聲今機宜君蒙上拔擢守邊守郡進用未已施於行政豈真如處士居鄉而已乎舉斯心加諸彼則上不負天子下不負張忠獻公之言矣淳熙癸卯臘月丙寅

跋錢穆父與張文潛書

右錢穆父與張文潛書蓋元祐末紹興初文潛自潤改宣及謫黃州監當時也文潛亦歸穆父第二

子東美婚姻之故情誼款密其買入翰苑啓猶載文潛集中所謂內翰侍讀四丈者未幾竄逐元祐臣僚人以東坡兄弟秦少游為諱而穆父憐問懇側且有靈光歸然之語蓋自況也最後勉文潛以卯入申出仍以閉詩文不著急為諷意愛深矣淳熙癸卯閏月十三日偶觀此帖而刑部侍郎曾仲躬適相過知其為錢出也問以得雌名同兒為誰仲躬曰即吾母魯國太夫人今年九十飲食視聽不少衰予嘆曰賢者之孫固宜壽而康耶仲躬又為予言外祖拔解後侍翰林使高麗既歸省試已終場不能無悵然會開寶貢院大火至焚死考官有旨再試遂在選中外祖喜甚翰林責之曰爾不念被焚者耶因併記其語而歸之汪氏

益公題跋卷之十

終

益公題跋卷之十一

跋汪季路所藏張文潛與彥素帖

朱希真文諱勃元祐紹聖之交為右司諫時張文潛為起居舍人故云同省今國史院有李仁甫編國朝百官公卿表而諫官門逸朱勃姓名以是知闕文多矣淳熙甲辰正月二十五日

又跋季路所藏東坡作王中父哀詞

市類檢音
書恐誤用

其後注
云謝觀

某幼于武臣張可久家見東坡序六一居士集起草至作于其心害于其政發于其事四句每句上下兩字用筆與全篇濃淡不同似初闕而後填者注孟子又云生于其心害于其事發于其事害于其政一書而文意交錯疑混故當審而用之耳前輩言坡自帥杭後為文用事先令門人檢閱今觀東坡帖則已加詳矣况算年乎况他人乎

跋朝士送王校書通歸台州詩卷

校書君位不滿才能宜有此詩軸即榘儀曹先友記也淳熙甲辰二月中休

跋范文正公五帖

右范文正公五帖四世孫之柔所藏也其前家書四通皆遺兄仲溫者以文正集考之嘗歷寧海軍節度推官遷太子中舍致仕後一帖字仲儀即王懿教公也范氏自忠宣公擢第皇祐之初至乾道八年而之柔乃復登科中間家蓋百二十四載矣世濟其美尚知勉哉淳熙十一年二月六日

跋喻子材樗帖

喻公子材邃于經學敏于詞藝紹興初館閣多俊傑視題名可考也乾道壬辰子自小宗伯奉祠過無錫子材老矣用兩夫肩輿廷勞于塗議論灑灑使人聽之忘倦其謂自天子至庶人皆有朋友三代而上每措之父子兄弟之間後世此道殊廢子至今紳書之汪季路其外孫也出示公遺墨因題

其後

跋劉器之帖

淳熙七年夏連州守臣頓首上尚書按國史諫議大夫劉安世秉誼據正國之實臣不幸官未應諫其曾孫孝壽嘗貢本州累授鄒浩蘇軾特諡故事以為請守臣不敢聞頓首上尚書六月丁酉制曰下禮部下太常太常博士宋之瑞議以慮國忘家曰忠德行不爽曰定易安世之名九月甲戌復上尚書丞相臣雄參知政事臣某奏臨安行宮制曰可明年考功郎章森覆諡議同十二月戊申始請有司告其第于是天子旌嘉遺直之德意忠定公死而不朽之令名暴白于天下孝壽念祖之志仲矣他日出公二手帖泣而言曰曾祖在窆斥中母亾子天患難極矣而應之猶能踰嶺迎奠今正論既伸褒錫美諡而先父往歲貶死于連未克歸葬乃無哀王孫者某聞而憐之為孝壽言孔君嚴節

度嶺海人士落南不能歸與流徙之胥百餘族咸受其賜今廣帥采若轉運會叔提舉廷玉暨連守昌君皆尚友古人樂善無厭第持二帖造焉必將念元祐之故家廢唐賢之惠政孝壽其何慮十二年八月十日

跋尤延之家藏蘇子美四時歌真蹟

同時則如賢嫉能與世乃哀窮悼屈古今殆一律也使到元瑜輩見子美詞翰于百年之後則所謂一網之舉安知不轉為十襲之藏乎淳熙甲辰十二月三日

跋喻仲遷所藏蘇黃門翰林詔草 答韓儀公辭免同知

院

國朝內制非一種更其檢往往列舊作于前今猶如此私號屏風兒某頃跋汪氏所藏王岐公謝承旨學士表及陶翰林依本胡盧之語正謂是也按元豐雜壓同知密院雖在丞轄之下然二府迭居

固不計此韓儀公實自左丞除授登應取序遷加等之文以為式吏輩刻舟記劍當發蘇公之一笑淳熙甲辰十二月中泮

跋蘇氏藏太宗御書及謝表

臣嘗觀參知政事易簡之子耆續翰林志載其父既具狀謝宸翰之賜仍面奏辭字從舌乃是正文并檢虞世南著辭字進呈太宗皇帝大悅曰非卿博識朕已為誤矣蘇氏寶藏此軸垂二百年而臣始得寓目謹錄其事附卷末使來者有考焉甲辰十二月二十二日

跋嚴汝翼所藏張丞相詩

詩律清遠有樂道憂世之心筆法妍楷無震矜息墮之容觀此則忠獻公氣象略可見矣嚴君既親薰而炙之宜為佳士今改秩宰茶陵足行所學尚其勉旃某亦公年家子也故敢附名卷末淳熙乙巳二月上泮

跋東坡代張文定公上書

東坡代張文定公上書蓋熙寧十年也其後為公墓碑明載老臣死見先帝有以藉口之語然則書雖成于坡手而意指必出于公不然何其危言至是耶神廟時可謂邦有道矣此藥比集中減數句改數字當以集為正真蹟今藏會稽韓氏而同郡石氏安摹刻之淳熙十二年二月清明節

跋蔣穎叔樞府日記

蔣魏公元符三年春自西帥再入翰林四月權二西樞明年改元嘉國七月升知院事又明年改崇寧十月以觀文知杭州在政府二年有半此其日記也廷之所謂慶詞者如以祐陵為乘輿之乘蓋協律令第十卷兩指曾子宜為淮西豈非以其請亳祠耶然九域志亳隸淮東不應言西也淳熙十二年九月晦

題陳去非帖

紹興乙亥歲某初仕王畿陳公之子本之為郎為
監家藏手澤甚富每休務輒求觀竟日今踰三十
年本之之子仁和宰復示此軸前輩翰墨愈久則
愈可敬而本之墓木已拱又可嘆也淳熙丙午二
月十三日

題陳去非謝御書等帖

光武中興誅賊不遑啓慮然猶投戈講藝息馬論
道樊華在漢以為美談其惟光堯皇帝撥亂于紹
興之初維時陳公周旋兩制遂踐政地觀此奏藁
知君臣講藝猶光武也論道細旃之上恨不得而
聞之淳熙十三年三月十一日

題彭仲衡家東坡書黃庭內景經石刻

集古錄有黃庭經二篇不著書人姓名其字亦止
于不俗亦為六一先生所取而殿中丞裴造好古
君子之名遂得附見今武岡主簿彭銓仲衡收黃
庭內景石刻葢東坡書重以類瀆山谷之詩李龍

眠之晝視集古所錄自當過之謂好古君子因慮
無款于裴獨鄙言不足行遠為可愧耳淳熙丙午
四月二十日

題劉丞相沆拜相制

一紀之間三題此告歲月逾邁而功業無聞愧嘆
久之淳熙十三年五月十七日

題劉丞相沆追封充公制

右元豐三年劉丞相追封充公制典重簡蔚字畫
綾紙皆渾厚亦可想當時氣象矣初至和中公與
文富竝相王文安為參貳嘗同議立儲逮元豐衰
典之行文富皆在獨公已薨魏泰東軒筆錄所載
歲月位序存亡皆差謬小說固難信也淳熙丙午
五月十七日

題富鄭公與劉丞相沆書

廬陵劉公至和二年實在相位富文忠公書葢是
歲正月者方以觀文守河陽二月即拜宣徽使判

并門遂與劉公竝位當時謂公素厚文忠力破朋黨之說致仁祖信任不疑今觀書詞信而有証偶非親筆但書名耳淳熙丙午五月十八日

跋臨江軍廖節婦碑

臨江廖節婦以死衛姑不辱于賊郡人戶知之二千石屢以狀上尚書輒復報聞其子士元懇請不已迄未獲旌嘉之命蓋國家凡肆大肯必曰義夫節婦孝子順孫長吏常切存恤事狀顯著具名以聞又曰忠臣孝子墳墓所在州縣量加封護曾被旌表依式重立由前之說專主生存故死節如廖有所不及由後之說雖主于死然止于忠臣孝子故節婦復在所遺此有司具赦條時以例相承未之思耳他日能詳著之廖必預褒典而士元之志庶其伸乎淳熙丙午五月辛巳

跋鄭景望詩卷

言學道者薄詞章近世則然景望龍圖通經篤行

見謂儒宗而其詩句乃綽有晉唐名勝之遺風胸中所養亦可知矣自其云亾不特永嘉學者深惜之中外士大夫皆惜之而予以舊交同僚猶惜之淳熙十三年十月十日

題宋景文家書

前輩謂文章當如作家書今觀景文公家書皆成文章是固一理也淳熙丁未二月二十三日

題宋元憲公表藁

元憲公表藁辭理精粹其行槩然今蓋百五十餘年矣明窗三復如見其人淳熙十四年二月廿二日

題洪景廬所藏王摩詰山水

自崇寧興畫學各筆間出有賜紫待詔高克明者頗得摩詰用筆意當時甚重之今已不易致況唐朝真蹟乎淳熙丁未八月八日過史院翰林洪公景廬出示此軸輒記其後

跋韓子蒼詩送劉童子歸廬陵

劉童子七歲能誦書部使者聞諸朝既至京師
會受制不果試其歸也以二小詩送之

七歲淵翻數萬言飢鷹引子望騰翬時平不用
甘羅草寂寞提書歸故園

不作西京童子郎時人已自識黃香還家更誦
五千卷十八重來詣太常

廬陵劉童子科字秀發音吐琅然試六經語孟左
氏傳于太學覆試于中書其誦如流此外猶記他
文數萬言緣受制不復盡試才免文解而歸乃父
求詩送行屬經堯喪言不能文姑錄韓子蒼二絕
句以示之尚有咏于卒章淳熙丁未十二月旦某
書

題向藤林家所藏山谷書南華玉篇

黃庭外景一篇世傳魏晉時道家者流所作自王
逸少以來高人勝士皆善書之此三十六篇乃其

義疏名曰內景蓋養生之樞要也藤林居士藏山
谷先生所書有年數矣其孫士虎遠以相示筆勢
秀傑何待稱贊惟所用字校光堯皇帝賜寧壽觀
本差殊頗多如首句虛皇尊今作虛皇前末句此
其文今作此真文當以御書本為正淳熙十五年
二月旦日

題汪達季路所藏墨蹟三軸

右東坡祭范蜀公文彙所獲皆賢俊所作燦如長
庚誰復舉之蓋種自應獲既喻求賢孰若得字之
廣大也前已用今如晨星不必又云燦如長庚改
用燦焉則語健而意足以舉為似大率類此學者
因前輩著述而觀其所改定思過半矣淳熙戊申
三月壬寅東里周某敬觀于大廟之齋廬李西臺
吾家膳部石曼卿鍾離景伯皆中原以書名者朱
希其尹彥明又皆南渡名勝季路藏此帖可謂好
事矣

題蘇季真家所藏東坡墨蹟

陸宣公為忠州別駕避諱不著書又以地多瘴癘抄集驗方五十卷寓愛人利物之心文忠蘇公手書藥法亦在瓊州別駕時其用意一也淳熙戊申三月十七日

元祐六年夏坡公既作聰聞復字序後三年春在定武復和其見寄詩有前生同社之語又後七年當靖國辛巳蓋公夢奠歲也猶贈詩僧道通詩云雄豪妙句苦而腴秘有琴聰與密殊其愛之重之如此淳熙戊申三月與洪景廬同以永思陵使事謁泰寧寺獲觀

文忠公在翰林兩因答臣僚辭免有所論奏其乞許安燾辭轉官兒內制集當時真蹟未知存否茲其一也蘇氏宜世寶之淳熙戊申四月六日東里周某書而歸之公元孫朴

題王樂道帖

右王文恪公與許州屬吏帖五世孫佐之出以相

示且曰祕閣有公文集三十卷惟奏議散逸不存予告之公事仁宗為臺諫事神宗為中丞其論奏甚多國史本傳已載大略當是時雖有名臣比肩于朝然是非元不相掩如劾陳升之則及史昭賜之兄言郭遠則云文彥博之走吏范仲淹之弄兒又謂韓魏公久專國政君弱臣強乞行罷退一夕覘吳長文之罪至數千言皆見于司馬溫公治平齊記欲不焚燬得乎佐之因請題其後淳熙十五年四月八日

題范太史家所藏帖

儒者病乎寡要實錄牽于多愛自太史公已然況餘人乎魯山李仁甫謂近則事詳遠則略不當以繁省論文其言美矣故續通鑑長編多採近世士大夫所著如曾子宣日記之偏王安國甲申錄之妄咸有取焉若得如范公者相與商度而斧蕪之

又善之善也淳熙戊申十月十八日

右嘉祐六年春知舉翰林王公范公中丞王公賈
閣唱酬一卷幅紙聯書則物無費隨手塗改則情
其真其至于宮商相宣金石諧和覽者自可玩味
于詞翰之表

太史公有云假令晏子而在余雖為之執鞭所欣
慕焉近時張浮休題諸公與尹師魯帖乃謂假使
皆無恙安得比肩踵門而過我夫賢者可從而不
可致太史公之言蓋竊有取而未敢以芝叟為然
也

跋向氏邵康節手寫陶靖節詩

康節先生繼先天經世之學顧獨手抄靖節詩集
是豈專取詞章哉蓋慕其知道也宜和末臨漢曾
絃謂舊本續山海經詩形天無千歲當作刑天舞
干戚某初喜其援証甚明已而再味前篇專咏夸
父事篇次篇亦當專咏精衛不應旁及他獸今觀

康節只從舊本則絃言似未可憑矣開歲條五十
或作五日近歲初覺謂五十則與辛丑不合今康
節直作五日尚何疑焉淳熙已酉重明節舟次臨
江鄰林向公之孫士虎出觀因表而出之

跋臨江守潘燾所收蔡君謨寫韓文三箴

蔡忠惠公書為本朝第一蘇文忠公言之矣誰敢
改評至于因筆之正而知公心之正不在此三箴
乎淳熙已酉重明節

跋彭惟孝永志堂記

夫子之門升堂入室者眾矣隱居求志猶云未見
其人蓋非伯夷叔齊莫能當也太和彭氏築堂而
是之名以似以續今三世矣至于孝求無念爾祖
聿修厥德復形于名字之間則其求之也其惟與
乎人之求之也與淳熙已酉十二月二十日

跋呂居仁帖

紫薇舍人呂十一丈在政和初春秋鼎盛且方崇

尚王氏學以蘇黃爲奧端而手書立身爲學作文之法乃如此其師友淵源因有所自而特立獨行之操誰能及之近世謂以詩名家是始見其善者幾耶嗣孫祖平力紹家學遠示此軸歎仰之餘輒附名于後充之老人姓唐韓廣仁丞國諱枋蓋真宗朝參政安仁之後仲長之子也紹熙元年正月二十五日

跋臨江軍任詔盤園高風堂記

清江江西一支郡耳而士大夫未至者必問向氏薌林如何任氏盤園如何其至則未有不朝薌林而夕盤園也夫園林勝槩所在不乏何獨二氏擅名如此非以其人之可貴歟惟向公伯芻早從前輩游旋受知高廟周旋中外事業顯著薌林泛宅又形宸翰盛年掛冠而歸迄備洪範之五福其可貴固宜任侯子嚴出于名家少年已負雋聲下筆輒數百言蒞官所至辦治蓋嘗親炙向公不但慕

蘭相如于後世也惟其才高志大不肯少下人是以屢起屢仆在官之日少閒居之日多劍藏智略盡力斯園殆與薌林爲鴻雁行數上書致其仕子頃在榻前明言其才願勿聽所請仍畀祠祿待他日之用天子然之而侯必欲希蹤向公懇請弗已後二年竟伸其志是可貴也郡人南安太守章君茂獻嘗作高風堂記誦侯之美識者避之予自念知侯久而瞻管薦進不力是一可愧叨塵過分未能如侯之納祿是二可愧四十年間往來不可計而才蕪思涸曾無一語形容園中之勝發揚主人之善是三可愧因茂獻之記姑自志其過云紹熙改元二月既望

跋李次山霄溪漁社圖

唐元結字次山嘗家樊上與眾漁者爲鄰帶笠簪而歌欸乃自號聿叟今河陽李君名元名也字元字也卜築霄溪又號漁社其善學柳下惠者耶始

乾道間子官中都君以先世之契數搆此圖求跋
自念身游東華塵土中欲為西塞溪山下語難矣
屬者奉祠歸廬陵所居在城東隅去江無五十步
洲名白鷺橫陳其前日以扁舟賞綠華問鷗鳥相

從百往而不止雖未敢竊比張志和亦庶幾乎元

次山矣而君方以尚書郎奉使全蜀凡六十一郡

之官吏數十萬之將士莫不斂板受約束銜枚聽

號令猶念舊社不置萬里遺書與圖偕來曾踐前

約子欲速載忘機之樂則君權任如此顧豈招隱

時耶須君他日奉計甘泉厭直承明尚寄聲于我

當有以告君今未可也姑題卷軸歸之紹熙元年

三月三日適逢丁巳青原野夫周某

題周鍾兄弟間立本樂治圖

圖畫見開志叙古名筆最後有唐陸澣堯民鼓腹

圖殆此類歟紹熙改元五月晦周某觀

又題款塞圖

周武王時四夷咸賓史官集其事為王會圖至唐
正觀三年東蠻入朝顏師古亦請繪蠻夷之在邸
者以彰懷遠之德太宗令間立本為之此豈唐人
遺筆乎何意象之古也

題養正堂記并魯侯帖

右冀州養正堂記并與魯侯帖山谷為北京教授

時所作年方三十有五自云比平時書札似差老

勁明年調太和宰秋江歸南真積力久詞翰又非

前比所謂九萬里風斯下矣紹熙元年五月晦周

某觀于宗人虞卿兄弟家

跋倪求已所作鄒時飛行狀

鄒彥明之死其子時飛得內相洪景廬為之銘時

飛死其子牽求鄉人倪丞狀其行實又將謁銘于

他邦子告之曰漢許劭兄弟俱有高名好其駁論

鄉黨人物每月輒更品題故汝南俗有月旦評夫

人善惡惟鄉評不可掩爾家再世為盧溪誠齋諸

儒先所與未嘗改評則其是非可考矣矧倪丞甚文而賢乃父必賴以傳奚必他求哉壑曰然請歸而刻諸阡紹熙元年

跋王民瞻楊廷秀與安福彭雄飛詩

廬溪王公主廬陵文盟者六十年繼之者今誠齋楊監廷秀也觀二公品題彭君如此則其學問文采可知矣袖書過我欲然不可謂為祝辭附名于左惟廬溪年近期頤而筆不衰予祝雲翔他日與之齊誠齋仕都顯美而進未止予祝雲翔他日踵其趾豈特毋負二公之言亦庶幾鄉里斯文之得其傳乎紹熙改元

跋永和歐陽樛叟銘

歐陽樛叟一鄉之善士始予登第叟不以儒先臨我贈我以詩今四十年叟之墓木已拱而其子若孫復與予游皆謹厚好學不怠秋蘭蘭芝之家訓叟為不亾矣讀胡忠簡公所述銘文不勝懷人念

舊之虞紹熙改元八月十三日

記已酉杭州鄭樞密事

已酉四月七日新除瑞明殿學士同簽書樞密院事鄭慤劄子奏臣自陛下退處別宮日夕憂憤計無所出謂必藉外兵方可圖復兼養不當居職欲得以罪去即北走平江金陵見張浚呂頤浩與議事累章待罪蒙太后降詔不允莫遂所請十日忽蒙宸旨除臣御史中丞臣職在彈擊官邪苗傅等悖逆肆虐擅行殺僇十六日遂具章乞告示傅等便宜軍法只得行于所轄兵卒其餘當聞之朝廷付有司以正典刑又傅等日至都堂與朝廷事臣慮威福之柄下移不敢愛死抗章極言謂朝廷近日差除多出苗傅劉正彥之意而二人更迭出入都堂殆無虛日其所以敢爾者必恃兵之強也王莽之兵非不強昆陽一敗莽卒投首乞告示苗傅等太后不欲

降出臣章疏恐傳等致害于臣及再上殿懇請
乞降付三省以告示之使苗等知畏縮則足以
正朝廷之綱紀使其肆橫害及臣身亦死職事
臣不當避遂降出臣章疏傳等果出怨言謂直
疑其爲王莽雖懷恨疾然亦少敢兼聞以發書
樞密院召呂頤浩以禮部尚書召張浚又分張
浚之兵以五百人歸陝西及浚不受尚書之命
浚不肯分所部兵遂謫浚以散官居郴州擢浚
以節度知鳳翔臣知皆出傳等奸謀假朝命使
外無強兵謀臣内生變亂事不可緩遂一章乞
留呂頤浩知金陵一章言張浚不當謫而求有
瞻氣謹密可矣事之人得奉議郎嚮令爲客旅
徒步如平江見張浚等具言城中之事令嚴兵
備大張聲勢持重緩進使其自遁無致城中之
變驚動三宮此爲上策撰杜鵑詩四句親寫令
攜去執呈諸人以爲信驗詩云杜鵑飛飛無定

栖寄巢生子百鳥依園林花老晝夜啼安得百
鳥挾以歸取杜甫詩言蜀天子化作杜鵑生子
百鳥巢之意以杜鵑喻天子以百鳥喻百官言
內外百官當同心共謀挾天子反帝位以歸宮
也嚮至平江以詩徧呈張浚呂頤浩劉光世張
俊莫不嗟嘆至二十六日忽聞宣詔降陛下爲
元帥降新帝爲監國太后獨坐簾聽政臣具章
留百官班同宰執從官上殿論列謂太后聽政
所以保有宋宗廟社稷今乃使趙氏子孫不得
居帝位二十日之間降二皇帝使天下無君詔
書一出則天下貢賦不至必有仗義而起兵者
蒙太后開納宣諭褒美令臣往都堂商議遂得
不降詔書于四方漸謀復辟擢臣備員樞府三
日而陛下復寶位此臣于陛下別處宮之後所
言所行之事也伏望陛下于萬機之暇特賜睿
覽則臣無任惶懼之至奉 此可報行

右樞密鄭公已酉三月末家問一通尋復辟而上此奏四月七日有旨報行距今六十餘年後生往往不記其全文金匱大書既難觀龜山誌文亦載大略故因公之孫出示此卷備錄奏篇而題其後紹熙庚戌八月二十六日

書張欽夫劉文潛傳與蔣邕州書

亾友張欽夫劉文潛皆眼高四海未嘗輕以一字許人先後帥桂林開張邕州遺愛及華夷大書至數百言推是以考其平生則張安國之銘豈諛墓者壽祿不于其身有子而才自宜光顯于世而礪也三抑于春官六十未離選調以此知遠方賢能匱窮不少矣子胥在進退人才之地深有愧于斯文紹熙元年九月甲子

題與王洋手書

皇江王嘉謨早以經術詞章首鄉舉聲名籍籍晚仕州縣止于選調人皆惜之二孫種學績文不奉

乃祖攜子頃歲書帖相通請記于後讀之恍然始如隔世芻狗已陳豈應復盛篋衍蕉鹿雖在未知其為彼夢耶紹熙九月二十四日

跋楊忠襄與鄉人羅錡詩帖

右忠襄楊公與友人羅錡士廉詩帖各二羅之姪孫必寶藏之子聞楊司業告諸生曰學者所以學為忠與孝也方政和中二公同游太學每以是相勉不幸士廉年方三十一死親之喪鄉人推為孝子名士胡份兼美實為之銘厥後忠襄遂死于忠國史書之萬世仰之平生取友如此賢矣哉紹熙庚戌十月一日

題郭知章告身後

右內翰郭公自玉堂出帥南陽告身一通其曾孫積中得于浸漬之餘攜以相示乃亦可謂之名臣矣紹聖以來權臣用事居言路者人知其難既晚入黨籍則大略固可考云紹熙元年十一月五日

少係充醴泉觀使益國公周某

書龔史傳後

徽宗實錄進于紹興末重脩成書在淳熙之四年龔公一傳微有增損要是後錄爲詳如論郝隨鄧洵武前皆略之比歲所進四朝國史列傳蓋取諸此初乾道中公曾孫熙正嘗請中書舍人張君孝祥書舊傳刻之石今復俾某題其後乃錄新傳以遺之惟公學術豈晚生所敢輕議至于守道不阿尚可推考方王荆公不喜春秋公則詳爲之傳知非苟從王氏者迨元祐初司馬文正力闢王說公乃反復申辯不爲少屈文正雖有習氣之語不害其爲實也厥後哲宗疑元祐大臣出公于外而公秦陳之意猶前日所以對文正也二三十年間士大夫徇時向背者多公獨始卒如此是宜人主信之學者尊之勁正如鄒忠公序公易傳至謂其說可與易偕行不朽而以門人自名則公學術可知

矣公父諱大同號括蒼名士子若孫立身蒞官皆不苟至頤正博通史學嫻于辭章諸公文薦于朝天子特命以官今居姑蘇閉戶著書近世言儒門者推龔氏云紹熙庚戌十一月十三日

題郭彥逢庚午解牒并易辨說

紹興庚午廬陵郡秋試數千人預貢者六十有一郭君彥逢名在第五又魁易之一經其才學可知已時君年過五十不復西笑故解牒猶在其孫特起同文彙製藏惟謹復著易辨十篇自乾卦至繫辭皆爲訓說誦予皆同升攜以相示追惟四十年間所謂六十餘人存者殆若晨星其子若孫能以一經傳家如郭氏者鮮矣予聞萬安爲邑在熙寧五年今將兩甲子英才項背相望策第太常何爲寥寂念爾祖而破天荒不在此時乎尚勉之哉紹熙庚戌十二月十二日

記李太白廬山詩

我本楚狂人，鳳歌笑孔丘。手持綠玉板，朝別黃鶴樓。五岳尋仙不辭遠，一生好入名山遊。廬山秀出南山傍，屏風九疊雲錦張。影落明湖青黛光，金闕前開二峰長。銀河倒掛三石梁，香爐瀑布遙相望。迴崖沓嶂凌蒼蒼，翠影紅霞映朝日。鳥飛不到吳天長，登高壯觀天地間。大江茫茫去不還，黃雲萬里動風色，白波九道流雪山。好爲廬山謠，興因廬山發。閒窺石鏡清我心，綠蘿開處懸明月。早服還丹無世情，琴心三疊道初成。遙見仙人彩雲裏，手把芙蓉朝玉京。先期汗漫九垓上，願接盧敖遊太清。

廬山之南有尋真沖虛觀，古名詠真道書真誥。述三十六洞天而詠真爲第八七十二福地，廬山爲元辰福地。是觀卽詠真洞天五老峰正在其後。唐正元間，女冠蔡尋真居之，因以名觀。後有白龍潭，飛瀑注焉。舊史云：漢武帝過九江，築羽章館于屏

風疊下臨，相思澗今五老一峰，疊石如屏障，蓋其故地。潭上有綠淨亭。

右見熙寧中陳令舉賢良廬山記。乾道丁亥十月己未，予來遊，宿焉。明日登採訪使者閣，望疊石峰，僅在百步間，相連卽獅子峰。石山無草木，曉日下照，宛如赤城，奇姿巧勢不可名狀。乃取李太白屏風九疊雲錦張之句題其牘。曰：雲錦閣龍潭在觀後，里許水作琉璃色，其中鼓天正黑，知觀湯善翔云深數十丈，相傳爲洞天之門，未知然否。潭上有靈澤龍祠，殆綠淨亭基耶。淳熙己酉秋，艤舟南康，略來山南，不暇再往，惟一至折桂，登黃雲觀而歸。回首舊游，坐二紀矣。明年道錄皇甫居中，以事來廬陵，求予書太白詩將刻之觀中，欣然許之。黃雲正倚五老，雖晚出然，登覽最遠。前守朱元晦所創，其名亦出此詩。云：紹熙庚戌。

跋太和樂南金所藏樂史慈竹詩

慈竹亦名桃枝竹唐王勃喬山皆嘗為賦勃云宗
生枝茂天長地久萬抵爭盤千株競糾如母子之
鈎帶似闔門之悌友琳謂九族睦叙孝友威儀是
竹必滋五服相煖骨肉攜離是竹必衰苟自家而
刑國亦觸類而增思其於摹寫諷諭固已略備又
得本朝雷臺樂公此詩然懲勤之旨粲然畢陳于
前凡在士庶自當家傳而人誦之况公苗裔乎刻
之宜矣紹熙元年九月二日

題韓文公黃陵廟碑

孔安國釋書陟方為升道言簡而意通學者可類
推也韓文公作黃陵廟碑乃訓陟為沒蓋疑東南
卑下宜言下方不當言陟遂以方乃死為釋此陟
字其說雖新某竊有疑焉不敢引他經為證姑以
伊尹告太甲質之其曰升高必自下陟遠必自邇
蓋以陟遐為涉遠也舜自中國南巡非涉遠乎况
地勢雖下其間自有崇岡峻嶺何害其云陟也大

抵古文簡少一字數義如爾雅以初哉首基肇祖
元胎俶落權輿為始故注詩者釋訪落為謀始可
謂簡而有據矣然則楚詞餐秋菊之落英其指初
英無疑或者不思訪落之義直以為隕落之落遂
至展轉相讓其失遠矣因文公之說併及之

益公題跋卷之十二

跋楊愿與王伯等詩

愿伏承駟父祕校惠示兒和鄙句七言四韻二
首降嘆之餘因成二絕往謝幸莫笑覽愿悚恐
再拜

冷官廳事客來稀種絲陰陰結夏帷忽得君詩
愜人意陶家風到北牕時

只今待讀周夫子屢說君詩似杜詩速把冠塵
盡彈却玉堂宵直伴王維愿數見待讀侍郎周
文盛稱勳父詩有句
法故後
篇及之

同年楊謹仲清江儒宗尤工詩仕難不遇而門人
登高第歷顯官者相望也年踰七十自吉州教官
奉祠而歸子頃在翰苑得書云東坡直玉堂讀李
端叔詩用伴直難呼孟浩然事詳考新舊唐書王
維傳皆不載曾入翰林況地禁亦非外人可至疑
蘇公自有所據然以今觀之恐無是事蓋諷予不

能引類爾他日復奇聲云古今無詩人監廟子亟

惡當路以車輅清曹招之謹仲纔拜命即掛其冠
後數年乃卒今覽贈王駟父再引維事見及猶前
書之意也按唐李肇翰林志明皇初改北門學士
為翰林待詔張說徐堅張九齡徐安正相繼薦之
而不及維後又改為翰林供奉計一時材藝之士
畢集其中如維能詩善畫有清名固宜預選新史
既採雜說載伴直事于浩然則維傳自不必贅矣
謹仲亦善墨戲見于家舊畫草蟲因作人物于後
至今藏之每想其風度未嘗不悵然也紹熙二年
二月三日

書韓忠獻王帖

治平四年九月魏忠獻王罷政判鄉郡會經度四
事十一月改判長安前守天章閣待制王舉元先
一月徙陝西都轉運使以龍圖閣直學士吳中復
代之度未至而忠獻實來俄又徙舉元知慶州改

命天章待制孫永清陝西前一帖與都運待制得非舉元或永乎其云欲到驛亭攀送承在朱宅疑彼不敢受謁故避于他所王俟暮夜方遣此簡實主之敬然後兩盡後一帖與參政尚書即趙公叔平也末題正月七日而紙背乃邠兵張祐訴牒猶稱治平五年者是歲正旦改熙寧元年詔書未到耳趙公是月二十三日自禮部尚書參知政事出守徐州通問時尚在朝也始予幼年猶見士大夫簡尺多起草蓋幅少辭寡初不爲勞稍長頗藏各公親帖以此集本所載經刪潤如六一先生書葉尤多王晚年名位德業盛矣其于尺牘尚毋不敬今之後生肯如是乎紹熙二年二月二十八日四世孫新全州使君邈來求考訂因爲及近事且以成亾友劉子澄之志云

題楊廷秀浩齋記

友人楊廷秀學問文章獨步斯世至于立朝諍諍

知無不言言無不盡要當求之古人真所謂浩然之氣至剛至大以直養而無害塞于天地之間者師友淵源決有自來今讀浩齋記乃知嘗受教于劉公公之賢可知矣其載河南夫子之問與管范淳夫以程伯醇語陳夢中殆一律耶廷秀此記不愧沈責矣紹熙辛亥四月既望

跋歐陽邦基勸戒別錄

淳熙甲午秋永新歐陽邦基壽卿攜書過予滔滔千八百言予愛嘆其才每以進脩勉之而壽卿素慕龍舒王日休之爲人讀其君戒錄及淨上文而悅之書者勸戒別錄求予爲序序固未暇也後十有六年奉祠來歸壽卿之錄益詳凡經史百家所記與夫近世士大夫善言善行皆聚而筆之析爲三卷總十五門又刻鈕懸種德篇及勸修西方淨業文散施于人惟恐聞者不信傳之不廣視日休茲鴻雁行也連歲踵門伸前請予曰如子之志雖

充棟宇汗馬牛且不能盡曾是三卷安得謂之成
書以要言之諸惡莫作眾善奉行兩言足矣上士
固不待勸中士必知所擇下士或思戒焉彼誨諄
諄而聽藐藐者非所計也壽卿請題其後不復求
序云紹熙二年四月二十六日

書安福劉德禮家紫芝詩卷

安福劉君德禮暨諸弟皆以文行稱于鄉淳熙丁
未冬葬其母大安人紫芝產墳再明年又生邑人
賦詩記之以予嘗與其先人同預鄉舉來求一言
予不暇遠稽方冊姑用本縣故事爲證符安福令
歐陽萬五世孫彬實文忠公之曾祖歷仕南京家
于安福性至孝兄弟相友爱有紫芝一莖兩絕生
于槿鄉人以爲孝德所感爲著賦頌享年九十四
累贈太師中書令後裔仕官不絕今劉氏兄弟孝
友競爽天應兆矣積善不已則顯親揚名何患不
歐陽氏乎天人不同尚其勉旃紹熙辛亥四月二

十九日

豐城府君便山處士唱酬詩卷

六一先生送佛者慧勤三章雖極道山中之樂而
謂不可久者蓋惜其才之甚良自棄于無庸欲反
之正耳若豐城府君非服胡而顛童也既有妻兒
之團圓又有酒果蔬薪足伏臘雲泉松竹娛耳目
且與便山處士爲隣朝夕唱酬是真得山中之樂
者使六一先生見之必將勸其可以久豈復遲子
之返邪

題陸先生赴省詩卷

紹興庚申伯文寓賴川招上庠舊同舍太和陸先
生字修居館下命子姪輩從其學辛酉冬辭赴春闈
此送行詩卷也時初得雩都羅愷教授所傳駱賓
王善本七兄戲效其體作序頌刻而成託名尚親
長道詩則尚自爲之第二篇仍大兄所賦以上惡
札皆子筆也第三篇大兄作仍代書焉第四第五

篇七兄與子自賦自書第六篇十弟第七篇李親及之詩并字亦出于手當是時長道年二十有五
大兄遞少一歲及之年十有九七兄年十七子年十六十弟又少二歲今五十年矣中間陸氏子以元本相遺雷冥篋中紹熙辛亥五月二十五日因暴故書覽之太息蓋長道大兄十弟墓槨森然惟子與二兄七兄白首相從而及之猶居頓云某題

題山谷與韓子蒼帖

士大夫少負軼材其詩章固已超絕然須經前輩題品乃自信不疑正如參禪雖有所得猶藉宗師之印可耳陵陽先生蚤以詩鳴蘇黃門一見比之儲光義暨與徐東湖遊遂受知于山谷晚年或實之江西詩社乃曰我自學古人豈所謂魯一變至于道耶紹熙辛亥八月一日

跋韓子蒼詩章

陵陽先生詩草友人陸務觀既刻石臨川又為跋

語不容復措辭矣先生諸孫藉搆以相示為之一唱三嘆最後贈張景方一篇由今觀之殆夫子自道也尚半存僅勉燻六字印本互易之比葉為勝務觀謂未必皆定本諒哉藉其善守之紹熙辛亥八月一日

跋杜祁公詩

右杜祁公酬九華吳殿院鼠鬚筆古律詩各一篇吳名宗復字仲庶至和甲午秋自殿中侍御史因論大臣出倖虔州未至改守池陽乙未冬復入臺公詩作于此歲時年七十有八又二年而薨實錄本傳云晚年喜為草書而歐陽公亦云言無俗韻精而勁筆有神鋒老更奇皆紀實也藉公賴叔心慕手追跋語數十字蓋得其髣髴云先是淳熙初元公四世孫立道已刻石祁陽今其弟新會昌辛至道復示真蹟敬推歲月題其後紹興二年歲次辛亥八月六日

題胡邦衡講筵詩卷

中興以來侍從百司燕饋之費率取辦于臨安每歲經筵開講讀及脩法官會于學士院府吏治具以爲常住講亦如之紹興壬午壽皇初卽位力脩節用裕民之政守臣趙子淵因條具與時雜費悉罷之歲省緡錢一二十萬歸之朝廷講會其一也是年秋洪遵景嚴以翰林承旨兼侍讀某時爲起居郎與洪議用學士院餐錢置酒五行以母廢故事後遂爲例逮乾道庚寅秋葢九年矣某以祕書少監兼直翰苑既費自我出則與院官鄭仲益侍郎同約客而以非經筵官不赴坐此忠簡胡公見懷之詩所爲作也今二十年真蹟尚藏予家因公姪濟以予和篇紙弊墨渝來求別書併取原詩畀之然當時忠簡公第見僕帳假之臨安遂云肆筵甚盛不知事始于此其後壽皇復以所省緡錢歸臨安于是燕饋如故惟講會學士院仍自爲之葢

其費初無多爾明年某遷禮部侍郎既仍舊直又兼侍講復增三勸爲半日之款至今不廢云此卷唱酬凡九人惟某與趙子直尚存可爲永嘆紹熙辛亥十月二十五日益國公周某書

題趙鑑堂快閣詩

鑑堂趙公和山谷太和快閣詩詞翰殆可相亞當時刻石邑中至今猶存又嘗錄小字本寄其弟湖州使君豈平生得意句耶湖州孫師與實寶藏不敢失墜來幸太和既重脩此閣盍併刻此詩如顏魯麻姑壇記不妨大小字俱傳也紹熙二年十一月二十四日題于長沙淳古堂

題方季中所刻歐陽文忠公集古跋

通天下郡邑凡賢傑之鄉與其宦游之地往往揭名公字繪象以事非獨誇耀今管亦惟高山仰止景行行止期有補于將來歐陽文忠公文章事業師表百世佛者惠勸尚能于公平符不到之地以

六一名其泉廬陵公父母邦也而夢奠兩甲子祠
堂僅列于學宮歷刺史不知幾人芝草雙蓮何物
草木乃得記瑞名堂獨于公置而弗及此何理也
無乃謂公生于綿長于隨仕于朝家于穎雖中間
葬母一至永豐則又凶服不入公門遂相忘于道
術歟紹熙元年太守蒲陽方侯定來首創六一堂
祀公其上以備闕典復訪求集古跋真蹟擇良工
摹刻之日聚月累旁搜遠取凡得二百五十餘篇
以校印本其未獲者才百餘篇指授點畫殆類親
筆非石刻比也會徙節廣東猶捐俸攜工以竟斯
事其用力至矣管韓文公以六經之文倡于唐而
其遺書初因公大顯厥後遂以六經之文鳴于宋
蓋傳道之宗在焉今侯篤志韓集箋校討論殆四
十年傳錄無慮數百家然後定著善本既牧廬陵
復尊事公于故鄉以風厲學者其有補于斯文豈
少哉書來俾之掛名卷末不得而辭也三年二月

七日周某書

書東坡宜興事

菩薩蠻

買田陽羨吾將老從初只爲溪山好來往一虛
舟聊從造物游有書仍懶著且擬歌歸去筋力
不辭詩要須風雨時

滿庭芳

余居黃五年將赴臨汝作滿庭芳一篇別黃州
既至南都蒙恩放歸陽羨復作一篇

歸去來兮清溪無底上有千仞差我畫樓東畔
天遠夕陽多老去君恩未報空回首彈鋏悲歌
船頭轉長風萬里歸馬注平坡無何何處是銀
潢盡處天女停梭問何事人間久戲風波顧謂
回來稚子應爛汝腰下長柯青衫破羣仙笑我
千縷掛漁蓑

陶淵明詩

丈夫志四海我願不如老親戚共一處子孫遠
相係觴絃肆朝夕尊中酒不燥緩帶盡歡娛起
晚眠常早孰若當世士冰炭滿懷抱百年歸丘
壠用此空名道 元豐七年十月二日宜興舟
中寫東坡居士

楚頌帖

吾來陽羨船入荆溪意思豁然如愜平生之欲
逝將歸老殆是前緣王逸少云我卒當以樂死
殆非虛語吾性好種植能手自接果木尤好栽
橘陽羨在洞庭上柑橘栽至易得當買一小園
種柑橘三百本屈原作橘頌吾園若成當作一
亭名之曰楚頌 元豐七年十月二日書

宜興主簿朱冠卿續編本縣圖經載東坡
四事

黃土去縣五十五里東坡與單秀才步田至焉
地主以酒見餉謂坡曰此紅友也坡言此人知

有紅友而不知有黃封真快活人邑人舊傳此
帖今亾

長橋元豐元年火焚四年宰邑褚理復立榜曰
欣濟未幾東坡過邑爲書曰晉周孝侯斬蛟之
橋刻石道傍崇寧禁錮沈石水中

東坡初買田黃土村田主有曹姓者謂而造訟
有司已察而斥之東坡移牒以出歸之

邑人慕容輝嗜酒好吟不務進取家于城南所
居有雙楠並植如蓋東坡訪之目爲雙橋居士
王平甫亦寄以詩

某自紹興癸酉迄淳熙己酉三十七年之間凡六
至宜興屢欲考東坡在此月日而未暇也今者避
暑杜門因觀楚頌帖略覓遺跡如右七月二日東
里周某題

蘇文忠公以元豐七年量移汝海四月離黃州五
月訪文定公于筠七八月之交留連金陵遂來常

州度九月間抵宜興備通真觀側郭知訓提舉宅
卽卻所館不知凡爾幾日也今觀楚頌帖及公曾
孫季真所藏淵明丈夫志四海皆題十月二日又
云宜興舟中寫計畱宜興不過旬餘復回郡城自
此復趨汝州過泗遇歲除八年正月四日乃行道
中上書乞歸常三月六日至南京被旨從所請回
次維揚又歸宜興畱題竹西三絕葢五月一日也
同孟震遊常州僧舍詩湛湛清池五月寒而謝表
謂今月二十二日到常州訖其爲五月無疑是月
被命復朝奉郎起守文登次韻賈耘老云東來六
月井無水仰看古堰橫奔牛七月二十五日與杜
介遇于潤之金山贈以古詩八月二十八日復贈
竹西無擇長老絕句則在道日月歷歷可考其冬
到郡五日而召自此出入侍從以及南遷逮靖國
辛巳北歸竟薨于常不暇踐種橘之約矣其帖今
藏寓客董伯揀家董氏世爲東秦各儒曾祖暨大

父在高皇時繼掌外制士林榮之伯揀亦篤學嗜
古能濟其美者也
公熙寧中倅杭沿檣常潤間賦詩云惠泉山下上
如濡陽羨溪頭米勝珠又有買牛欲老地備俗儉
之語卜居葢權輿于此滿庭芳詞作于元豐八年
初許自便之時公雖以五月再到常州尋赴登守
未必再至陽羨也軍中謂壯士馳駿馬下峻坂爲
注坡詞云船頭轉長風萬里歸馬注平坡葢喻歸
興之快如此印本誤以注爲駐今邑中大族邵氏
園臨水有天遠堂最爲奇觀取名于此詞云
元祐八年五月十九日任禮部尚書辨御史黃慶
基論買田事云責黃州日買得宜興姓曹人一畝
田段因其爭訟無理轉運使已差官斷遣不欲與
小人爭利許其將兌價收贖今公之曾孫猶食此
田豈曹氏理屈不復贖耶抑當時所置不止此也
三年前寓陽羨嘗考坡公到邑歲月書于楚頌帖

之後茲來長沙值二別乘皆賢而文南屬張唐英
毗陵人北廳蘇仲瑛則文定四世孫也復書以遺
之紹熙壬子五月一日重題

題權邦彥草書舞劍器行

樞密權公進士起家當靖康授撰脩宗澤邀擊金
虜功雖不成斯亦壯矣續以智略被遇高廟紹興
初由兵書踐西府未滿歲薨于位不及有所設施
今觀草書杜工部舞劍器行龍蛇飛動得顛張醉
素之遺意前輩文武自將不各一善大率類此後
題庚戌中元益年五十有一辭起復發運使時所
書風塵頽洞王室昏殆有感云紹熙壬子七月二
十一日

題張無垢手書

永嘉陳求仁同僚期月端方篤實相助為多臨行
出無垢張公與其先君子手書二十幅乃知父師
淵源有自來矣其云大學一篇學者入聖域衢路

又云聞見所得不如踐履之深又云接事遇物于
不可意處試吾所得此最親切者又云閉目前視
六十以前已行是非自進自退亦一快也凡是四
端所以脩身所以誨人尚禮盡在魯矣尺牘云乎
哉後有汪山一帖葢守東陽時也紹熙壬子八月
十日

題吉水宰陳臧孫邑計錄

不曾與

廬陵民煩賦重調守甚艱而支邑號吉水者地當
孔道為令尤艱緩則政弛急則訟興不以計免輒
以罪去吏部南曹榆闕于門選人過之側睨不敢
就淳熙末部以闕上省時予當軸故識修職郎陳
臧孫以其脩身知其能治人以其篤學知其能勸
民乃奏而授之或譏朝廷不當除令予笑曰開元
盛時明皇親策縣令于宣政殿擢韋濟宰禮泉令
倉庫門尹吏至卑者皆得進擬守令同號民之師
帥乃反不可況堂除大縣中興自有定制耶或者

乃已明年予罷政歸田里過其邑則民愛之吏畏之與時人情窘迫煎熬之態雍容愉怡矣官府推敗荒廢之餘茸治嚴整矣部使者交薦于上士農工商爭舉留于下予喜問臧孫何術致此耶徐示邑計簿一編則比二稅雜征財用出納皆推求源流考正名色區分件別隨事登載且謂予曰朝廷何嘗加賦于民民何嘗不輸賦于官身不正則吏姦肆治不勤則事失序當取而不取不當取而征焉此之不察一取成于吏手富家日富貧民日貧無惑乎督責紛然于鞭笞日及于下也當是時顧歸咎于賦重而人頑不亦悖乎臧孫請予題其後以告來者予曰良將不學孫吳自足取勝若讀兵書而未悟反足致敗名醫治病在意不在藥彼庸夫淺識輕用古方則雖參苓不必愈疾人存政舉自有活法此何爲者遂不果作臧孫代去既數月邑之秀士來言曰吏鮮去息久矣今于陳君其庶

幾焉將刊計錄願求一言乃爲詳記舊說以慰邑人之心紹熙三年九月十九日

題楊文卿詩卷

吉水楊公詩句典實可以觀學問之富字畫清壯可以知氣節之高仕不于其身必利其嗣人今祕書監廷秀其子也詞章壓縉紳忠鯁重朝廷零陵主簿長孺其孫也如花之正芳如驥之方駿詩云維其有之是以似之紹熙三年臘月七日

跋東坡帖

瀏陽丞新喻蕭君一致五世從祖潛夫元豐七年監盱眙倉坡公歲除前過其東軒留題二詩蓋量移汝州時也按盱眙隸泗州州在淮北縣治其陰故都梁號淮南第一山景物清曠公旣樂之而潛夫諱淵蓋慕陶靖節者其人又可知矣此公所爲賦詩也今廬陵閣閣中有樓甚偉江山滿眼徐師川以堆勝名之樓舊在倉官廨中承平時監當廨

爲美仕廣州至號八仙故倉廩氏所居住往有登
臨燕息之地各勝或還請而來秩高或折資而授
今昔今猶與本縣令序官近世勞苦卑復無復官
況撫卷爲之三嘆紹熙四年正月二十一日

跋黃魯直與蕭氏書

故河南少尹新喻蕭公諱從字從義宰分寧日山
谷嘗脩桑梓之敬崇寧壬午寓武昌作此書尋請
宜州未暇卜居漢陽也後九十有一年當紹熙癸
丑正月二十一日少尹曾孫淵陽丞一致以示周
某謹題其後

跋南豐黃世成銘文

南豐壺隱黃君辟門陰者二而各弗遂委家貨于
季而用則置志大學博所向落落積善爲仁乃不
久生自常情觀之可謂四不幸矣雖然不輕許可
如陸子靜而序之以銘老于文學如謝昌國而弔
之文楊廷秀今之歐公也挽君有詩李子經鄉之

秦伯也哀君有辭兼是四者傳之後世非大幸歟
假令君而貴而富而合而壽雖有得于身必無聞
于久殆未可以此易彼也因其子柎不遠千里求
跋語故書以遺之慰夫無窮之思焉君諱文晟字
世成紹熙四年二月六日東里周某

跋壽皇御批魏杞講和時奉使奏劄

魏絳勸晉侯和諸戎狄左氏美之丞相壽春公得
非苗裔乎何隆興和戎復出其手也雖然山戎納
虎豹之皮而請盟爲力易耳公當敵師在境親冒
矢石艱關通問然後得其要領視古爲難故晉僅
賜金石之樂而公乃藏雲漢之章其輕重亦不侔
矣後三十年公之子通判潭州熊夢湖南轉運司
幹辦公事驥稱出此軸示臣周某某謹題其後紹熙
癸丑三月二十八日

跋劉忠肅丞相帖

右忠肅公晚年與張浮休尺牘其第三幅分寫四

事而繫以名更無冗語可以為法紹熙癸丑四月
中休公之元孫無玷無欲以示周某謹附名于後

跋三游詩

右三游詩總一百七十篇陳胃字聖子其先淮南
人而家于衡熙寧中郡守五中和延為石鼓山長
時忠肅劉公自御史請監鹽倉命與二子同游南
岳馬上唱酬集為三卷公親以長篇繼之詞翰俱
美士大夫所當寶藏况其曾元乎純亦後改字斯
立眾允改字公允困于黨籍仕皆不顯聖子亦未
嘗仕云紹熙癸丑四月二十二日周某書而歸之
劉氏

跋盛子謙座中銘

盛公手書座中銘總二百二十字皆盛德事也以
此訓于後人其興可必至孫文肅公被遇仁皇遂
參大政衣冠相承迄今不墜蓋自周廣順元年距
紹熙癸丑凡二百四十有三年立言垂範貽厥豈

無基耶八世孫文林郎新信陽軍判官求道由長
沙以示郡守周某敬題卷末七月二十二日

書杜孝恭所紀王宣功伐

紹興隆興之間荆襄都統制王侯宣扞禦金賊收
復唐鄧經營汝洛戰勝攻取功冠諸將予為祕書
少監每于日曆中見其所上方略後入西府與邊
帥論近世名將往往推侯為首侯既沒兩洛帥守
監司列奏軍民思宣萬口一辭最後江陵帥張斌
欽夫奏乞立廟加贈諱數百言淳熙六年詔以
節鉞告侯弟非常典也其壻新賓州守杜孝恭常
從侯歷行陣故能詳紀功伐予實其說夫舅甥
親也善言溢美理或有之然日曆乃信史邊帥皆
公論兩路非私請欽夫又不輕以功名許人獨稱
侯有邊功且謂士卒每及侯輒咨嗟流涕如談古
人嗚呼豈溢美哉為書其後使告之太史氏孝恭
亦慷慨事功其智勇可用他時當牽聯得書矣紹

熙癸丑八月長沙郡守周某題

題沈師傳碑

道林以四絕名堂沈居其一歲久堂壞葺而扁之
又得沈碑于公帑移寘堂上別刻本畱郡齋紹熙
癸丑十月旦假守周某題

題向士伯所收溫公竝瞻堂額

文潞公出入將相考四十勲業光明士民歌舞之
其所至各堂多矣惟竝瞻本裕陵之賜詩德威因
西戎之獻馬又得司馬文正公蘇文忠公作記與
銘故二堂猶章章在人耳目今復獲敬觀文正所
題榜使僕生于當時雖為之捧視所欣慕焉紹熙
癸丑會慶節周某書而歸之

題印山羅氏一經集

六籍火于秦易絲卜筮傳者不絕詩諷誦人口非
專竹帛故二經獨賴以全本朝大儒歐陽公猶致
疑于係辭則其專心致志者詩而已蓋嘗因毛鄭

箋傳為之圖譜議者謂公平生溫柔忠厚茲有助
焉今江西通經之士固多而詩學猶盛于廬陵印
山羅氏又其淵藪三歲舉于鄉殆無虛榜六十年
間父子兄弟登科第者七人如川之方增也夫經
明必行脩豈徒解頤拾青紫而已他日采詩之官
出觀風俗考得失使溫柔忠厚之教不在乎他邦
非大成歟予雖老尚及見之紹熙四年十一月七
日

高宗御批錢伯言奏疏

右已酉歲二月十日錢伯言所上御舟宿頓奏後
有高宗皇帝宸翰二十九字御押在焉蓋行在秀
州時也初帝于是月三日壬子南渡幸鎮江府伯
言先以龍圖閣直學士為守至是充巡幸提點一
行錢糧頓遞官癸丑駐蹕丹陽縣甲寅次常州乙
卯次無錫縣丙辰次平江府丁巳少休戊午次吳
江縣之平望己未次秀州乃批此奏今史局有自

元符庚辰至己酉六十年間目錄或云陳琦所纂
 具載庚申發秀州次長安剛辛酉次杭州實如批
 語而著作局日曆作庚申宿崇德辛酉次臨平壬
 戌抵杭則與伯言奏同未知孰是按伯言進樞密
 直學士及錢糧頓遞之命日曆皆不書後數年因
 丐叙復乃見殆搶攘中文書散逸後來省記疏畧
 爾新除祕書少監臣孫建吉頃為實錄院檢討官
 訪求逸事偶得此本今既召還必將參訂而一之
 伯言蓋總之子也紹熙癸丑冬至日少保觀文殿
 大學士判潭州軍州事充湖南路安撫使益國公
 臣周某恭書

題潭州道林寺六絕堂

唐乾符中袁浩作道林寺四絕堂記蓋指沈傳師
 裴休筆札宋之間杜甫篇章也本朝治平四年秋
 蔣之奇別為記謂沈杜固無間言裴本學歐陽詢
 書寺幸有詢四大字當為一絕又不應近捨韓愈

詩遠及之間其去取如此今三人詩各載集中叙
 所共知惟袁記與裴歐字畫則不復存予既稍葺
 其堂訪沈碑而歸之復臨閣本歐書并襄陽僧舍
 裴所作八大字併刻于石蓋歐資郡人裴嘗牧此
 俱不可廢今古今與同之論衍四為六其在茲乎
 後數日寺僧于朽壤中得大中十一年斷際禪師
 傳心法要序字乃小楷其後段亦作裴筆真贋
 未可知也先是堂之題梁著馬氏五代時職位近
 歲修長沙志遂謂此名創于馬氏誤矣紹熙癸丑
 十二月旦郡守周某題

先太師潭州益陽縣清修寺留題記

靖康丁未五月一日高宗即位改元于南京八月
 四日先公太師以前大學博士被旨使荆湖南北
 路與提點刑獄官偏行所部會計金穀事載日曆
 時年三十有六明年戊申六月由長沙歷益陽如
 武陵郡道游清修寺留詩一篇道長老宗元而不

著姓名因康君政語始知大略後六十四年當紹熙辛亥冬某叨鎮湘楚適天子新見上帝恩及諸臣之家而先公已封莒鄆漢魏唐六國矣卽具奏願以此邦賜先臣履光乘傳之舊優詔從之遂昨潭國惟是歲月悠遠其在所部獨道州白石洞有八月二十五日題名蓋自湖北回長沙而過春陵也遺事則不可推矣他日偶爲諸邑言離騷文章之祖既發端此地蓋亶古今詩文刻以傳遠使學者知源流之有自于是益陽宰黃談首摹雜碑數十通來此詩在焉初未知爲先公也覽之矍然讀之潸然殆天誘其衷使心聲手澤久晦復彰以明示神靈來燕來寧之意乎夫生而將命沒而旌土且幸不肖之孤攝官承乏表而出之是皆宜書會主僧善信求叙本末敬書其後四年歲在癸丑十二月一日嗣子某謹記

跋劉提刑家帖

米元章詩

米南宮詞翰妙絕一世東平劉氏藏之久矣紹熙癸丑臘日周某獲觀心目爲之開明

陳大諫

右陳瑩中詞翰皆與劉斯立者曾孫無玷無欲寶藏之以示周某敬題其後紹熙癸丑臘日

宋宣獻呂汲公

劉忠肅公四世孫無玷無欲家藏宋次道呂微仲四帖紹熙癸丑臘日周某敬觀

蘇黃門

右蘇文定公與劉忠肅公父子四帖紹熙癸丑臘日周某敬觀

張芝叟

張浮休與劉忠肅五帖比尋常作字極不同蓋加敬耳紹熙癸丑臘日周某謹題

劉忠肅公辨誣本末

劉子駒手書辨論始末與蘇州烏臺詩案竝行于世足以知權臣誣陷之慘而聖祖昭雪之公也紹熙癸丑臘日周某書

跋劉炳先家五賢帖

劉君光祖昭祖兄弟自廬陵徙家長沙兩邦賢士如林王盧溪胡忠簡公劉子駒張敬夫楊廷秀又兩邦之喬木皆推其孝友或賦詩或作記或通問諄諄稱道予來假守人無間言甚可喜也出示前五賢真筆敬題其後紹熙癸丑臘月日周某

跋錢穆父

吳越錢氏子孫文章名世者無代無之穆父又以政事取知朝廷行誼見推善類尤可敬也此帖藏族孫長沙主簿選家紹熙癸丑臘日周某獲觀

跋折彥質燕社堂詩

承平時長沙郡圃燕社堂在大池中聞甚宏麗兵火不存紹熙三年二帥龍圖閣直學士折公姑葺

亭于舊基明年冬移鎮桂林爾六絕句一時膾炙人口後二十二年歲在乙亥直祕閣陳琦大新斯堂稍復舊貫而亭與詩亡矣又三十九年某從公之子大理正知常得別本方伐石摹勒會蒙恩改豫章亟刻板揭堂上使來者得覽觀焉紹熙癸丑臘日郡守周某題

諸家題跋多載法書名画或評詩文得失或辨碑銘異同間及山水幽昧未有臆列泐批劉子者周益公題開卷紛無恠乎後即病其洗滌詞科習氣不盡也集中凡稱述歐陽文忠公者居十之三併公子仲純叔弼亦推重不已先輩謂廬陵以文章統蓋以文忠與益公表表卓卓爾海隅毛晉識

益公題跋卷之十二



王雲五主編

叢書集成初編

益公題跋
二册

中華民國二十五年十二月初版

撰者 周必大

發行人 王雲五
上海河南路

印刷所 商務印書館
上海河南路

發行所 商務印書館
上海及各埠



3
4
1567